

江都縣志卷之三十一

江都縣知縣

五格

重修

藝文上

傳言廣陵在漢時吳王好文辭而大山小山之作
奮自淮南則江都固流其遺風也邑之學士大夫
以及四方宦游之至止者每多有所撰著玉振華
繁後先相望矣志既於各條下類附之餘則亦未
忍盡棄也爰更擇而彙諸編其文因地作者地分
新邑則文不兼收以自有裝之玳瑁者云志藝文
策

江都縣志

卷之三十一 藝文上

漢封廣陵王策

武帝元符六年

於戲小子胥受茲赤社朕承祖考維稽古建爾國家封
於南土世爲漢藩輔古人有言曰大江之南五湖之間
其人輕心揚州保疆三代要服不及以政於戲悉爾心
戰戰兢兢迺惠迺順毋侗好逸毋邇宵人惟法惟則書
云臣不作威不作福靡有後羞於戲保國艾民可不敬
與王其戒之

詔勅

漢順帝追褒廣陵太守張綱詔

故廣陵太守張綱大臣之苗剖符統務正身導下班宣

德信降集劇賊張嬰萬人息干戈之役濟蒸庶之困未
升顯爵不幸早卒朕甚愍焉

賑卹九江廣陵寇害詔

質帝本初元年

九江廣陵二郡數罹寇害殘夷最甚生者失其資業死
者委屍原野昔之爲政一物不得其所若已爲之况我
元元嬰此困毒方春戒節賑濟乏厄掩骼埋胔之時其
調彼郡見穀出粟窮弱收葬枯骸務加理恤以稱朕意

唐憲宗條貫江淮銅鉛勅

錢貴物賤傷農害工權其輕重須有通變比者銅鉛無
禁鼓鑄有妨其江淮諸州府收市銅鉛等先已令諸道
江都縣志 卷之三十一 藝文上 二
知院官勾當緣令初下未盡頒行宜委諸道觀察等使
與知院官切共勾當事畢日仍委鹽鐵使據所得數煩
會聞奏

李鄘平章事制

憲宗元和十二年十月

弼成庶政必屬於長才經制四方是資於碩望况叅酌
理本變和化源苟非傑賢孰允斯任爰立爾德將諧具
瞻淮南節度副大使知節度事管內度支營田觀察處
置等使銀青光祿大夫檢校尚書左僕射兼揚州大都
督長史御史大夫上柱國江夏縣開國侯食邑一千戶
李鄘性惟直方器本宏固冲敏可以成務通明可以質

疑懷匡主之忠規蘊經邦之達略歷居雄鎮累服大僚
臺閣藩方動流成式資爲重望綽有餘才必能翼宣鴻
猷導迎和祉是用微拜陟於黃樞竭爾訐謨司我號令
法期畫一俗俾康寧寅亮度工屬在良輔爾其勤思至
道以洽太和戒之敬之往踐厥職可守門下侍郎同中
書門下平章事散官勳封如故

王播平章事制

憲宗元和

宰相之制所以撫鎮國家出納王命弼亮刑政燮理陰
陽爲一人之股肱注四方之耳目僕射之職在於參贊
萬務統率六官師長百寮總臨臺寺冠中朝之碩望爲

江都縣志

卷之三十一

藝文上

三

多士之具瞻其有人司利權累分閭寄位重邦教任隆
臺堦爰因入覲之榮再賜登庸之命俾升鼎鉉用輟旌
旄淮南節度副大使知節度事管內營田觀察處置臨
海縣牧等使兼諸道鹽鐵轉運等使銀青光祿大夫檢
校司徒同中書門下平章事揚州大都督府長史上柱
國太原縣開國男食邑七百戶王播知識精深機神敏
達長才適於通變雅量得於寬明亟登將壇仍佩相印
休聲早振於全蜀成績近著於維揚山澤之貨無遺輸
轉之資相繼用佐經費克彰忠勞朕獲守宗祧君臨億
兆尚賴匡救底於輯甯於戲爾有嘉謨我求懿德將期

納誨以及交修冀霖雨之濡能普施於四海舟楫之利無專美於一方寵以端揆之榮仍茲權筦之重往踐乃位汝其欽哉可尚書左僕射同中書門下平章事依前充諸道鹽鐵轉運等使散官勳封如故

宋幸揚州詔

太祖建隆元年

朕以叛臣負國凶黨嬰城勞將帥以征行救生靈之塗炭重念蒙犯霜露跋涉山川將親示於撫巡須暫離於京闕朕取今月內幸揚州凡所供須務令省約方期靜亂無至勞人餘依征澤潞詔書從爭

寬卹揚州詔

建隆元年

江都縣志

卷之三十一

藝文上

四

王者伐罪弔民戡難旣清於氛祲班師振旅推恩宜及於幽明朕親御六軍已平孤壘念丁民之力役冒矢石以捐軀或軍民曾被於脅從或部曲尚懷於反側俾遂來蘇之望爰行在宥之恩應揚州城下役夫內有死於矢石者人給絹三疋仍復其家三年長吏倍加安撫屍骸暴露者仍令使臣收瘞城內軍人及李重進元隨軍家口骨肉並無犯罪逃亡者聽於所在首身押來赴闕

罷揚州貢獻勅

英宗治平四年

詔諸州貢物有一郡而歲三四至耗蠹民力莫不由斯令罷之揚州歲貢新茶一銀合藏薑五十罐亦罷

賜知揚州蘇軾停征淮浙逋欠勅

哲宗元祐七年

詔淮浙逋欠最多累歲灾荒人民流移相屬今淮南始得一麥淮西未保收成應淮南東西路諸般逋負不問新舊有無官本並得與權住催理一年已有寬限者卽依元降指揮

巡幸淮甸詔

高宗建炎元年

詔據羣臣章疏請幸東南賊狡謀難以便憑據探報遠去中原專備一方可暫駐蹕淮甸庶四方有警皆易接應除河北河東已相繼發兵及京師已應到綱運並委措置防禦外可分留精兵科撥錢物於應天府泗州等處防守準備使喚增重中原之勢應合行事務令三省樞密院同共措置施行今來巡幸卽非建都捍禦稍定仍還京闕以待二聖之復駐蹕之地不爲久計仰先次行下不得輒有興修改易以致勞費

罷揚州等處土貢勅

建炎三年

應天下土貢如金銀匹帛以供宗廟祭享之費用以贍內外官兵之請給不可闕者合依格起發外其餘土貢若揚州照子之類一切罷貢

戒諭兩淮守令卹農詔

孝宗隆興元年

朕觀周宣之治還定安集而劬勞矜寡離散之民咸安

其居中興之業人到於今稱之朕初承基緒兢兢業業以計安天下深惟兩淮之間瘡痍未平民力大屈流移交集轉爲氓隸廼眷北顧用震悼於厥心間者太上皇帝數申飭守令懷輯疲瘵督趣農桑蠲賦省徭以佐百姓之急臨遣左右侍從之臣分行疆場復調旁郡耕牛振業新附所以加惠元元者視周宣有光焉朕臨政願治仰遵慈訓夙夜不敢忘而邊疆翔貴生齒益落自占版籍者裁計二三僑居浮寄無所係心勸之勤而應之怠其咎安在豈下吏未能奉稱而盡地力之教不先歟將豪奪暴抑歟東作爭而害農者蕃歟夫兩淮吾所重

江都縣志

卷之三十一

藝文上

六

也異日沃野上腴爲天下最今乃儕於荒遠彫敝之區幾不爲郡長民者獨安取此繼自今其悉乃心銷沮游末力穡愷本以稱安集之意有能率先墾闢爲諸郡倡者部使者上其名以差受寵若縱弛怠傲不如吾詔者亦糾劾以聞時則有顯罰不可追朕言維服尚聽毋忽

放揚州高郵等處錢糧勅

隆興二年

楚滁盱眙揚州高郵軍房錢白錢展放二年日前積欠稅賦并常平諸色借負及承買坊場河渡拖欠課利並除放私下欠負權行倚閣候及三年依舊逐州合起廂禁軍闕額錢更與放免二年

表

舉才表

鎮廣陵時上

宋 劉義恭

臣聞雲和備樂則繁會克諧驂騑服則致遠斯效陛下順簡資化文明在躬玉衡既正泰階載一而猶發慮英髦垂情仄陋幽谷空同顯著揚厯是以潛虬聳鱗仁利見之期翔鳳弭翼應來儀之感竊見南陽宗炳操履閑遠思業貞純祇節坵園息賓盛世貧約而苦內無改情軒冕屢招確爾不拔若以蒲帛之聘感以大倫之美庶投竿釋褐翻然來儀必能毗燮九官宣贊百揆尚書金部郎臣徐森之臣府中直兵參軍事臣王天寶並局江都縣志

卷之三十一 藝文上 七

力允濟忠諫欵誠往年逆臣叛逸華陽失守森之全境甯民續章危棘前者經畧伊瀍元戎喪旅天寶北勤河朔東據營坵勳勇既昭心事兼竭雖蒙褒叙未盡才宜並可授以邊藩展其志力交趾遼邈累喪藩將政刑每闕撫莅惟艱南中負遠風謠迥隔蠻僚狡竊邊氓荼炭實須練實以綏其難謂森之可交州刺史天寶可甯州刺史庶足威懷荒表肅清遐服昔魏戊之賢功存薦士趙武之明事彰管庫臣識愧前良理謝先哲率舉所知仰酬採訪退懼瞽言無足甄獎

揚州謝上表

宋 韓琦 穉圭 安陽

臣某言伏蒙聖恩授臣資政殿學士知揚州事已於四月五日到任訖臣謬參樞筦無補盛明人言已騰君量猶恕秘殿之資甚寵廣陵之寄絕優過爾被恩得無懷媿中謝伏念臣朴忠守道天賦難移孤直任真聖知有素常以親逢亨運早廁清塗不宜因循以負驅策屢膺煩劇之任偶逃罷軟之譏自元昊僭狂西陲震動乃承人乏薦領帥權雖無成功實盡死節不意曲矜久次擢忝近司固讓莫諧竭愚思效凡陳鄙議皆出至誠慮邊計則冒朋黨之疑斷國論則恥依阿之說會儉人之肆忿窺時事以興誣爰從親葬之還獲視篋書之謗旣詳

矯妄因得指陳願付宰樞示於臺諫閱茲虛罔之狀卽驗中傷之情臣自以叨備臣隣乃來詆訾不可更塵重任有玷公朝尋伏私居乞行顯罷伏蒙尊號皇帝陛下察無他過尚錄舊勤深惟進退之間必存堂陛之體俾兼美職出守便藩舟楫安流浹旬受署重念朝廷求治疆鄙僅甯臣內不能協贊籌帷精講治平之策外不能周旋塞壘力營預備之謀而乃宴處名城坐尸厚俸庇親自足臨政少憂於臣身則粗安在臣治則未報敢不導宣寬詔慰撫編氓米鹽之務必親獄市之繁無擾士師當黜固枉道以弗爲卽墨免烹諒毀人之終辨誓稟

不渝之操仰酬惟睿之仁

揚州謝上表

歐陽修

永叔
廬陵

臣修言準樞密院遞到誥勅一道伏蒙聖恩授臣起居舍人依前知制誥知揚州軍州事已於今月二十二日赴任訖者貶所脫身遽叨臨於督府歲成無狀乃叙進於官聯被渥以優撫心增懼伏念臣材非適用行輒違時徒知好古之勤自勵匪躬之節誤蒙獎拔驟玷寵榮小器易盈固已宜於顛覆盡言取禍仍多結於怨仇仰恃公朝臣雖自信在於物理豈有不危矧利口之中人譬含沙之射影謂時之衆嫉者易爲力謂事之陰昧者易爲誣上繫天聽之聰終鮮獄辭之濫苟此寃之獲雪雖永棄以猶甘而况得善地以長人享及親之厚祿坐安優逸未久歲時亟就易於方州仍陟遷於秩序有以見聖君之意未嘗忘言事之臣孤拙獲全忠善者皆當感勵姦讒不効傾邪者可使息心非惟愚臣獨以爲幸此蓋伏遇皇帝陛下乾坤覆載日月照臨察人常務於究清行賞必思於有勸致茲恩典施及懦庸誓堅終始之心少荅生成之造

揚州謝到任表

蘇

軾

子瞻
眉山

一麾出守方愧媿安十國爲連復膺寵寄恩榮旣溢慙

汗寢甯臣某

中謝

伏念臣本以鯁生冒居禁從頃緣多病力求頽尾之行曾未半年復有廣陵之請蓋以魚鳥之質老於江湖之間習與性成樂居其舊天從民欲許擇所安恭惟皇帝陛下欽明文思剛健純粹天機默運灼知萬化之情人材並收各取一長之用如臣衰朽尚未遐遺命至蹇而祿已盈每懷憂懼志雖大而才不副莫報恩私

奏疏

陳事書

漢

劉

瑜

季節廣陵

臣瑜自念東國鄙陋得以豐沛枝蔭被蒙復除不給卒

江都縣志

卷之三十一

藝文上

十

伍故太尉楊秉知臣竊闚典籍猥見顯舉誠冀臣愚直有補萬一而秉忠謨不遂命先朝露臣在下土聽聞歌謠驕臣虐政之事遠近呼嗟之音竊爲辛楚泣血漣如幸得引錄備荅聖問泄寫至情不敢庸回誠願陛下且以須臾之慮覽今往之事人何爲咨嗟天曷爲動變蓋諸侯之位上法四七垂文炳耀關之盛衰者也今中官邪孽比肩裂土皆競立蔭嗣繼體傳爵或乞子踈屬或買兒市道殆垂開國承家之義古者天子一娶九女娣姪有序河圖授嗣正在九房今女嬖令色充積閨幃皆當盛其玩飾冗食空宮營散精神生長六疾此國之費

也生之傷也且天地之性陰陽正紀隔其道則水旱爲并詩有云五日爲期六日不詹怨曠作歌仲尼所錄况從幼至長幽藏歿身又常侍黃門亦廣妻娶怨毒之氣結成妖眚行路之言官畧人女取而復置轉相驚懼孰不悉然無緣空生此謗鄒衍匹夫杞氏匹婦尚有城崩霜隕之異况乃羣輩咨怨能無感乎昔秦作阿房國多刑人今第舍增多窮極奇巧掘山攻石不避時令促以嚴刑威以正法民無罪而覆入之民有田而覆奪之州郡官府各自考事姦情賂賂皆爲吏餌民愁鬱結起入賊黨官輒興兵誅伐其罪貧困之民或有賣其首級以

要酬賞父兄相代殘身妻孥相見分裂窮之如彼伐之如此豈不痛哉又陛下以北辰之尊神器之寶而微行近習之家私幸宦者之舍賓客市買熏灼道路因此暴縱無所不容今三公在位皆博達道藝而各正諸已莫或匡益者非不智也畏死罰也惟陛下設置七臣以廣諫道及開東序金滕史官之書從堯舜禹湯文武致興之道遠佞邪之人放鄭衛之聲則政致和平德感祥風矣臣慙慙推情言不足採懼以觸忤征營懼悸

請立學校疏

晉戴

邈

望之
廣陵

臣聞天道之所大莫大於陰陽帝王之至務莫重於禮

學是以古之建國有明堂辟雍之制鄉有庠序黌校之儀皆所以抽導幽滯啓廣才思蓋以六四有困蒙之吝君子大養正之功也昔仲尼列國之大夫耳與禮修學於洙泗之間四方髦俊斐然向風身達者七十餘人自茲以來千載絕塵豈天下小於魯衛賢哲乏於曩時勵與不勵故也今末進後生日不睹揖讓升降之儀耳不聞鐘鼓管絃之音文章散滅圖讖無遺此蓋聖達之所深悼有識之所嗟歎也夫儒道深奧不可倉卒而成古之俊又必三年而通一經比天下平泰然後修之則功成事定誰與制禮作樂者哉又貴遊之子未必有斬將

舉旗之才亦未有從軍征戍之役不及盛年講肄道義使明珠加磨瑩之功荆璞發採琢之榮不亦良可惜乎臣愚以世喪道久人情玩於所習純風日去華競日彰猶火之消膏而莫知覺也今天地告始萬物權輿聖朝以神武之德值革命之運蕩近世之流弊繼千載之絕軌篤道崇儒創立大業明主倡之於上宰輔督之於下夫上之所好下必有過之者焉君子之德風小人之德草實在感之而已

上晉武帝疏

錄二條

劉

頌

廣陵

天下至大萬事至衆非垂聽所得周覽是以聖人之化

執要而已委務於下而不以事自嬰也分職既定無所與焉非憚日昃之勤而牽於逸豫之虞誠以政體宜然事勢致之也何則夫造創謀始逆闇是非以別能否甚難察也旣以施行因其成敗以分功罪甚易識也易識在考終難察在造始故人君恒居其易則安人臣不處其難則亂今陛下每精事始而畧於考終故羣吏輕飾文采以避目下之譴重此政功所以未善也今人主能恒居易執要以御其下然後人臣功罪形於成敗之徵無逃其誅賞故罪不可蔽功不可誣功不可誣則能者勸罪不可蔽則違慢日肅此爲國之大畧也臣竊惟陛下聖心意在盡善懼政有違故精事始以求無失又以衆官勝任者少故不委務甯居日昃也臣之愚慮竊以爲今欲盡善故宜考終羣官多不勝任亦宜委務使能者得以成功不能者得以著敗敗著可得而廢功成可得遂任然後賢能常居位以善事闇劣不得以尸祿害政如此則勝任者漸多經年少久卽羣司徧得其人矣今人主不委事仰成而與諸下共造事始則功罪難分下不專事居官不久故能否不別何以驗之今世士人決不悉良能也又決不悉疲軟也然今欲舉一忠賢不知所賞求一負敗不知所罰及其免退自以犯法耳非

不能也登進者自以累資及人間之譽耳非功實也則當今之政未稱聖旨此其徵也古人有言琴瑟不調甚者必改而更張凡臣所言誠政體之常然古今異宜所遇不同陛下縱未得盡仰成之理都委務於下至於今事應奏御者蠲除不急使要事得精可三分之二古者六卿分職冢宰爲師秦漢以來凡列執事丞相都總今尚書制斷諸卿奉成於古制爲重事所不須然今未能省并可出衆事付外寺使得專之尚書爲其都統若丞相之爲惟立法創制死生之斷除名流徙退免大事臺乃奏處其餘外官皆專斷之歲終臺閣課功校簿而已

此爲九卿之創

之尚書書主賞罰繩之其

勢必愈考成今親掌者動受成於上上之所失不得復以罪下歲終事功不建不知所責也

夫監司以法舉罪獄官案劾盡實法吏據辭守文大較雖同然至於施用監司與夫法獄體宜小異獄官惟實法吏惟文監司則欲舉大而畧小何則夫細過微闕謬妄之失此人情之所必有而悉糾以法則朝野無全人此所謂欲理而反亂者也故善爲政者網舉而網疏網舉則所羅者廣網疏則小必漏所羅者廣則爲政不苛此爲政之要也而自近世以來爲監司者類大綱不振

而微過必舉微過不足以害政舉之則微而益亂大綱不振則豪強橫肆豪強橫肆則百姓失職矣此錯所急而倒所務之由也夫大奸犯政而亂兆庶之罪者類出富強其力足憚其貨足欲是以官顧勢而頓筆下吏縱姦懼所司之不舉則謹密網以羅微罪使奏劾相接狀似盡公而撓法不亮固已在其中矣非徒無益於政體清議乃由此而益傷古人有言曰君子之過如日之蝕焉又曰過而能改又曰不貳過皆是賢人君子不能無過之言也苟不至於害政則皆天網之所漏所犯在甚泰然後王誅所必加故君子得全美以善事不善者必

夸戮以警衆此爲政誅赦之準式也賢人君子苟不能無過小疵不可以廢其身而輒繩以法則愧於明時何則所犯輕重甚殊受責不同而名不異故不軌之徒得引名自方以惑衆聽因名可亂假力取直故清議益傷也是以聖人深識人情而達政體故其稱曰不以一眚掩大德又曰赦小過舉賢才又曰無求備於一人故冕而前旒充纒塞耳意在善惡之報必取其尤然後簡而不漏大罪必誅法禁易全也何則害法在犯尤而謹搜微過何異放兕豹於公路而禁鼠盜於隅隙古人有言鈇鉞不用而刀鋸日敝不可以爲政此言大事緩而小

事急也時政所失少有此類陛下宜反而求之乃得所務也

救李邕疏

唐孔璋

明主舉能而捨過取才而棄行烈士抗節勇者不避死故晉用林父不以過漢任陳平不以行禽息殞身不祈生北郭碎首不愛死向若林父誅陳平死百里不用晏嬰見逐是晉無赤狄之士漢無天子之尊秦不彊齊不霸矣伏見陳州刺史邕剛毅忠烈難不苟免往者折二張之角挫韋氏之鋒雖身受謫屈而姦謀沮解卽邕有功於國且邕所能者拯孤恤窮救乏賜患家無私聚今

江都縣志

卷之三十一 藝文上

六

坐賊下吏死在旦夕臣聞生無益於國者不若殺身以明賢臣願以六尺之軀膏鈇鉞以代邕死臣與邕生平不欵曲臣知有邕邕不知有臣臣不逮邕明矣夫知賢而舉仁也任人之患義也獲二善以死臣又何求伏惟陛下寬邕之死使率德改行與林父曲逆之功臣得瞑目附禽息北郭之迹大願畢矣惟明主圖之臣聞士爲知己者死臣不爲死者所知而甘之死者非特惜邕賢亦能助陛下令能之慈

附李邕妻温氏請夫戍邊自贖表邕少習文章疾惡如讐不容

於衆邪佞切齒諸儒側目頻謫遠郡削跡朝端不啻十載歲時歎戀聞者傷懷屬國家有事泰山法駕旋路邕獻牛酒例蒙恩私妾聞正人用則佞人憂邕之禍端故自此始且邕比任外官卒無一毀天意暫顧罪過旋生

諺云土無賢不肖入朝見嫉惟陛下明察邕初蒙訊責便繫牢戶水不入口者踰五日氣息奄奄惟吏是聽事生吏口殖邕手書貸人蠶種以為枉法市羅貢奉指為姦賊於時既使朝堂守捉嚴固號天訴地誰肯為聞泣血去國投骨荒裔永無還期妾願使邕得充一卒效力王事膏塗朔邊骨糞沙壤成邕夙心

請令商人入錢以通淮南鹽疏畧

宋

王

隨

子正河南

淮南鹽初甚善自通秦楚運至徽州自徽州運至江浙荆湖綱吏舟卒浸盜販鬻雜以砂土殆不可食吏卒坐鞭笞配徙而莫能止兼運河淺涸漕輓不行遠州村民頓乏鹽食而淮南所積一千五百萬石無屋以貯則露積苦覆歲以損耗亭戶輸鹽應得本錢或無以給貧困

江都縣志

卷之三十一

藝文上

七

為盜願權聽通商三五年使商人入錢京師置折博務於揚州使輸錢及粟帛計直予鹽鹽一石約受錢二千則一千五百萬石可得緡錢三千萬以資國用一利也江湖遠近皆食白鹽二利也歲罷漕運糜費風水覆溺三利也昔漕鹽舟可移以漕米四利也商人入錢可取以償亭戶五利也贍國濟民無出於此

議弛鹽禁疏畧

范仲淹

希文蘇州

稅之入但分減商賈之利耳行於商賈未甚有害也今國用未減歲入不可闕既不取之於山澤及商賈須取之於農與其害農孰若取之於商賈為今計莫若先

省國用國用有餘當先寬賦役然後及商賈弛禁非所先也

論救賑江淮饑民劄子

歐陽修

臣伏見近出內庫金帛賜陝西以救饑民風聞江淮以南今春大旱至有井泉枯竭牛畜病死雞犬不存之處九農失業民庶嗷嗷然未聞朝廷有所存卹陛下至仁至聖愛民愛物之心無所不至但患遠方疾苦未達天聰苟有所聞必須留意下民疾苦臣職當言且江淮之間去年王倫蹂踐之後人戶不安生業倫賊殄滅瘡痍未復而繼以飛蝗自秋至春三時亢旱今東作已動而

雨澤未霑此月不雨則終年無望又加近年以來省司屢令南方歛率錢貫而轉運使等多方刻剝以貢羨餘江淮之民上被天災下苦賊盜內應省司之重歛外遭運使之誅求比於他方被苦尤甚今若不加存卹將來繼以凶荒則饑民之與疲怨者相呼而起其患不比王倫等偶然狂叛之賊也臣以爲民怨已久民疲可哀因其甚困宜速加惠不惟消弭盜賊之患兼可以悅其疲怨之心伏望聖慈特遣一二使臣分詣江淮名山祈禱雨澤仍下轉運并州縣各令具逐處亢旱次第奏聞及一面多方擘畫賑濟窮民無至失時以生後患取進止

乞免追理揚州積欠疏畧

蘇軾

方今民荷寬政無他疾苦但爲積欠所壓臣檢察本州積欠一曰敗闕塲務二曰元祐二年大赦已前欠負蠶鹽和買青苗錢物三曰買撲塲務少欠課利估納抵產入官四曰元祐元年登極赦書見欠丁口鹽錢及博絹米和預買絹等五曰欠市易錢六曰諸色欠負並乞依元祐赦住催理內人戶拖欠兩稅非災傷倚閣者亦分二年作四料送納未足而遇災傷者々許住理六月

乞合揚州稅務免收糧綱稅錢奏畧

本州糧綱稅錢每歲不過收錢一千六百貫淮南一路江都縣志

卷之三十一 藝文上

十九

言之真揚高郵楚泗六州所得不過萬緡而所在稅務專攔因金部轉運司許令點檢邀難乞取十倍於官遂至綱梢皆窮困骨立亦無復富商大賈肯以貨物委令擔載專仰攘取官米無復限量是金部與轉運司違例刻剝得糧綱稅錢一萬而令朝廷失陷綱運米三十餘萬石今若依編勅施行不惟綱米可免欠折而商賈全集於京師回路物貨無由復入空綱攬載所獲商稅必倍矣

辯倉法劄子

臣竊謂倉法者一時權宜指揮天下之所駭古今之所

無聖代之猛政也自陛下卽位首寬此法但其間有要
刺之司胥吏仰重祿爲生者朝廷不欲遽奪其請受故
且因循至今蓋不得已而存留非謂此猛政可恃而爲
治也自有刑罰已來皆稱罪立法譬之權衡輕重相報
未有百姓造銖兩之罪而人主報以鈞石之刑也今倉
法不滿百錢入徒滿十貫刺配沙門島豈非以鈞石報
銖兩乎天道報應不可欺罔當非社稷之利凡爲臣子
皆當爲陛下重惜此事豈可以小小利害而輕爲之哉
臣竊見倉法已罷者如轉運提刑司人吏之類近日稍
稍復行若監司得人胥吏誰敢作過若不得人雖行軍

令作過愈甚今執政不留意於選擇監司而獨行倉法
是謂此法可恃以爲治也耶今者又令真揚楚泗轉般
倉斛子行倉法網運敗壞執政終不肯選擇一強明發
運使以辦集其事但信倉部小吏妄有陳情便行倉法
臣所未喻也今來所奏只是申明元祐編勅不過歲捐
轉運司違法所收糧綱稅錢一萬貫而能六百萬石上
供斛斛不大失陷又能全活六路綱梢數千牽駕兵士
數萬人免陷深刑而押綱人員使臣數百人保全身計
以至商賈通行京師富庶事理明甚無可疑者但恐執
政不樂臣以疎外輒議已行之政必須却送戶部或却

令本路鹽司相度多方沮難決無行理臣材術短淺老病日侵常恐大恩不報銜恨入地故貪及未死之間時進瞽言但可以上益聖德下濟蒼生者臣雖以此得罪萬死無悔若陛下以臣言爲是卽乞將此劄子留中省覽特發德音主張施行若以臣言爲妄卽乞并此劄子降出議臣之罪取進止

議收買浮鹽疏畧

朱 熠

鹽之爲利博矣以蜀廣浙數路言之皆不及淮額之半蓋以斥鹵彌望可以供煎烹蘆葦阜繁可以備燔燎故環海有亭戶有鍋戶有正鹽有浮鹽正鹽出於亭戶歸

江都縣志

卷之三十一

藝文上

三

之公上浮鹽出於鍋戶鬻之商販正鹽居其四浮鹽居其一端平初朝廷不欲使浮鹽之利散而歸下於是分置十局以收買浮鹽十數年來鈔法屢更公私俱困徵揚通泰四州六十五萬袋之正鹽視昔猶不及尚何暇爲浮鹽計卽是以貪墨無恥之士大夫知朝廷住買浮鹽壟斷籠利纍纍竈戶列處沙洲日借銖兩之鹽以延旦夕之命今商賈旣不得私販朝廷又不與收買則是絕其衣食之源矣爲今之計莫若遵端平之舊式收鍋戶之浮鹽所給鹽本當過於正鹽之價則人皆與爲市却以此鹽售於上江所得鹽息徑輸朝廷一則可以絕

戎闖爭利之風二則可以續鍋戶烹煎之利

乞罷揚州貢薑奏畧

李及為幾鄭州

揚州進貢第二限糟薑赴六尚貢奉庫今六尚局已廢所進非祖宗朝貢額乞止絕諸路如有似此果木口味之類非祖宗原額乞降指揮更不起發

論車駕不可久駐維揚疏畧

張浚德遠綿竹

近日軍民論議紛然彼得借口為說者蓋二帝遠在沙漠而陛下乃與六宮端居於此何怪人之竊議願明降睿旨以車駕不為久駐維揚之計曉諭軍民仍乞朝廷先措六宮定居之地然後陛下以一身巡幸四方規恢江都縣志

卷之三十一 藝文上

三

遠圖

論措置兩淮屯田疏畧

陳俊卿應求莆田

兩淮備禦未設民無固志萬一寇至倉猝戍兵恐不及事請於揚州和州各屯三萬人預為守計仍籍民家三丁者取其一以為義兵授之弓弩教以戰陣農隙之日給以兩月之食聚而教之沿江諸郡亦用其法諸將渡江則使之城守以備緩急且以陰制州兵頡頏之患其兩淮諸郡守臣但當擇才不當復論文武計資歷捐以財賦許辟官吏畧其小過責其成功要使大兵屯要害必爭之地待敵至而決戰使民兵各守其城相為犄角

以壯聲勢

請展免上供米麥等錢及放免二稅奏

鼂公武

水路節次承准指揮將人戶稅賦已展免其合發上供諸色窠名等錢斛亦蒙朝廷節次全行放免至乾道六年分上供錢緜進奉天申節銀大豐銀絹等并經總制等窠名錢承堅指揮以三分爲率起發存留二分應付本州衮同係省支遣其餘銀物斛斗隨稅色放免所有乾道七年分合發前項上供諸色窠名錢物斛斗若是全行起發委是椿辦不前兼管屬江都泰興人戶今年江都縣志 卷之三十一 藝文上 三 所種稻麥各是蟲傷旱澇及遭疫死耕牛稍多若自乾道七年夏料爲頭起理人戶二稅委是難以輸納竊恐未稱朝廷寬卹之意望許令本州且依遞年體例將合發上件錢進奉聖節銀等土貢物色坊場等錢以三分爲率蠲免二分仍舊起發一分外其餘合發年額上供米麥等錢乞賜全令展免應付本州衮同係省支遣及二稅亦乞放免三二年底庶幾少寬民力使荒殘州郡少可支吾

議復徽州瓜洲海陵北神等壩奏畧

向子諲 伯恭
臨江

運河高江淮數丈自江至淮凡數百里人力難濟昔唐李吉甫廢牐置堰治陂塘泄有餘防不足漕運通流發運使曾孝蘊嚴三日一起之制復作歸水澳惜水如金比年行直達之法走茶鹽之利且應奏權倖朝夕經由或啟或閉不暇歸水又頃毀朝宗牐自洪澤至邵伯數百里不爲之節故山陽上下不通欲救其弊宜於真州太子港作一壩以復懷子河故道於瓜洲河口作一壩以復龍舟堰於海陵河口作一壩以復茱萸待賢堰使諸塘水不爲瓜洲真泰三河所分於北神相近作一壩權閉滿浦牐復朝宗牐則上下無壅矣

江都縣志

卷之三十一

藝文上

十四

兩淮備預疏畧

汪

綱

黟縣

淮地自號財賦淵藪西有鐵冶東富穰稻足以自給淮右多山淮左多水足以自固誠能合兩淮爲一家兵財通融聲勢合一雖不假江浙之力可也祖宗盛時邊郡所儲足支十年慶厯間中山一鎮尚百八十萬石今宜上法先朝令商旅入粟近塞而算請錢貨於京師入粟拜爵守之以信則輸者必多邊儲不患不豐州郡禁兵本非供役乃就糧外郡耳今不爲戰鬪用乃使之供力役緩急戍守專倚大軍指日待更不諳風土豈若士兵生長邊地墳墓室家人自爲守耶當精擇伉壯廣其

尺籍悉隸御前軍額分擘券結以助州郡衣糧之供又率如山陽武鋒軍制則邊面不必抽江上之戍江上不
必出禁衛之師生養休番勞費俱息

條三邊戰守事宜奏畧

錢之望

揚州有三城三塘楚有大小清河淮東恃此謂扼敵來處足矣敵設乘虛自昭信丁貽抵淮陰不一日薄揚州不二日由滁徵通泰亦徑至江上彼兩路何獨不然陛下可無令韓琦范仲淹者通一路險易孰議之乎且卒饑財匱兵少今日之大患也然而卒欲飽則財愈乏矣財欲無乏則減兵且不暇其何以增耶若兵自耕民自

江都縣志

卷之三十一 藝文上

戰沿江諸軍各擇地分內閑田丁之而民兵外弩手用一法給器械較精惰畧計可十五萬與屯田大兵相參此三路之郭郭也昔韓世忠在鎮江張浚在建康淮東西便爲屯分大儀天長昭關柘臯敵來則戰豈有定所三衙助之所向克捷近諸郡修城築堡遣兵更戍犬牙占認尺寸之外胡越自分如是則誰肯出力會戰於要害之地耶臣觀諸軍氣習今昔頓殊昔欲戰不欲守今言守不言戰馴致疲懦十年之外雖守不能矣陛下幸詔諸將復紹興屯名使如世忠浚輩苦戰立勳庶幾無令消磨坐視相盡

復修揚州境內水利奏畧

明王恕宗貫二原

看得揚州一帶河道南臨大江北抵長淮別無源泉止藉高郵邵伯等湖所積雨水接濟湖身雖與湖面相等而河身比之湖面頗高每遇乾旱湖水消耗則河水輒至淺澁不可行舟若將河身比湖面濬深三尺則雖乾旱亦不阻行前項河道自南至北四百五十餘里中間除深濶外其淺窄可挑濬去處尚有二百餘里約用九萬餘土每人日給口糧二升該用糧米一十萬八千餘石及看得高郵湖自杭家嘴至張家溝南北三十餘里俱係輓砌隄岸每遇西風大作波濤洶湧損壞支漂

江都縣志

卷之三十一

藝文上

三

溺錢糧人命不可勝紀况前項隄岸之外地勢頗低再濬三尺濶一十二丈起土以爲外隄就將內隄原有減水牖三座改作通水橋洞接引湖水於內行舟仍於外隄造淺水牖三座以節水利雖遇風濤可無前患若興此役約用一萬三千餘工可完每人日給口糧二升該用糧米一萬五千六百餘石合用築隄椿木五萬四千餘根草二十三萬餘束造減水牖并改造通水橋洞約用磚石椿木等料并工價銀二百餘兩又看得揚州灣頭鎮迤東河道內通通泰等四州縣二千戶所富安等二十四鹽場其間有魚鹽柴草之利在前河道疏通之

時二千戶所運糧船隻俱在本所修艫客引商鹽裝至儀徵每引船錢不過用銀四五分揚州柴草每束止賣銅錢二三文近年以來河道淤淺不曾挑撈加以天寒雨少河水乾斷舟楫不通魚鹽柴米等項俱用旱車裝載二所運糧船隻不得回還本所牛車脚價迥貴柴米價高以致客商失陷本錢軍民難以遣日前頭河道自灣頭起至通州白蒲止三百四十餘里俱用挑濶八丈深三尺約用八萬五千六百餘工可完每人日給口糧二升該用糧米十萬二千七百九十餘石再看得雷公上下塘句城塘陳公塘俱係漢唐以來古蹟各有放水江都縣志

卷之三十一 藝文上

七

攔水牐座年久坍塌遺址見存近年以來止是打築土壩攔水隨修隨坍不能蓄積水利若每塘修造板牐一座減水牐二座潦則減水不至衝決塘岸旱則放水得以接濟運河以上四塘共造放水板牐四座減水牐八座除舊有磚石外約用磚石椿木等料價值并匠作工銀二千餘兩雜工止用各塘見在人夫不必勞民動衆臣雖嘗詢之於衆咸以謂若將此三件河道依前整理庶幾舟楫疏通永無淺阻風濤之患而爲往來軍民無窮之利

請革鳳米收兌之弊疏

國朝

李宗孔

書雲
江都

題爲敬陳鳳米收兌之弊實爲兵民大害請乞亟行改
革以免兵民交困事臣查江南廬鳳淮揚四府州縣有
鳳米一項設立戶部徵收原故明時爲守鳳陽陵寢之
兵而設也我

聖朝

龍興守陵之兵久已裁汰其鳳米改作兵米目應各府

兵丁就便領放乃鳳陽留守衛運軍行月二糧仍照舊

設立監督司官駐劄鳳陽徵收其他府州縣徵解鳳米

臣不具論如江都縣每年額徵鳳米五千餘石解鳳倉

二千一百三十八石解淮倉二千八百餘石其支給揚

營狼山各營官兵之米俱在此內鳳陽距江都陸路五

江都縣志

卷之三十一

藝文上

三

百里而遙水路由洪澤太湖將及千里解米負役無論
有湖河風濤之險而每鳳米一石則水脚銀四錢六分
耗米加二是鳳米一項歲費民力千有餘金不止其解
淮倉米每石水脚銀二錢四分耗米加一淮安距江都
水路三百里而遙是淮米一項歲費民亦千金不止此
皆僱船僱夫交兌使費而催米驗米守候批廻之費尚
不計焉及支給兵米如狼山營距淮安則八百餘里距
鳳陽則八九百里官兵領米又費往來脚價盤費領米
一石實惠不得五斗是此項鳳米竭民之力領之兩倉
民多解米之費兵有領米之苦兵民交困江都一縣如

此其他府州縣可知矣向來議格而不行者以上下衙門戀戀於陋規使費而不能舍也今幸

皇上簡用總漕弊絕風清正在此時伏乞

皇上勅下總漕從長計算合無將揚屬鳳米儘兌揚州各營就近官兵淮安鳳米儘兌淮安各營就近官兵廬州亦然其鳳屬鳳米儘給運軍行月二糧其四府之米儘兌官兵運軍外所餘之米亦無幾矣應改折色或兌本處兵餉或解藩庫支銷如此則地方民無煩費兵得實米夙弊永革咸頌

皇仁無既矣抑

臣

更有請者徐德臨各倉其間軍民交困

臣

江都縣志

卷之三十一

藝文上

五

之所聞亦多類此

勅督漕撫諸臣悉心釐正所關非淺也

請復行薦舉疏

題爲薦舉必不可停事竊惟

國家之大政莫過於用人用人之道不外乎賞罰薦舉者賞也糾叅者罰也賞罰均平而治道成此歷代相沿之成規

世祖皇帝臨馭中外一十八載及我

皇上登極以來未之有改因康熙元年奉有停止京察大計行考滿之

上諭臺臣張吉午條陳以見行考滿之法辦事一二等稱職者卽係薦舉本屬一事此外又有薦舉未免多立名色故部院議將薦舉之例槩行停止彼時薦舉雖停而考滿一二等之法具在內外大小衙門仍照一體以擢用賢能後因康熙四年原任御史季振宜請罷考滿之議行以致考滿一二等之例旣經停止而薦舉之法因循未復督撫止得以行其糾參用人大典遂於是乎有罰而無賞有懲而無勸矣而不知事有斷斷不可者臣謹約畧其流弊有八爲

皇上陳之夫人情不爲名則爲利縱政比龔黃若無表揚不

若於身家爲得計短廉潔之氣長貪婪之風不可一也又舊例外官陞轉以有薦者先陞其督撫薦舉不當部院得而議之科道得而糾之今漫無可否如前自知州陞戶部員外朱國棟其人甚庸不堪皆得挨俸陞轉督撫得以卸責不可二也爵祿所以待英才挨序較俸賢愚混進人人望陞以致內外仕途日見壅滯不可三也又薦舉之法行各官應較俸者可屈指而數今陞一官而槩查數百官之俸舍簡而就繁滋吏胥之弊不可四也吏部原爲進退人才衙門如止序俸則按冊布算優爲之矣所稱銓衡銓鑒何在哉不可五也夫今日之章

奏卽垂後日之史冊自康熙四年以來見之章奏者止有貪酷不肖之官而並不聞清廉稱職之官近不足風動下僚遠無以昭示來茲不可六也緝獲逃人不論俸滿卽陞以其能也不過近京一二省而已其遠省逃人少者遂不得沾超陞之典陞遷偏枯政令不公普於天下不可七也完舊欠二萬以上者超擢催科有效矣廼愛養百姓者槩置不問撫字無靈何以申明

朝廷之德意不可八也

臣

前待罪臺班曾具有旣停外官考

滿宜嚴督撫舉核一疏頃遵

諭旨陳言諸臣亦多言及於此廼部議仍執臺臣張吉午薦

江都縣志

卷之三十一

藝文上

三

舉宜停之前疏不復置議吉午條議之本具在可覆而閱也彼時無考滿一二等者彼肯云停薦舉乎部院之覆疏亦具在彼時無考滿一二等之法誰復准其所議乎前者考滿一二等所以代薦舉者也夫初因停止京察大計而行考滿繼因考滿而罷薦舉今京察大計旣皆復舊考滿一二等又經停止則薦舉之法亦宜復舊此一定之理也夫部議之不復薦舉者不過慮有鑽營賄囑情弊耳臣謂薦舉之當否視乎督撫之賢不肖其督撫之賢者所薦舉自然皆賢自無賄囑情弊督撫雖係不肖其薦舉亦必慎重不肯以大不堪之人貽自己

事後之累今薦舉無例而叅劾有權免叅一項鑽營賄
囑無所不至甚於薦舉若薦舉之法不復是使督撫之
不肖者得以免叅喝詐挾下吏之金錢而督撫之賢者
不得以薦舉循良昭勸揚之盛典切以爲未便也伏乞
勅部詳加酌議查照舊例舉行毋使勞吏從前功績一筆抹
殺仍令督撫有舉有劾表揚廉吏銓法清而官方肅端
在乎此夫唐用裴光庭爲吏部無問能否限年躡級庸
愚沉滯者皆喜謂之聖書才俊之士無不怨嗟載之史
書昭然可鑒聖人曰舉善而教不能則勸又曰舉直錯
諸枉能使枉者直治天下而外聖人之法另立法程臣
江都縣志

卷之三十一

藝文上

三

不知其可也

請急救饑民疏

題爲淮揚關係重地饑民萬苦堪憐仰祈

皇上亟救以全民命事竊照去歲淮揚兩府水災滔天漫地
高寶興鹽江安山桃等處十一州縣之民田地陸沈房
屋倒塌牛畜種糧飄浮父子兄弟夫妻兒女死於洪波
巨浪者不下幾千百人而無衣無食露處江干號泣之
聲震動天地荷蒙

工洪恩特發帑金特遣部臣親詣賑濟比時饑民滿野部
臣殫心設法百計周詳方得雨露均沾此以在

皇上離照中矣又蒙

特諭破格蠲漕例外免糧

皇上留心饑民所謂仁至而義盡矣然此皆去年八九十月一月間事也間去歲十二月內淮揚大雪連陰三十餘日嚴寒積冰饑民數萬屯住揚州四郊寺觀或搭蓆篷或借小船沿河居住雖督撫漕鹽諸臣勸諭商民賑粥施衣而雪久寒深凍餓死者一日之內少者數十多者百餘一月之內死無數矣饑民攜兒挈女鳩形鵠面百結鶉衣行乞城野四鄉內外結聚成羣如高郵州凌塘江都邵伯鎮淮安之平湖橋沿門強求在在有之地方江都縣志

卷之三十一

藝文上

三

驅之不可散之無術見之甚可憐也思之亦甚可憂也夫淮揚爲南北咽喉鹽漕重地

臣

中夜思維凡人一日

不食則饑三日不食則死一切措設籌畫皆屬緩不及事所救急者惟有仍行賑粥之一法耳仰祈

皇恩大沛

勅部將就近鹽課三四萬兩買米若干石再加捐募於四五六七等月仍令地方官照舊賑粥或散銀散米酌從其便庶爲生全數萬之急着不屬紙上之空談其次莫若召募饑民之壯者以做河工工銀每日六分儘足資生而河臣急竣大工恐饑民星散一時召募愆期未蒙允

行臣思派夫與募夫偏廢則不可兼行則有益今沿河州縣在在饑民就便召募誠爲益事但恐督率無人倘令管河各官有能召募督率千人者作何加級紀錄督率萬人者作何加級紀錄其事如反掌耳俾饑民早得一日之銀米

朝廷便省一日之賑饑召募之夫有一萬則外省外府僉派之夫少一萬遠者不致離家失業近者得以免死就生一舉而數善備矣又被災州縣數稱澤國今田地房屋樹木牛隻種種器用物件皆以全付波臣目今一望洪濤尚無涯際決口未塞水退無期卽計田可耕尚在一江都縣志

卷之三十一

藝文上

三

二年之後則安插之道刻不容緩或責成督撫查廬鳳盱泗無主荒田照四川招民耕種之例以仕途卽陞之階開殘黎活命之路此又不費國帑金錢使數萬饑民有田可耕有家可住矣目前權宜之安頓實爲此後保全之良圖舍此不講則此數萬饑民不爲盜賊卽填溝壑矣此必我

皇上之所大不忍也

請清釐關蠹疏

鄭爲光

晦中江都

題爲直陳關蠹之害事近奉

上諭各部關差俱議裁併仰見

皇上恤商至意但不清釐關蠹之弊而徒停止差遣之官無益也臣查商賈過關納稅原有定例凡民間米麥柴草日用土產不得起稅欽奉

嚴旨已久今各關書吏有投單掛號直日小票等名色其缺雖奉裁仍有頂首皆係各府州縣積蠹營充其中坐收常例數倍公帑至於攢典之設更爲可異前戶部有援納事例不過納銀十五兩本地光棍坐名納某地攢典任意擇肥初無定數有一處而數攢典候缺朋居爲害盤踞鄉鎮隘口幫帶多人以稽查鈔稅爲名雖已稅之船不妨抽分船不過關勒令納稅本地食米魚蝦柴草

江都縣志

卷之三十一 藝文上

三

無不違禁私徵甚至陸路往來乘騾挑擔之人橫索恣取稍不遂意誣以漏稅小致喪本大致傾家是以商賈屏跡民不聊生他不具論臣於去年八月從水路入京候補親見淮安三關之外又有白洋河宿遷夏鎮等處皆有戶部工部抽稅黃旗委官設立公座大小船隻少則數錢大則數兩無一免者又如揚州鈔關一線運河至邵伯鎮不過四十里其間楊子橋西門北來寺芒稻河仙女廟邵伯鎮每處皆有攢典設立公座爪牙多人私徵橫取有一年而起貲千餘金者則是四十里之內添設數關矣仍有各鄉鎮設立攢典查稅等害不一而

足臣思關差奉裁各蠹必仍戀歸併衙門科歛手滑害商如故伏乞

皇上勅部酌議關差既併關蠹宜清其各關一切書吏攢典等役盡行裁革不許復入歸併衙門况所併之處自有衙役不過供書寫奔走毋煩羣蠹又攘臂而側足以滋商害仰負我

皇上恤商之至意也

請禁額外賦稅疏

許承宣

力臣江都

題爲請禁賦外之賦差外之差關外之關稅外之稅以蘇農困以拯商病事竊惟天下之大無踰四民民之雋江都縣志

卷之三十一

藝文上

三

秀者爲士士僅處什之一耳而農與商賈則大半天下農有田則有賦有賦則有差商賈有貨則設關以稽之設稅以斂之此自古以來之常法聖主所不廢也而今日之農不苦於賦而苦於賦外之賦不苦於差而苦於差外之差何謂賦外之賦卽如江南揚州府屬

國家正賦每畝二錢四分五釐零田有高下約數畝折一畝每畝納銀不過四五分其取之民者固有定例矣今也不然船廠砲廠須用鐵則賦築河堤須用夯木則賦决口捲埽須用稻草則賦下椿須用柳則賦紮埽須用白蔴則賦夫民以其土之所有爲上用猶易辦耳若採

鐵於不出鐵之鄉責蘇於不產蘇之地早曠草枯水澇木壞徒肆苛索祇費緡錢或倍價以相鬻或乾折以倖免歲凡數供追呼不息此苦於賦外之賦也何謂差外之差

國家賦役全書定爲經制是賦之中已兼有役今臣見揚

州府江都縣每歲一里貼淺夫工食銀二十四兩則田已役其二矣頃河流潰決復按畝起夫則田已役其三矣挑河夫之外又有幫工夫則田已役其四矣四役之不已而又有所謂莊差莊差者取之耕田之窮農也農夫代人出力以耕田其所耕之田卽里地起差之田也

江都縣志

卷之三十一

藝文上

三

在里地起差者此田今起莊差者亦此田卽令田係農夫所自有而田亦在里地起差之內若更加以莊差不一田而二差也哉自莊差之名一設則有供土船之害有供籬土土基之害有供車輛之害賣妻鬻女尚不足以應其求剝髓捉筋惟恐不獲終其役嗟此疲勞苦瘁之民卽我

皇上捐振啜哺之民也差一及身進無以邀廩餼退不能就粥糜有轉死溝壑已耳此苦於差外之差也今日之商賈不苦於關而苦於關外之關不苦於稅而苦於稅外之稅何謂關外之關

國家設關通天下凡十三處皆相隔三四百里然後有二關所以明禁網疎闊不欲多爲之制以妨商旅也又定例船不抵關貨不抽稅料亦如之自有攢典之設而各踞口隘橫行村落處處皆關則處處有稅與料矣順治十八年臺臣鄭爲光具疏極陳攢典之害奉

旨裁革然攢典之名去而攢典之實猶存監督諸臣借查稅名色私用家人及書役散布各方重抽稅料夫果在通江濱海之處扼守隘口猶可也已非

朝廷務存寬大不尚煩苛之意况近數十里間又無旁港支

河而可多設私人以滋擾害乎卽如揚有揚關淮有淮江都縣志

卷之三十一 藝文上

三

關其中一線漕堤有何滲漏而於邵伯一鎮必又加攔阻夫邵伯乃商賈卸載之地自南而北者揚關稅之自北而南者淮關稅之已稅之貨已稅之船則可聽其所之矣而所以攔阻者將禁其不入內地乎將令其騰聚一隅而不散而之州縣乎無非留難措索重重剝徵是咫尺不百里之關而再稅也近聞濬壘關於無錫地方亦私立老人關置設水柵攔截河干又用兩櫓快船遍歷鄉村晝夜巡邏遇物索詐稍不遂意捏指漏稅報官其他賄聞所不及者何可殫述商賈舉足羅網移步觸禁莫施徵貴徵賤之智徒厪左顧右顧之憂風雨停櫂

而傷心衣囊質錢以輸稅此苦於關外之關也何謂稅外之稅

國家立關有稅貨之關有抽料之關大小各有定制輕重悉載成書順治二年奉

旨凡民間米麥稅課槩行禁革今則農船小艇一米一豆莫不徵稅甚至鄉民驢背肩挑不免悉索又有貨本無多而所稅之數反過其本數倍至願棄其貨以逃而不可得此甚可憫也若船料各關不同如揚州關滿料不過二兩六錢七分許墅關滿料不過十兩五錢今正數一倍納至四五倍而於正數之外又名曰加倉一倉至十江都縣志

卷之三十一

藝文上

三

倉聽其增益莫敢誰何夫船料則固有經制矣加倉之說何自來也且旣稅船則不稅貨而又有落地之稅有寄鈔之稅是兼船與貨而兩稅之此苦於稅外之稅也伏讀康熙十八年十二月

恩詔一欸各處關差將不應納稅之物額外橫徵差役四出把守關隘擾害商民者該部嚴行察禁一有發覺從重治罪仰見

聖慮淵微無遐不矚又屢經部議凡濫派小民錢糧差徭俱有處分卽督撫亦曾行文申飭不啻再三而積習難破病竇日深若非

天語重申何能諸弊悉革伏乞

勅下督撫嚴飭各府州縣及各關監督務使賦外之賦差外之差關外之關稅外之稅槩行禁止勒石立碑於通衢縱不能盡繩已往猶可永戒將來庶農民無困弊之憂商旅有貿易之便矣

請立分項之法以興人才疏

鄭爲旭

方旦江都

爲選法之壅滯已甚進士之補授無期請立分項之法以興人才事竊惟銓衡之政以天下之人才任

國家之事務所當使之茅茹登進不致有淹遲之嘆者也自題補之例行在部候選之人不得補授而選法壅矣

江都縣志

卷之三十一

藝文上

四

及捐納之例開正途循次之人不得補授而選法又壅矣今應選知縣之進士舉人教習等項已積至一千餘人而進士科分在後者又壓於舉人貢生捐納等項之後雖名登部籍而選用無期淹滯亦已甚也伏思

朝廷開科取士棘闈之典何等隆重歷經考試掄選而始得成進士其取之旣極其慎重而用之豈宜等於尋常在舉人一項固同係科目出身但進士又係舉人內選取之人較有差別至於別項尤不可同論今科分在後之進士反未得與舉人貢生及捐納之人同沾一命之榮將從前旁求慎選之意不幾徒然乎且天下之人才惟

在及鋒而用之若此甲科選取之人砥礪濯磨亦既有年而未得早膺民社之寄將才猷莫展而志氣漸衰良可惜也我

上孜孜圖治加意用人宏才碩彥應運而起振興淹抑莫此爲急臣請嗣後大選知縣於應選之內另立分項之法將進士爲一項舉人貢生教習等應選之人爲一項於應得之缺接算均分選授俾進士一項不致屈抑於各途之後然後釋褐筮仕之人頗有疏通之路而草茅誦讀之士咸生踴躍之志矣

請停供鮓魚疏

代

余孔瑞

江都縣志

卷之三十一

藝文上

望

爲欽奉

上諭事康熙二十二年三月初二日接奉部文安設塘撥飛遞鮓鮮恭進

上御值臣代攝驛篆敢不殫心料理隨於初四日星馳蒙陰沂水等處挑選健馬準備飛遞伏思

皇上勞心焦思廓清中外正當飲食宴樂頤養天和一鮓之味何關重輕臣竊謂鮓非難供而鮓之性難供鮓字從時惟四月則有交時則無諸魚水養可生此魚出網卽息他魚生息可餐此魚味變極惡因藜藿貧民肉食艱難傳爲異味若

天厨珍膳滋味萬品何取一魚竊計鱒產於江南之楊子江達於京師二千五百餘里進貢之員每三十里立一塘豎立旗杆日則懸旌夜則懸燈通計備馬三千餘匹夫數千人東省山路崎嶇臣見州縣各官督率人夫運木治橋剗石治路晝夜奔忙惟恐一時馬蹶致干重譴且天氣炎熱鱒性不能久延正孔子所謂魚餒不食之時也伏念我

皇上聖德如天豈肯以口腹之故罪責臣民而臣下奉法惟謹故一聞進貢鱒魚凡此二三千里地當孔道之官民實有晝夜恐懼不甯者臣以疎遠外吏何敢冒瀆

江都縣志

卷之三十一

藝文上

聖

聖聰

臣

伏讀律令百官技藝之人應有可言之事亦許奏

聞况

臣

一介庸儒荷蒙

聖恩官至參議日覩三省官民止爲膳饑一物驚惶勞疲官廢職事民廢耕耘若不據實敷陳不忠之罪何以自道故敢冒昧越陳伏乞

皇上廣如天之仁下

詔停止不但傳之史冊流芳千古而三省之官民數千之夫役咸祝

聖壽於無疆矣謹疏奉

旨永免進供

賦

江賦

晉郭璞

璞

景純河東

咨五才之並用實水德之靈長惟岷山之導江初發源
 平濫觴聿經始於洛沫攏萬川乎巴梁衝巫峽以迅激
 躋江津而起漲極宏量而海運狀滔天以淼茫總括漢
 泗兼包淮湘并吞沅澧汲引沮漳源二分於岨嶮流九
 派乎潯陽鼓洪濤於赤岸淪餘波乎柴桑網絡羣流商
 摧涓澮表神委於江都混流宗而東會注五湖以漫莽
 灌三江而瀚沛瀉汗六州之域經營炎景之外所以作
 限於華裔壯天地之嶮介呼吸萬里吐納靈潮自然往

江都縣志

卷之三十一

藝文上

三

復或夕或朝激逸勢以前驅乃鼓怒而作濤峨帽為泉
 陽之揭玉壘作東別之標衡霍磊落以連鎮巫盧魄岷
 而比嶠協靈通氣瀆薄相陶流風蒸雷騰虹揚霄出信
 陽而長邁淙大壑與沃焦若乃巴東之峽夏后疏鑿絕
 岸萬丈壁立赧駁虎牙巖豎以屹崒荆門闕竦而盤礴
 圓淵九廻以懸騰溢流雷响而電激駭浪暴灑驚波飛
 薄迅復增澆涌湍叠躍砢巖鼓作崩濤舉潯渠瀆灑激
 潰瀆波瀾瀉滉忽泱澹澗瀾淪漩環滎滢浪瀾瀆瀑洩
 減澁瀆龍鱗結絡碧紗遺漣而往來巨石碑砢以前却
 潛演之所汨澗奔溜之所碇錯厓廉為之泐嶮碕嶺為

之崑崙幽澗積岨巖砢礧礧若乃曾潭之府靈湖之淵
澄澹汪洸瀟澗困泣泫泫洞滢潏鄰圓潏混潏灑渙流
映揚焜溟潏沙洒汗汗泅泅察之無象尋之無邊氣滃
渤以霧杳時鬱律其如烟類胚渾之未凝象太極之構
天長波浹渌峻湍崔嵬盤渦谷轉凌濤山頽陽侯破礧
以岸起洪瀾澗演而雲迴塗淪滾滾乍泄乍堆激如地
裂豁若天開觸曲厓以縈繞駭崩浪而相礧鼓唇窟以
崩渤乃溢湧而駕隈魚則江豚海豨叔鮪王鱣鮠鯨鯨
鮠鯨鯨鯨或鹿駘象鼻或虎狀龍顏鱗甲錯錯煥爛
錦斑揚鬣掉尾噴浪飛颯排流呼哈隨波遊延或爆采

以晃淵或嚇鯁乎巖間介鯨乘濤以出入鰲鯨順時而
往還爾其水物怪錯則有潛鵠魚牛虎蛟鉤蛇輪轉鱉
蝟鱗鼉鼉王珧海月土肉石華三蝦蚌江鸚螺蛭蝸
瓊蚌腹蟹水母目蝦紫虻如渠洪蚶專車瓊蚌晞曜以
瑩珠石蚌應節而揚葩蜃蟪森衰以垂翹玄蠃魄礧而
礧礧或泛漱於潮汐或混淪乎泥沙若乃龍鯉一角奇
鶴九頭有鼈三尺有龜六眸頰螫肺躍而吐幾文魮聲
鳴以孕璆倏蠖拂翼而掣耀神蜃蠃輪以沈遊駢馬騰
波以噓蹠水兕雷咆乎陽侯淵客築室於巖底鮫人構
館於懸流雹布餘糧星離沙鏡青綸競糾縈組爭映紫

菜熒曠以叢被綠苔鬚髻乎研上石帆蒙籠以蓋嶼萍
實時出而漂泳其下則金礦丹礫雲精燭銀瑤珞璿瑰
水碧潛瑋鳴石列於陽渚浮磬肆乎陰濱或頰彩輕漣
或焞曜崖鄰林無不溽岸無不津其羽族也則有晨鵠
天鷄鵠鷺鷗駮陽鳥爰翔於以元月千類萬聲自相喧
聒濯翮疏風鼓翅翻翮揮弄灑珠拊拂瀑沫集若霞布
散如雲豁產毳積羽往來勃碣檉杞楨薄於潯溪協榷
森嶺而羅峯桃枝篔簹實繁有叢葭蒲雲蔓櫻以蘭紅
揚皜眊擢紫茸蔭潭隩被長江繁蔚芳蘿隱藹水松涯
灌芊蕙潛薈葱龍鮫鱧踦蹶於垠隤獫獫睽矚乎廡空

迅雌臨虛以騁巧孤纓登危而雍容夔牯翹蹠於夕陽
鴛雛弄翮乎山東因岐成渚觸澗開渠漱壑生浦區別
作湖磴之以灩澦渌之以尾閭標之以翠翳泛之以遊
菰播匪藝之芒種挺自然之嘉蔬鱗被菱荷攢布水蔬
翹莖瀟蘩濯穎散裹隨風猗萎與波潭沲流光潛映景
炎霞火其旁則有雲夢雷池彭蠡青草具區洮瀉朱瀝
丹灤極望數百沆瀣晶滌爰有包山洞庭巴陵地道潛
達傍通幽岫窈窕金精玉英瑱其裏瑤珠怪石琅其表
驪蚪穆其址梢雲冠其嶮海童之所巡遊琴高之所靈
矯冰夸倚浪以傲睨江妃舍噸而聯眇撫凌波而鳧躍

吸翠霞而天矯若乃宇宙澄寂八風不翔舟子於是擗
棹涉人於是檣榜漂飛雲運舩惶舳舻相屬萬里連檣
泝洄沿流或漁或商赴交益投幽浪竭南極窮東荒爾
乃霜雰被於清旭覘五兩之動靜長風颺以增扇廣莫
颺而氣整徐而不颺疾而不猛鼓帆迅越趨漲截河凌
波縱施電往杳溟霽如晨霞孤征眇若雲翼絕嶺倏忽
數百千里俄頃飛廉無以踰其蹤渠黃不能企其景於
是蘆人漁子擯落江山衣則羽褐食惟蔬鱸樽澗爲泔
夾漈羅筓笳灑連鋒罨雷比船或揮輪於懸碕或中瀨
而橫旋忽忘夕而宵歸詠採菱以叩舷傲自足於一嘔

尋風波以窮年爾乃域之以盤巖豁之以洞壑疏之以
漣汜鼓之以朝夕川流之所歸奏雲霧之所蒸液珍怪
之所化產傀奇之所窟宅納隱淪之列真挺異人乎精
魄播靈澗於千里越岱宗之觸石及其譎變儵恍符祥
非一動應無方感事而出經紀天地錯綜人術妙不可
盡之於言事不可窮之於筆若乃岷精垂曜於東井陽
侯遜形乎大波奇相得道而宅神乃協靈爽於湘娥駭
黃龍之負舟識伯禹之仰嗟壯荆飛之擒蛟終成氣乎
太阿悍要離之圖慶在中流而推戈悲靈均之任石歎
漁父之權歌想周穆之濟師驅八駿於龍鼉感交甫之

喪珮愍神使之嬰羅煥大塊之流形混萬盡於一科保
不虧而永固稟元氣於靈和考川瀆而妙觀實莫著於
江河

揚州賦

宋王觀通輿如臯

揚州古都會也枕江臂淮與益部號爲天下繁盛故古以來節鎮首稱揚益焉今夫廢興之跡與夫風土人物貢賦井邑之纖悉詳見於傳記可得而考因摭類次第而賦之辭曰

天鬻先生溺意藝文綿目窮年柅蹠蹕之短步鬱遐情
而不宣悵江淮之去來閒走陸而航川徒跋跋而奚補
寄赧色於頽頽睇故國之荒蕪尚氣象之嶮岼思抽毫
而弔歎傷日月之徂遷環中丈人推手而前曰子非無

江都縣志

卷之三十一

藝文上

七

文何爲嗇辭華於一言先生答曰去來於茲十厯春秋
或行役之不遑或疹疾之相嬰有所不暇丈人曰子今
請邑此邦古今之廢興人物之賢愚封域之遐邇土風
之纖微貢賦之所出心詳目熟益已周矣請子賦之吾
將觀焉先生因驅撥冗猥滌慮操觚放肆厥辭嗚呼歎
歎策駟驢以出遊兮歛近郊而驚春芳華冉冉以摧謝
兮俄汎然而點塵稅倦鞅於危岡兮俯樓欄而棲神哀
衰殘之戟日兮發古意之酸辛搜傳記之浩穰兮契口
耳之傳聞稽質乎地誌兮叅諗乎乾文牽牛婺女流爲
揚州南攝乎距海之澣北壓乎長淮之流包有吳越首

建楚周保章辨之以星土之數職方分之以畜產之由
茲惟陶唐置牧十二揚居其中世濟以治夏因商襲九
州以異惟周封建各正其地季末解紐侯國爭利犬羊
用人孰作藩衛嬴秦咄嗟奄有神器煨燼墳籍變亂古
制罷侯爲守郡縣始置昧形勢之孤弱薄恩親於子弟
下更晉漢南北分裂隋繼以興陳室復滅天下始一冠
屨有別易州而郡法制未絕增置太守統以司隸有唐
開府刺史分蒞此牧守郡國先後變更而相異也環中
丈人復曰茲述其槩請道其詳先生曰然執筆而前惟
揚之先在周屬吳魯哀之年城茲邗溝遠通江淮見於

春秋後越滅吳角爲寇讐強楚東侵廣地自謀抵於泗
上雄視諸侯楚復奄滅是爲廣陵顧始皇之蜂豺覽天
下而并吞略長世之遠謀出須臾之經營郡始屬於九
江本立異於虛名偉項籍之姦雄置秦鹿兮相兵王英
布而開國俄劉邦之勃興革前人之故號易淮南之新
稱或江都之更創或廣陵兮相仍首皇子之啟封復沛
侯之繼承彼得失之奚計間叛逆之爲朋弔漢公之遂
巡亦異號於江平踵三國之紛紜作重鎮於魏邦疆幹
弱枝倚賢進良逮文帝之黃初幸故城兮臨江奮山川
之戎旅翦烟靄之塵幢志南渡兮已必卒冰舟兮莫航

目波濤兮稽天奪神明兮嘆傷實皇天之限隔豈人力
之能障浪賦詩於鞍馬因縱美於湯湯曰魏與吳名號
相因統縣有八屬徐而紛繁晉末之驅馳控三齊之要
津逮宋有邗州鎮是隆擇刺史以惟人俾撫柔於土風
講盛事於嚴秋之月觀巨濤於海陵之東俯江湄之壯
闊瞰京口之穹崇歷齊梁陳之累朝卒更革離合之不
同一陳留而分郡一東廣而啟封復吳州而異稱示屏
衛於其中隋總管以名府顧舊名而是從眷煬帝之纂
圖詔修飾於離宮會殿脚兮揮楫揚錦帆兮翳空決東
幸而建都引千艘兮戲龍戮忠臣而杜口括寡婦以從

戎獻無尾之羔兮絕繼作遭春之語兮凶終鵲集黼帳
血腥劍鋒徹牀簀以寔藏痛精誠之笑依指雷塘之漫
漫仰楓林之巍巍本馳情於一快反植禍於當時救陳
稜兮留鎮擁大軍兮北歸眷天意之昌唐卒虬髯之見
幾叱咤暗鳴作興帝基承江淮之歸命更南兗以臨之
外增置於行臺內維持於本枝武德而還寓縣緝熙或
邗或揚陞號都督貞觀之間十道分牧景雲開元增廢
遄速採訪處置道路擊轂綿延永泰之末建新節度之
目敕親王而領使慶皇宗之敦睦副以長史權任戒獨
跨豪華於天下駢十里兮雲屋此州之因革名號之大

較也擾擾後先興亡可錄吳王濞之不臣非子建之就戮淮南安之自殺而始惡彗星厲王長之憂死而民歌春粟非貪地以害公卒三分而承續紀陟之譬護寒也知險要之必爭諸葛之誅樂琳也表誣辭而自贖文欽之叛也因曲赦以示恩曹丕之走也駭疑城之在目沈慶之設強弩於高臺兮謹守備禦吳孫權置烽火於孤山兮驗夫神速蔣濟諷三州之論袁術哀馮氏之辱李子通之暫據杜伏威之驅逐彼公祐之何知運螳臂以相觸力未加而已喘息未伸而已促委雉堞於荆榛痛黔黎之魚肉徐敬業之傳檄兮武后臨朝而慨嘆田神

功之提兵兮劉展就擒而顛覆陰奏伯和之罪兮少游之凶狡外匱南方之力兮李錡之貪黷唐控失御昭皇蒙塵屬朱梁之侮國復黃巢之不臣沸淮海之狂波漲寰宇之妖氛迨吳僭王楊氏始振行密亟亡渥溥稱尊兵弱地狹器卑識昏亦猶指尾閭而瀆去水卽虎穴而寄蒸豚未有不亡者也夫然迭守迭攻代亡代存方東都之啟國倏大齊之自君始焉懼神謀之或泄默然畫爐灰而誑人咄嗟高駢跳吠狺狺叱海嶽以倒立噓風雲兮晝昏忽埋金之行厭終故羶兮裹身呂用之之狂妖畢師鐸之并吞孫儒厲言於庸賊秦彥伏劍於轅門

時雨降矣雖灌溉兮何益太陽昇矣顧小星兮徒云顯
德興周淮南克復撲燎原之凶燄起摧風之腐木赫赫
然我太祖之興也不取一毫不折一鏃何重進之跳梁
逆神鋒而自衄按九天之成法斷巨鯨之左足捧祥日
以出海乘鳴鷄而御籙民適父母天薦福祿冠帶百蠻
兮蠢然集慕羶之衆蟻玉帛萬國兮浩然收朝宗之百
谷士歸民耕野無鬼哭括有幅員悉吾臣僕銷藩鎮之
僭謀直皇明而外燭赦示守臣語吾約束掃戰爭之故
地變歌謠之善俗此州之聖愚興亡之明戒也長岡巖
嶙西馳東走凜劔外之危勢吞淮天之遠岫帶楚水之

縈盤瞰吳林之怪秀巨魚乘波偃然出壑長虵吸烟翹
然引首高焉上摘於星辰廣焉環迷於宇宙四帳無所
兮失迷藏之樓萬點猶明兮餘放螢之囿乏擊毬之壯
女悲喪馬之龍廡帝子去久兮空文選之樓雨蘚朝生
兮侵蜀泉之甃風飄飄兮引竹西之歌吹雨纖纖兮發
貢芽之香茂塔栖靈兮軋空池九曲兮分溜杜子美思
東流而乘興朱長文目西山而懷舊風亭月觀琴室吹
臺屹萬歲之雕華對鍾山之崔嵬待玉鈞之初月錯丹
楹之大雷走十宮之狐狸鞠三陵之草萊魏水軍兮穿
巨池而分浦隋酺戲兮揭羽葆而橫街僊曰尚存兮混

草莽之墟胥骸未朽兮感金玉之精植檜荒謝公之宅
掬淚傳秋浦之情筮山火以疑寺名之妖祥驚夢寐以
登峻臺之崢嶸望與浦兮表瑞始乎范邈峙危城兮與
築本乎張嬰孫郎作徐塘而淹北道齊高汾巨水而過
艾陵此州之城邑山川樓觀之所在也所以庾闡縱麗
言於禦寇鮑照攄雅思於蕪城因獻賦以賜錢兮酬王
正之才聞宮聲而疑變兮見令言之明容謝井兮起盧
仝之意表薦士兮示蕭遙之能張祐著浪遊之跡杜牧
悲薄倖之名箴告執籌兮揚子雲之慷慨詩弔故宮兮
李義山之縱橫訪木蘭兮偉王相國之貴鍍金鞍兮陋
江都縣志

卷之三十一

藝文上

五

章孝標之輕子瑱據城而生叛逆之志嵇康鼓琴而識
禍亂之萌騎鶴誚昔人之妄露筋哀正女之誠大中紀
年兮獲官河之聖米韋生避地兮悲水調之遺聲此州
之古今賢哲之所褒稱而悲歎也揚揚水波人實躁勁
或土多篠簜之本或地宜楊柳之性厥田惟下天草惟
盛利焉金錫之爲美民焉男女之爲正馳甍社之湖兮
夜駭乎明珠之光怪汎楊子之心兮朝出乎寶鑑之精
塋袍美蕃客布出鮫人半臂美錦土縠花紋烏節早香
蚶粟連根蒟蒻斤筍蘆芽水芹海榴石楠松藻葵蕪菰
粉白芷松栢葛薑芡紫翻刺蒲劍飛鋸鶉鴨鶴雉狐貉

兔獐野不利穀畜不宜羊鱖鯁鮑鯪鱠鯉鱠龜鼈鼉
蜃蟹蛤蝠魴螺蚌螳蠓獾殼堅剛五都十郡千豪萬商
趨牀頭之冗會定萬貨之低昂天長甘泉蓮塘石梁積
冬雪之綏綏乘春霖之浪浪泥冰土陷輪摧馬傷張氏
記明於行殺李巡注釋於輕揚采得寶之歌兮韋堅進
官於常侍興北埭之役兮謝安獲美於甘棠奇乎哉瓊
花吐英芍藥矜芳媚靈宇以敷秀覆修亭而舞香其潔
也御綠雲之玉妃其美也奔素月之僊粧其色也照時
春之藻景其馨也破真室之罌香友姚黃於西洛奴玉
蓋於唐昌至於雜樂奇戲歌僮舞倡結荳蔻之春梢艤

珠簾之密航九橋連居善和名坊楊柳發孫生之句牡
丹爲李氏之光姓系之出其源章章劉馬鄭盛韓林車
張戴高槐游茅冷蕭王此風俗物產氏族之所出也兩
京而降五代以還人物之詳善惡可觀微至於棲巖遁
谷之士下至於羈臣寡婦之賢董子諫易王之驕志何
武寬戴聖之微愆吏民刻石頌馬稜而懷德祠祀祈福
祝張綱而致虔趙苞成三年之政徐璆謝上公之官劉
馥先一時之備出苦蓑而復壘陳登當東方之事合部
衆以安邊事大見委兮責溫恢之效以函致問兮尊劉
暉之言政治尤異三府薦臧旻之績鎮撫安靜郭謀言

滿寵之德張玄不逮子綱而雅有高行張遼至自海陵
而今猶血食竿融利財奉佛而忘督運之急孫景委郡
東歸而得見幾之力陳瑀懼袁術之集兵周瑜識蔣幹
之說客陸伯言之先幾而知楊竺之終敗糜子仲之傾
財而資先主之軍食器中鬻茗而老姥不聞於增減帷
下燕客而桓溫恥崇於雕飾劉頌博識而見稱時人盛
彥異才而不應召辟華譚好學而取貴乎鄉里惠休復
姓而晚階乎仕籍開南門而必王兮恭陵胡爲乎反禍
實根本之所寄兮劉氏於焉而深惜荀伯玉夢稚兒之
語呂僧珍遇相師之識白虹貫城而義慶以之懇還十

年養士而季崇以之破敵老能馳射者傅永之好勇畏
如神明者蕭景之舉職方隋之時趙才裴矩之從幸其
止輦抗辭毅然而不佞志一朝兮已決言百車兮孰聽
指血染鞅兮徒爲乎宮女之留輿服羽儀兮徒爲乎何
稠之定李襲譽非特築句城以興利也復聚書而訓子
王志愔豈惟破凶猾以示信也先保民而爲政叅佐不
用明李廓之失郡人紀德見姚崇之正倪若水因班公
而有登僊之慕陸鴻漸對季卿而別中濡之性南柯駭
滴于之夢沙堤發李榮之詠臧珍對世宗言卑濕之狀
田頴諫楊氏喻狂猛之心賈崇失律懼元宗而受責馮

謚削髮遇周師而見擒環中丈人曰子之博聞吾已詳
知子之凭高睨下或得於古或得於今人之所不能見
而知者試爲陳之先生怡然布席揖座觴三行而已醺
徐爲丈人言之引目迢迢邈不知其所極也撫心迴迴
恨不知其所至也倏隆倏平闕絕頽危勢相睽而不屬
者此前日之廢城遺堞也斜分直出東西左右而名不
質其孰謂者此前日之市朝街陌之故處也殘刻斷礎
燒昏草沒而牛羊牧放之所憑陵而上下者此前王之
離宮別殿也纍然而峙訝然而空穴狐鼠宅虺蜴及於
人跡之所不及者此前賢昔帝之壞陵廢塚也前日之

綺羅鼓吹之坊今日之耘童樵叟之歌場蔬圃也前日
之官寺法度之所出今日之浴牛飲馬之斷溝荒塹也
齊綠高陰局分而并列者此菱蕪桑柘高下之畦隴也
似出而沒若來而去非圖繪筆墨之所可形容而盡者
此荒烟野霧朝暮之氣候也茂林陰陰挂晴日也白鷺
翩翩戲平池也遠水沄沄鱗魚舳也羣山亭亭帶長江
也疏花綴草天天灼灼訴春情也修篁舞烟曳曳徐徐
縈客愁也怒蛙沸雨怪禽嘲暮行商去賈千蹄萬檣南
浮而北走者不能誰何其一二也是以思紛然而蕩越
歛而不能相合言屑然而蹂冗就而不能少功夫然景

物之夥不爲丈人道也敢肆其所可道者丈人姑聽之
因屏息整衣受揖而立端以俟命皇乎哉我太祖之有
天下也進賢黜愚定羌服吳分茅裂土而啟十友之封
銜璧與櫬而赦諸王之誅萬里一統混同車書粵茲惟
揚古曰名都屏捍京師世倚賢儒唐季凋微羣雄角趨
寄人命於戈鋌委城雉於榛蕪誅殺蹂躪培削驅呼政
察察而不綱下嗷嗷而無餘一祖經營四聖扶持逮皇
上之興也天覆地容風養雨濡振歷世之衰殘造太平
於須臾四海九牧稱唐頌虞士樂膠庠商通有無工事
於器民安厥居老舞少歌其氣于于實惟神州東南奧

江都縣志

卷之三十一

藝文上

五

區併邑里而簡役廢軍壘以寬租江浙甌閩交廣湘湖
舳艫銜尾駢走津途蓋鑒前季之興亡建永世之規模
儲粟穀之千倉宿驍雄之萬夫擇將臣以嚴訓御之法
制尊牧守以絕鷹虎之侵漁淬蘭錡之戎械增堅金之
外郭崇中國之藩垣銷姦人之覬覦言未及旣環中丈
人委杖出席拊髀雀躍失氣出口乃曰賦者古詩之流
古人所以通諷諫也今先生之言磊落崢嶸豈特詳一
州之事舉而錯之足以彌縫帝袞龜鑑當世天鬻先生
跼蹐戰汗况不知其所如百拜以謝定色悉記將以俟
采詩者也

瓊花賦

國朝 王方岐

武徵
江都

惟琳宮之靚質挺太素之奇姿耀芳輪於寶地現琪樹於瑤墀並優曇之瑞應散祇苑之芳菲分植仙人之裔流傳后土之遺芳林譜其馥郁法苑筌其神奇爾其蜀嶺峨峨邗溝渺渺客聚平山人來蓬島地毓靈根名符天寶於是瑤林擢秀瑞霧含烟花開四照葉蔭便旋足使三珠奪素八桂停妍紛披上清之地高照淨居之天若其色掩卿雲光搖皚雪香凝媚服之蘭色瑩光明之月飄揚玉女之扉繚繞金仙之闥儼睟容於千花冠羣葩而獨絕是以萼折青綃色凝寒綠枝珊瑚兮鏤雪冰

江都縣志

卷之三十一

藝文上

七

藥珠璣兮爛金粟真庭靜兮迷迭散其氤氳仙籟深兮梅檀飄其馥郁璀璨兮若琮璧之列於禋壇玲瓏兮如珮環之映乎香縠迴眸而瑤圃當前轉顧而瑛盤在目桂娥借月影於冰蟾阿母下雲輶於皓鵠質儷珠盤香分蒼荀真玉界之仙姿登天都之寶籙爰有南國神君中朝柱石追揚馬之風流發雲龍之秘軸訪玉句之仙踪尋金仙之遺躅秉法憲之冰清羨此花之貞白辨八仙之殊種定玉藥之別族慕靈壤之瓌摧徵高文之璽瑒特命多士各抒胸臆賦靈蓂之佳篇咏瓊枝之奇什應劉受簡以抽思鄒枚含毫而接席勿負鏤雪之才各

騁凌雲之筆信事絕於長篇豈蕪言之可述也吾聞姬
滿長謠於黃竹商山作歌於紫芝洞庭興懷於落葉栢
臺賡唱於新詩帝子之梧冥冥王孫之草萋萋松徑則
秦宮易老桃花則漁父空迷苟志潔而行廉淡余情之
信芳較此花之皎潔孰麗質之可方是以兵燹弗能撥
烟塵詎敢傷根雖移而復植芳已枯而再颺應有神物
之護持調玉燭而恒光亂日玉樹亭亭兮肇曦光沃沃
皚皚兮覆都房秉姿太素兮揆靈將仙根植茂兮粹繁
昌瑤華再覩兮誠少雙鎮此花宮兮福無疆

記

江都縣志

卷之三十一

藝文上

五

唐淮南節度行軍司馬廳壁記

唐

李

翰

司馬蓋武之官號周官大司馬掌王之六軍將皆命卿
諸侯大國三軍次國二軍小國一軍將亦命卿軍有司
馬見於古矣周衰惟晉秉禮尊王屢因大蒐以正三軍
鄢陵之役韓厥爲司馬鷄澤之會魏絳爲司馬絳將新
軍張老代之蓋今之行軍司馬出於周制矣秦罷侯鑠
天下之兵列郡不復有軍司馬繇此廢矣漢制將軍不
常置四夷背誕則命將征之趙充國以司馬從貳師班
超以軍司馬從竇固討匈奴皆其職也自魏至周南北
分王建置不同時方戰爭衆軍恒設凡將軍仗節鎮仍

開府者以將軍開府居刺史者皆有其官隨將廢置隋開皇混一天下省罷衆軍司馬之官不專武軍廢爲州吏員矣國家修唐虞大國之化庭周漢不賓之俗邊雖有防亦不久設將出於內謂之使佐其職者謂之行軍司馬行軍司馬之職弼戎政掌武事居常習蒐狩之禮有役申戰陣之法凡軍攻戰之備列於器械者辨其賢才凡軍材食之用頒於卒乘者均其賜予合其軍書契之要比其軍符籍之伍賞罰得議號令得聞三軍以其聲氣行之職主武蓋文職也舊制朱衣銅印墨綬開元故事多選臺郎爲之淮南節度行軍司馬尚書戶部郎

中兼侍御史王公以經邦緯俗之才佐淮夷方面之寄敦詩書闡禮之本當節府大賢之舉政協乎邦要慮通乎事微奉中權之旗鼓戒羣帥之饒鐳師律旣和軍容至肅淮南之府有功王室身佩侯印將門良家藩國貴重以禮綏之則恭淮南之衆有吳楚銳士趙韓勁卒奇才劍客猿臂虬鬚以恩撫之則順淮南之地提封千里徵令百役稅以足食賦以足兵以寬征之則安淮南之衝南走閩越北通幽朔關梁不閉朝聘相望以歡交之則同自韋公統戎旅暨王公翼戎行威加於大則將不驕惠及於細則兵不惰減役輕歛則人不恫待賓省禮

則境不危堂堂然混一體以爲力雄雄然鼓衆心以爲氣封疆之外隱於敵國封疆之內不知有軍古人懸權於上而下自定置器於平而物自安者用是也茲所謂銷患於未形制危於未萌伐謀之功大於積甲山齊致心之術強於虎賁百物彼善師不陣未戰先勝却軍於談笑之際折衝於樽俎之間今古一時也夫舉善而行其教大則四海服小則邦國甯舜舉臯陶蠻狄率職帝王之事也秦任百里奚巴戎致貢諸侯之舉也國僑爲政乃子皮之功晉侯勤王信魏絳之力任賢用善合契同德盛府有焉翰獲庇於有禮之俗遂安於無虞之地江都縣志

卷之三十一

藝文上

本

揚州廳壁題名記

宋韓琦

揚九州之一地總淮海扼制吳會前代建府之重東南爲冠故有唐藩鎮之盛唯揚益二州號天下繁侈其後高駢政失致師鐸之變孫儒楊行密之徒以盜攻盜更相據奪郛邑殘燼遂爲戰衝本朝自李重進平必擇文武材臣以領州事民安惠養日以完復慶厯五年春三

月某得罷樞筦忝被茲任視事之隙因念前之爲政者尚闕傳載非以謹官守而重朝寄也於是參考圖籍次以年月刻石於廳事之壁以示永久後之來者閱其官氏推訪治迹則善惡皆有所徵云慶厯七年三月日記

瓊花記

杜游金華

余從京公至揚州尋訪舊事知世所傳后土瓊花在今城東之蕃釐觀遂往謁之故瓊花猶在然余聞紹興辛巳之變金人入揚州已揭其本而去何復從得此種也觀壁間有諸公所記載直排世俗詭謂道士以聚八仙嗣其名聚八仙葉瓣沓色皆不類余曾不見二花開時

江都縣志

卷之三十一

藝文上

空

獨怪金人旣揭其本復從何而得此種也有道士鬚髯皓然言生於崇寧間今八十有六歲矣能叙花之本末余與對坐於花之亭西之上改容而問道士指花之根幹而言曰此某手所培護而至此者也指觀之大門而言曰此殿向之廬處也指所坐之亭曰此向之無雙亭處也花舊在無雙亭下當殿之西北自紹興之十五年向龍圖子固覩殿廬面勢狹小徙置轉後則花當殿之西南更三十一年知郡事劉澤復命移花於殿之前卽今之花處是歲八月之十五日也初二十四年時植花之東南離三四尺許倏起一根枝葉日茂其下大徑寸

至是皆併移之不敢易也十一月金兵渡江趣揚州直入觀揚花本去其小者剪而誅之於是某方避亂奔走亦初不知敵旣退某於十二月來舊地是時訓練官卒率領兵馬依觀屯寨其軍人接某曰觀主至耶瓊花已壞敵手旁有一小根微見地面可識認非其種否某心知之謂難以口舌定惟告以瓊花若剔其根枝投之火則干鼻試之果然軍人皆喜歎某旣默禱后土移植無花處日往護之越明年二月旣望夜中天大雷雨某朝起視蚯蚓布地皆滿往所植根旁則勃然三蘖從根出矣自是遂條達不已至於今三十年之久見婆娑偃蓋

常不忘斷根時也道士旣言余爲竦然曰盛衰感應之理豈可不知其故哉夫他日不生小根而條於二十四年者兆見也歷且八年以養穉也離之三四尺許者不併揭也剪而復萌者終盛也天大雷雨蚯蚓布地而三蘖勃興者蚯蚓伏深壤陽氣驟促之則動與植俱也以人事言之不知趙孤漢曾孫之不亡何以異是自微而存存而有力扶植成就以至後日則程嬰丙吉之功道士宜獲報今之享上壽倘有相之者耶余恐道士老且死後來者無以知今花本末而疑不解故序其言而書之其間歲月事故叅錯煩委有可附見者悉不敢略以

知其不誣若其地靈異甚多則未暇及也道士姓唐名太甯余貫金華杜游紹熙二年六月記

揚州重修城壕記

崔與之

正子增城

守揚州登城臨眺形勢謂濠河湮陜塞裳可涉守禦非宜乃度遠近準高下程廣狹量深淺爲圖請於朝許之河面闊十有六丈底殺其半深五分廣之一環繞三千五百四十一丈壕外餘三丈護以旱溝又外三丈封積土以限淋漓又廣地七丈以受土使與危堞不相陵復作業城五門爲月河總百十七丈而南爲裏河又八十七丈西北曰堡城寨周九里十六步相去餘二里屬以江都縣志

卷之三十一

藝文上

奎

夾城如蜂腰地所守左右尤淺隘浚之槩如州城壕計七百三十一丈且甃女牆以壯其勢外壕旣深水勢趨下市河涸不可舟有警芻餉難以力又加深廣造輿梁五經始於八年八月訖於九年九月工一百一十五萬四百二十五費朝家緡錢三十四萬八千七百五十六米石二萬一千八百四十七州家激犒爲緡錢五萬一千六百節縮有道勸懲有章公私不以爲病

兩淮鹽司三門記

明李

銳

抑之安福

兩淮鹽司自唐以來代有之司治設於揚城東關南陬或曰揚城昔廣司建厥中後改作而隔諸外或曰鹽塲

有高下派場因部檄後先無容心焉先年齎部檄至者
雖夜亦必叩關而投司設城表以便商也二者俱未可
知正德庚辰仲冬余承乏來官是司視篆之餘徧歷司
治而觀焉喟然歎曰天下之廣百司庶府無慮幾千百
凡有廩帑囹圄之寄者靡不環諸城內以備不虞鹽司
尤錢糧淵藪乃反是是猶珠玉委於道傍可乎哉幸越
辛巳壬午兩歲時和年豐民皆安堵無他虞嘉靖癸未
齊魯吳楚赤地數千里而淮揚兼以澇餓孳盈途人相
食漠不爲異余因思曰斯時斯地可高枕肆志乎顧司
外通衢東南北皆有隙地可作門以爲保障乃命工會

江都縣志

卷之三十一

藝文上

齋

料規畫周悉其實請於巡撫長垣胡公巡按太原劉公
巡鹽石州張公皆許可於是構甃瓦木植聚羣匠而作
之值取囚楮之金力役居官舍之民門甃以甃上覆以
樓深廣各丈有三高倍之樓櫓相望宛若小城狀經始
於仲冬丁未落成於臘之庚子適有客過余相與登樓
而眺客曰偉哉此舉真百年良圖詩謂未雨徹桑易謂
設險以守其無愧哉然物必有名子名是門維何余以
東南北名客曰此庸儒常談非所以表章也請名南曰
迎薰北曰拱極東曰賓陽余問其旨客曰昔者舜彈五
絃琴歌南風詩曰南風之薰兮可以解吾民之愠兮子

能礪爾操存乎爾政事商而寬之竈而撫之海隅市廛無愁歎聲茲非迎薰之謂乎語曰譬如北辰居其所而衆星拱之子能殫爾心力夙夜匪懈以事一人所謂處江湖之遠則憂其君茲非拱極之謂乎傳曰日者衆陽之宗人君之象子居是官也凡渙汗之頒布天語之叮嚀洞洞屬屬奉行惟謹所謂天威不遠顔咫尺者茲非賓陽之謂乎是非特名門亦所以勗吾子也子能顧名思義身體而力行之後之繼子者接日警心奮發不怠鹽政其庶乎余揖而謝曰命之矣遂與舉觴酣飲而罷因書以爲記

江都縣志

卷之三十一

藝文上

七

序

江都集禮序

隋潘

徽

伯彥吳郡

序曰禮之爲用至矣大與天地同節明與日月齊照源開三本體合四端巢居穴處之前卽明其理龜文鳥跡以後稍顯其事雖情隨簡易意存玉帛而夏造殷因可得知也至如秩宗三禮之職司徒五禮之官邦國以和人神惟敬道德仁義非此莫成進退俯仰去茲安適若璽印塗猶防止水豈直譬彼耕耨均斯粉澤而已哉自世屬坑焚時移漢魏叔孫通之碩解高堂隆之博識專門者霧集制作者風馳節文頗修枝條互起皇帝負辰

垂旒辨方正位纂勳華之厯象綴文武之憲章車書之
所會通觸境斯應雲雨之所沾潤無思不歸東探不匱
之符西蠹羽陵之策鳴鑿太室偃伯靈臺樂修五常禮
兼八代上柱國太尉揚州總管晉王握珪璋之寶履神
明之德隆化讚傑藏用顯仁地居周召業冠江楚允文
允武多材多藝戎衣而籠關塞朝服而掃江湖收杞梓
之材闢康莊之館加以佃漁六學網羅百世繼稷下之
絕軌宏泗上之雄風曠無隱而不探事有難而必綜至
於采標綠錯華垂丹篆刑名長短儒墨是非書圃翰林
之域理窟談叢之內謁者所求之餘侍醫所校之逸莫

江都縣志

卷之三十一

藝文上

六

不澄涇辨渭拾珠棄蛙以爲質文遞改損益不同明堂
曲臺之記南宮東觀之說鄭王徐賀之答崔譙何庾之
論簡牒雖盈菁華蓋鮮乃以宣條暇日聽訟餘晨娛情
窺寶之鄉疑相觀濤之岸總括油素躬披緗縹芟蕪刈
楚振領提綱去其繁雜撮其指要勒成一家名曰江都
集禮凡十二帙一百二十卷取方月數用比星周軍國
之義存焉人倫之紀備矣昔者龜蒙令后睢陽名藩誠
復出警入蹕擬乘輿之制度建羈載旂用天子之禮樂
求諸述作未聞茲典方可韜之穎水副彼名山見刻石
之非工啻懸金之已陋是知沛王通論不獨擅於前修

宵朔新書更追慙於往冊徽幸棲仁岳忝遊聖海謬承
恩獎敢叙該博之致云

餞副大使李藏用移軍廣陵序

唐

李

白

太白成紀

夫功未足以蓋世威不可以震主必挾此者持之安歸
所以彭越醢於前韓信誅於後况權位不及於此者虛
生危疑而潛苞禍心小拒王命是以謀臣雄將啖以節
鉞誘而烹之亦由借洪濤於奔鯨鱗生人於哮虎呼吸
江海橫流百川左縈右拂十有餘郡國計未及誰當其
鋒我副使李公勇冠三軍衆無一旅橫倚天之劔揮駐
日之戈吟嘯四顧熊羆雨集蒙輪扛鼎之士杖干將而

江都縣志

卷之三十一

藝文上

李

星羅上可以決天雲下可以絕地維翕振虎旅赫張王
師退如山立進若電逝轉戰百勝僵屍盈川水膏於滄
溟陸血於原野一掃瓦解洗清全吳可謂萬里長城橫
斷楚塞不然五嶺之北盡餌於修蛇勢盤地蹙不可圖
也而功大用小天高路遐社稷雖定於劉章封侯未施
於李廣使慨慷之士長吁青雲且移軍廣陵恭揖後命
組練照雪樓船乘風簫鼓沸而三山動旌旗揚而九天
轉良牧出祖烈將登筵歌酣易水之風氣振武安之瓦
海日夜色雲河中流席闌賦詩以壯三軍之事白也筆
已老矣序何能爲

送廣陵許戶曹充名募判官赴淮南序

獨孤及 至之

冉駝不庭三年矣王師戒嚴將問罪荒服於是上將分職慎選乃僚以許公有持斧舊名斷犀餘地故授以戎政俾發卒於東夫三河之人豪全齊之人武荆吳之人悍藉其餘勇可以盡敵信以致之繫公是賴然則論王命敦師律度程以料民徵騎以濟衆歌事以遣役輯謀以定功在是行乎高天晚秋殺氣動地靡靡岐路悠悠旆旌送離如之何賦小戎以爲好

送蔣員外奏事畢還揚州序

江都縣志

卷之三十一

藝文上

亥

揚州牧趙國崔公使其部從事侍御史吳興蔣晁如京師條奏官府之廢置歲月之要會其來也吳楚之衆君子酒而詩之而薛水部弁李司直翰雙爲之序以冠篇首旣將命趙公拜左僕射蔣侯加尚書郎之位其還也之子日執書卷以言於朝日始者與數賢別賴斯文故常若在眼今幸而還秩行車在門明日離羣想今日之會亦猶於此而思彼也非置書袖中人謂我何然後西人之舊者皆賦韻道別而鄙夫和之詩大畧蓋美蔣侯以才智任職有周爰咨諏之用而將事不墜專對不辱能一其心以佐大府之政政靡小大唯公是謀謀之臧

歸於府不知我者則謂我專趙公所以有成璿坐嘯之論而無慚示樂羊謗書之篋而不疑斯可謂之明矣今也于歸腰曳兩綬然濁涇素澹春水始生秦原青青諸草皆秀可共樂也而又別焉凡我同僚是以有瞻望不及之嘆故送遠之志悉形於文

揚州崔行軍水亭泛舟望月醺集賦詩序

言同者無約束而信心同者未謔浪而樂聲應情至則不俟外獎况遺言之言造適之笑與盃中物池上月風中絃五者合以貺余歡其可勝旣乎於時衆君子棲公翰林如翔鳥之得茂樹也至是登於仙舟泳彼新流掇江都縣志 卷之三十一 藝文上 堯芳翫奇以永今日日不足故用夜漏以繼之羽觴未及數覆銀河橫而金波上樂作神王百憂如失而絃繁管清悲歡交乎其間則高歌爭進或道舊以泣酒酣意真樂極感至故也當斯時視身後之竹書鼎銘猶稊米芻狗也况細故乎二三子醉猶能賦且酌且詠余屬而和之其詩曰

明月借秋興流光在此池山公顧我厚醕酌稱未疲勿謂嘉會易但憂離別隨飽君醉中德敢使私心移

地誌圖序

呂 温

廣陵李該博達之士也學無不通尤好地理患其書多

門歷世浸廣文詞浩蕩學者疲老由是以獨見之明法
先聖之制黜諸子之傳記述仲尼之職方會源流考同
異務該暢從體要綽然勒成一代之說猶懼其奧未足
以昭其後生乃裂素爲方據書而畫隨方面以區別擬
形容之訓解命之曰地誌圖觀其粉散百川黛凝羣山
元氣剖判成乎筆端任土之毛有生之類大鈞變化不
出其意然後列以城郭羅於陬落內自五侯九伯外至
要荒蠻貊禹跡之所窮漢譯之所通五色相宜萬邦錯
峙毫釐之差而下正乎封畧方寸之界而上當乎分野
乾象坤勢炳焉可觀與夫聚米擬其端倪畫地陳乎梗

槩固不可同年而語其詳畧也每虛室燕居薄帷晴褰
普天之下盡在屋壁戶納四海窗籠八極名山大川隨
顧奔走殊方絕域率意而到高視華裔坐橫古今觀帝
王之疆理見宇宙之寥廓出遐入幽曾不崇朝與夫役
形神於歲月窮轍迹於區外又不可並舉而論勞逸也
且夫刪百代之弊綜羣言之首繁而不亂疎而不漏才
識以潤之丹青以炳之使嗜學之徒未披文而見義不
由口而覩奧斯訓導之明也窮地而述舉世而載事極
鴻纖理通轍昧混一家之文軌張大國之襟帶覈人物
之虛實總山川之要會表皇威之有截明王道之無外

斯乃功用之大也見蒼梧塗山則思舜禹恤民之艱觀窮荒大漠則悟秦漢勞師之弊覽齊墟晉壤則想桓文勤王之霸觀洞庭荆門則知苗蜀恃險之敗王者於是明乎得失諸侯於是鑒乎興替斯又懲勸之遠也然則本之所以廣學流申之足以贊鴻業垂之可以示後世豈徒由近觀遠以智自樂爲室中之一物哉而時無知音道不虛行舉地成圖開天無路此志士儒林所以爲之嘆息也某久從君遊辱命序述庶明作者之意俾好事君子知其所以然

揚州集序

宋 秦 觀 少游 高郵

江都縣志

卷之三十一

藝文上

七

揚州集者大夫鮮于公領州事之二年始命教授馬君希孟採諸家之集而次之又搜訪於境內簡編碑板亡缺之餘凡得古律詩選箴賦合二百二篇勒爲三卷號揚州集云按禹貢曰淮海惟揚州彭蠡既豬三江旣入震澤旣定而周禮職方氏亦稱東南曰揚州其山鎮曰會稽其澤藪曰具區江曰三江浸曰五湖則三代以前所謂揚州者西北極淮東南距海江湖之間盡其地自漢以來旣置刺史於是稱揚州者往往指其刺史所治而已蓋西漢刺史無常治東漢治厯陽或徙壽春又徙曲阿魏亦治壽春或徙合肥吳治建業西晉後魏後周

皆因魏東晉宋齊梁陳皆因吳惟宋常以建業爲王畿而東揚州爲揚州東揚州者會稽也隋以後皆治廣陵由是言之凡稱揚州者東漢指厯陽或壽春或曲阿合肥自魏至周指壽春或合肥江左自吳至陳指建業或會稽隋唐五代乃指廣陵廣陵在二漢時嘗爲吳國江都國廣陵郡宋爲南兗州北齊爲東廣州後周爲吳州唐初亦爲邗州其爲揚州自隋始也由是言之凡稱吳國江都廣陵南兗東廣吳州邗州者皆今之揚州也此集之作自魏文帝詩已下在當時雖非揚州而實今之廣陵者皆取之其非廣陵而當時爲揚州者皆不復取江都縣志

卷之三十一 藝文上

三

至揚子雲箴本約禹貢爲辭則廣陵自在其中固不得而不錄也旣成公又屬觀推表廢興遷徙之跡而究其端使夫覽之者有考焉

揚州進士題名記序

代人

陳造

唐卿高郵

科舉取士肇於漢詳於唐我朝莫盛焉公卿大夫不由是而進歎如也世之於吏苟曰是本進士則逆以廉隅辦濟必之而東南之地連山大川拱揖後先建楚蜀而下東爲揚州其勢之磅礴氣之扶輿若盜驪騾耳驚驅長驚而忽跪足驤首徘徊顧慕而不去則其鬱蓄鍾孕非奇傑哲艾無以當之開國至今揚之士宏材遂學政

術文章所謂奇傑哲艾不知其幾而科第所得爲多至
呂公溱王公昂李公易皆魁天下士盛矣哉南渡而來
士氣文風中圯而漸振雖消長污隆有不可得而齊然
其江山形勢磅礴而扶輿自若也而名世之儒復自巍
科與大政儲宅揆之望則士畏古卑今自重之弗果其
可哉某無似忝師帥之任撫俗育材其職也庀事二年
里閭似無愁嘆而於學政尤未始敢忽茲荷上恩俾因
任以究己試或者學校科舉之間猶及拭目平日之盛
歟故取國初以來揚之士題慈恩之名者凡若干刻諸
樂石置於學官示予所以期諸生之意詩不云乎高山
江都縣志

卷之三十一

藝文上

三

仰止景行行止觀者其庸忽諸

廣文選序

明呂

榘

仲木
高陵

昔梁蕭統編定文選粵自秦漢迄於齊梁騷賦詩歌詔
冊表啟時且千年煥如其舊第博雅君子汎覽別籍見
有遺詩脫文則又每病乎統焉然未有能廣哀散失萃
纂重行者今少司寇梅國劉公英特之才博大之學旁
搜羣書幾二十年類摘門補世採人增凡統之闕漏十
九學士觀覽無不足之嘆長垣侯君季常方守揚州
可遠傳乃命學生葛澗校正差訛旣且入梓遣使問序
涇野子曰懿哉梅國之用心乎夫自乾坤典謨以來載

籍宣昭歷世誦習然三墳或隱九邱多支惟左史倚相者具能讀之楚人歸善尊爲至寶白珩不齒也鄭公孫僑使於晉適晉侯有疾卜云實沈臺駘爲祟雖叔向莫知乃問於僑僑具述高辛元冥之遺參汾主封之故通國驚動以僑爲博物君子然則梅國斯編其有資於學士之間見者富乎或曰文選以毛詩序與思歸引序並列廣文選以思親操猗蘭操與胡笳十八拍操同卷聖愚不分經騷不辯惟多是取不揆之道亦以爲富可乎曰不見詩書春秋耶古詩善惡咸收至三千餘篇因得取爲三百篇之定古書聖狂皆載幾千餘篇因得取爲五十篇之定左邱明傳述魯史將數十萬言治汙具存因得取爲千五百條之定廣文選如行也焉知後無作者不因此而說漢禮晉文比於古文獻之足徵者乎審若是且將恨收取之未盡廣又奚暇論其醜疵哉書凡二十餘篇爲卷者八十二其門分類析皆准昭明之舊云

廣陵十先生傳序

李攀龍

于鱗
濟南

人才之生雖地氣使然哉曷嘗不由應運而興者乎應運而興則地氣運會人才相感而勸其成相感而勸其成然後闕之不爲沮挫之不爲變也我世宗肅皇帝以

聖文神武治天下者且五十年乃廣陵有先生十人洪
永之際於斯爲盛矣儲公之黜如臯令與王公之訊蕭
敬景伯時趙叔鳴之忤逆瑾也朱升之之掾顧開封與
蔣子雲之諫南狩也曾公之啁啾於遼左與桑子木之
傾於骸骨之疏宗子相之祭楊太僕也所不罹者朱子
价一人而已奈何十人而九闕之九挫之乎肅皇帝懲
宦者煽亂而制奸臣之命斯運之所由起也余往見歐
君矯矯負史才而致意乎作者有鑒裁矣善乎傳所謂
廣陵在漢時吳王好文辭而大山小山之作奮自淮南
彬彬哉明興二百年廣陵多文學之士乃今始有宗臣

云今勿論其所得卽自諸公已力圖復古推轂獻吉景
明輩而伯時子雲叔鳴升之亦各以聲藝翱翔李何間
矣子相後出相勸而成者乎翩翩孔璋之流也世方病
文學之士無吏事登陴而守福州者誰與永安之捷與
海防二三策豈一語不相合也而况馬政軍餉綏夸導
河如儲王以下諸公所至有績者乎故闕之不爲沮挫
之不爲變進則謀國家退則著文辭自董生而授經術
之業有如十先生廣陵得以稱文獻之邦矣何應運而
興而河套之議卒撓於讒而不得以復國家二百年之
疆圉設令子木之奏行而嚴氏者與三尚書並罷豈有

侔主之禍也豈廣陵地氣微不能與運會而適至是乎
傳言儲受知尹恭朱納交邊庭實二公皆余里人叔鳴
按察副使曾公都御史又皆在山東子价余同年進士
而子相則傳所謂昔者吾友也十人而得其六是傳也
以徵文獻足矣其斯實錄云

惟揚人物志序

張 集

惟揚人物志先正雪洲黃公所述也公旣沒十年集始
得發遺編而讀之見其芻蕘焉靡倫渙焉靡萃遺焉靡廣
也曰嗟乎其未成之書乎懼其遂終逸也乃退而彙次
之凡爲卷八爲類十有五爲人百二十有一而以外傳

江都縣志

卷之三十一

藝文上

美

終焉於是乎十國之英千五百年之產雖醜駁匪齊亦
炳焉可觀矣是故儒以盡人學以盡事首之儒學以重
道也卿相以酌化元臺諫以裨君道治斯成矣故次之
以宰輔次之以風節以及物者存乎制以明教者存乎
倫必由學致之故次之以政事以孝義孝義立矣以是
移忠以是犯難曷往弗臧故次之以忠節大綱正焉可
以爲文矣故次之以文苑文以飾治武以勘亂才匪偏
也故次之以將畧或仕或止其歸一也故次之以隱逸
庸之斯行匪終藏焉乃若精業以利用善辭以存國談
諛以寄諷豪邁以立功要非嫌於小成故藝術應對詠

諧遊俠亦以類次焉其流寓者或以重邦或以留化來游來歌厥繫匪輕惡得而遺之男以治外女以治內壺範之良婦道之光也故以列女終焉是陽教陰教意也夫邦有僭僞民靡有寧胡爲乎其附之亦晉錄載記唐傳叛臣類也斯志也或亦公之遺志乎

重修揚州府志序

國朝 汪懋麟 季角 江都

國有史郡有志重矣考一代治亂興革君臣庶事臧否得失使後世有所觀法視乎史問一郡山川人物風俗險塞美惡戶籍生齒之凋繁禽獸草木水土之產畜使治此者瞭然而來游者得所止則視乎志統天下之志

江都縣志

卷之三十一

藝文上

七

上之天子付之太史採擇而書之卽以成一代之史所繫於國家何如也與王在上必得著作之臣取勝國之史而修之近或百年遠或數百年而後成賢有司爲郡暇取郡邑之書稽覈考證之刪其蕪而增其新事取其信文法乎古大抵數十年而一易蓋史不可以間作而志則不可以不修顧修之亦不易宦遊商估滿天下稽之戶口無一丁在籍者寥寥田野之窮民其人死已久而名猶隸於籍謂天下之戶口可信乎供賦徭役載於經制者不行於井里定於司計者變亂於奸胥守令之能者粗窺其大綱而不能者憤憤終而已忠孝節烈名

宦寓賢隱淪才藝之士考之往古不世出而今家龍比而戶曾閔老而寡者以節書貴而不必德者以賢祀鄙辭惡札繁縟連篇人物藝文至於今何獨盛也凡以執筆其間者不過取舊集而繕錄之妄有所增益數月而集成署其端曰某年某官修要名而已耳以是爲修何可以爲志曲沃少師衛公引疾久矣

今上思其賢欲倚爲治安車蒲輪起於家

召對命言天下事無隱公條列數事以修一統志爲急

上曰可詔督撫下郡縣於是天下始知志爲國家之所重如此言者又疏請修志禁私派務得人使可傳信

江都縣志

卷之三十一 藝文上

七

朝廷並下其議則修志於今日烏可苟焉爲也方是時山陰金公知揚州甫蒞事卽以志下詢余請博採於公獨斷以信不可參於人公搜前志得故明萬厯中鄉大夫盛公儀所修及近代諸本又下令九邑各以所輯新舊志進合以

本朝因革文獻之徵驗彙爲書未成會公擢副憲督視江蘇八郡郵政鹽法輜軒之暇精搜嚴剔必信必文逾年而書成以示余曰志初謀於子今幸竣事子其序終始焉余以非才遜謝者再公屢書促不倦恐辱公命夫志史事也况奉

天子命將達於

御所頒之史館取信於天下後世敢不慎公固賢者治揚
僅一載視民寬和若慈母又好文愛士遠近歸之去而
士民思之不忘古所稱仁者也仁者之言必不誣則其
爲志不可信哉不可信哉

文

揚州勸農文

宋方岳 巨山

乃二月壬寅守廣陵趙某誕進州之父老而告之曰淮
海惟揚州厥土惟塗泥厥田惟下下矧廣陵越在邊圉
曩則亦有繹騷以患苦吾父老荒而敷蓄用不遑於厥
江都縣志 卷之三十一 藝文上 五

家爾父兄弟亦惟艱哉今天其佑我宋歲仍大熟有
逋虔劉宵遁窮北爾父老其修乃疆畝濬乃澮洫簡乃
錢鑄穀乃鋤耒無敢不良以敬迓天之大豐美守閔再
寒暑罔不一念在爾民東作俶興用咨爾一二父兄惟
田里熙熙以董太和時則有豐年毋訟惟仰父俯子勤
勞於厥躬時則有豐年毋游惟不淫於非彝以愔乃心
時則有豐年毋博惟不狎於甲兵以甯爾父子時則有
豐年毋狠惟爾一二父兄念哉其無斁

傳

廣陵先生傳

宋劉發

王氏舊望太原自先生之七世祖居於魏之元城不知其始何遷也叔祖父乙居廣陵先生幼育於乙故遂爲廣陵人年十數歲晝從羣兒嬉夜獨誦書往往達旦不眠率以是爲常未嘗從師爲辭章卽雄偉老成人見之皆驚年稍長侷儻不羈束周鄉里之急爲不義者面加毀折無所避人皆畏而服之里人滿執中謹厚人也一日先生過之執中以先生所爲非是先生因自悔更閉門讀書久之所得益以閎深乃爲竹賦以自廣其姊寡居貧無以自存乃聚徒天長已而積薪之中得芝一葉先生有感焉乃著藏芝賦是時丞相荆國公赴召道由

淮南先生賦南山之田詩往見之公得先生大喜期其材可與共功業於天下因妻以其夫人之女弟焉旣而徙高郵太守邵公必延請主學先生辭不獲已強應之尋亦辭去邵公爲部使者以其節行聞於朝廷不報先生旣喜退隱思江南山水之勝乃遷居潤賦江上山中之詞居頃之熟於潤之山川道里又著遊山記以寓其意居無何以江陰幽僻乃去潤遷江陰江陰地下濕得疾苦足弱因復遷常未幾以足疾終天下士大夫無識不識皆痛惜之荆國公爲誌其墓荆國公旣誌其墓又哀思之著於詩多至十數篇先生德業之敏如駕四馬

馭夸路駸駸驟馳雖健步者邈不可及然聞一善言見一善行未嘗不歎慕自以爲不逮事寡姊如事父教姊之孤兒不啻己子歲時祭祀於其考妣必流涕親識皆遺緘介無所受諸生有獻度其家貧禮雖甚勤不取也平生爲文多操紙立書未嘗有藁或有藁隨輒焚毀故其終家無遺文先生方生管城君名之曰令兒未及更立名而管城君卒故先生因名令初字銓美建安黃莘以其造道之深字之曰逢原吳氏從先生一年而寡歸治田桑布素以待盡其趨操論議是皆宜爲先生配先生旣終方得女荆國公爲擇所宜歸歸吳人吳師禮亦江都縣志

卷之三十一

藝文上

全

全而進止行遁無所於逆三代而世不知所以造士
士未明所以行己而紛紛外物既一變易其思慮矣則
其所守無所適當固其所也嗚呼若先生者可謂豪傑
之士矣去三代之久如此而以宏材敏識偉節高行特
立於一時使其無不幸之死而幸與世偶則其所設施
當何如哉雖然以大王王季文王武王成就天下之士
至於易商爲周而士之備道德之美者宜不可勝數矣
管蔡一以流言而朝廷上下遂皆信之知保周公而賊
四國者才十夫而已然則士之不待文王而興者豈特
罕聞於後世哉雖先王之世固已然矣推此則若先生
者其可易得哉世之知先生者或以其文或以其行未
爲知先生者也知先生者唯荆國公而世或疑之故詳
先生之行事而論次之如此

陳偕傳

秦觀

偕姓陳氏淮南廣陵人家故饒財而偕與其弟獨喜學
畫其後技日以進家日以微遂以爲業士大夫旣喜其
畫且愛其爲人往往稱之然非偕之好也其言曰予從
事於茲有年矣凡古今之畫不見則已苟有見焉雖敝
縑裂素之餘未嘗不學一不可於意輒復易之舐筆濡
墨欣然忘勞蓋是時余方以畫爲事固其勢不得不然

乃今思之亦良苦矣且物之有形如浮埃聚沫來無所從去無所詣一興一僨於無窮之中而我方汨汨然隨而畫之可不惑歟彼好事者又從而玩之至藏於巾笥且不欲以數閱可不謂大惑歟嘻今老矣顧家貧無以給衣食之奉聊復俛仰於其間至於得失精粗不復經意也又曰有學於余者衆矣余將教之必使縱心之所勤肆筆之所成以觀其天蓋工而不雅者有矣疎而不俗者有矣詳畧得宜意氣容與卓乎遂若無與及者亦或有焉余從而告之曰其後當然其後當然已而果然夫畫固技之微者也其猶若是又况有貴於畫者哉其

子直躬亦世其學而所言尤異嘗曰昔宋元君時畫圖有一史解衣槃礴元君曰是真畫者也夫解衣槃礴固倜儻之所得閒暇之所好也元君乃以爲真畫其意果安在乎有得於此然後可以言畫而或說以爲神定意閑固以異於他史其亦失元君之意矣余聞而異之又從而思之豈所謂自得於己者耶抑亦得於人者耶將內雖不克其言而頗亦有志於是耶人固未易知然比夫銜技以夸人賈能以售汙俗者謂去亦遠矣古之君子聞一言中於理必書之故漁人之所賦孺子之所歌皆得載於前史矧其有合於道德之要者乎於是爲傳

其言以遺同好亦時觀之以自擇焉

贈太僕少卿郝公傳

國朝王巖築夫寶歷

郝公景春字和滿揚州江都人也慕楊忠愍爲人每讀其年譜輒太息生平數窮困或曰子困固當胡不學今之術乎公曰今有術耶吾乃今矣因別號乃今旣嘆曰吾終不善今也又更自古因圓其冠前角而後方之閒居偶發篋忽泣數行下其子驚問故則手泰昌錢拭淚曰見此憶聖天子也公以萬厯壬子舉人仕鹽城教諭改陝西苑馬寺錄事遷黃州府照磨陞房縣知縣時流賊張獻忠熾甚所過城郭屠滅一空入湖廣與羣盜蹂躪諸府縣鄖襄間聚九營而羅汝才白貴黑雲祥者三營逼處房地房城高丈餘被兵數載且在萬山中轉饜無所公之房次子鳴鸞請從公至則修城壕築敵臺招流移諸守禦具備當是時總理軍務都御史熊文燦奉命討賊不辦遂主招撫獻忠乃就撫文燦請於朝授副總兵居之穀城所謂西營八大王者也文燦使監軍僉事張大經監其軍而汝才雲祥暨貴皆陽言乞撫逼房踞郊關公告急文燦不問然公志在戰守不欲撫文燦嫉之檄謂今朝廷欲化賊爲民奈何驅民爲賊乎賊聞之喜遂沿城屠掠公擊殺數十百人賊懼訴文燦文燦

謂公壞撫事趣公駐賊城外使指揮數人至房安插指揮受賊賂惟所欲房人驚譁哭訴搏指揮公力解乃止既三城逼城下自東至北爲汝才壁號曹操營自西至南爲雲祥壁號整十萬營而貴壁則分列城西北及西南號小秦王營凡衝要地盡安塘置馬焉公不得已單騎抵賊壁約盟因明約束畫疆界乃定已而嘆曰吾數奇不可逃也夜半篝燈自著數奇紀畧公夙慕忠愍此卽自著年譜意云未幾獻忠叛穀城知縣阮之鈿死之張大經從賊爲前驅引兵圍房汝才等絕其糧割口中麥助賊時城中僅羸兵二百公以寸紙繫卒髀間爲丐

狀縋城求援於文燦凡十四往不報獻忠遺公書要以讓城公怒曰郝老頭可斫城不可讓也賊因急攻公與鳴鸞乘城施大小砲石身自指揮賊布雲梯以登公用鈎奪其梯數十不得上自下掘城公熱沸油傾之死者近千人賊乃掘墳毀棺出口取板蔽以掘城公用火燒之兼擊大石死者數百人獻忠恚甚益兵圍數十重且執刀乘馬繞城走視攻不力者殺之公置錢城上指曰擊中一賊賞千錢兵民益奮須臾錢盡又斃賊數十百人鳴鸞亦手擊數人相持五晝夜賊氣奪撤圍將宵遁忽汝才至城下周麾大呼曰城破矣則守北門指揮張

三錫知援絕以繩縋賊相引而登故也城旣陷守將楊道選率兵巷戰死之監軍僉事從賊張大經紅纓大帽持短槍乘白馬先入索公獻忠繼至入坐縣署賊兵擁公至起降階迎奉卮酒飲公公叱之忽數十人持令旗馳至曰曹營令我等來救郝知縣擁公上馬去時鳴鸞從亂軍失散往來求公不得而僕陳宜散髮跣足從亂軍求公遇之至曹營公曰誰爲求吾兒來汝才使一卒執旗去徧求之鳴鸞不得公哭於道久之遇執旗卒會夜大雨如注鸞奔至見公哭公曰男兒至此只要自己決斷耳以手自畫其頸曰此亦不甚痛也鳴鸞收淚慷慨

慨曰兒所苦父子死不相見旣見敢不死觀者皆泣汝才說公降不應大經以監軍從賊欲得公分其惡故與獻忠謀使汝才說公有頃獻忠使卒來索公命鳴鸞且留遂往陳宜隨之至則獻忠大經並坐獻忠問庫銀倉米安在聲甚厲公叱曰死賊倉庫有物城豈爲汝陷乎賊怒殺典史以懼公公一動大經起前勸曰事已至此須識時公大罵曰汝受朝廷厚恩官監軍負國辱親甘從死賊我死必活捉汝獻忠大怒使卒擁公出公口不絕罵至西河邊鳴鸞痛哭追至公呼好者再遂遇害鳴鸞大呼曰死賊何不併殺我遂與宜俱遇害主簿朱邦

聞罵賊不肯屈一門皆死皆崇禎十二年五月二十九日也事聞部擬贈尚寶寺卿天子嘉公忠改贈太僕寺少卿廕一子入監特祠祀鳴鸞陳宜祀公旁王巖曰予聞冷水道人者不知何許人常出入諸督撫幕中叅其謀畧又能得賊陰事豫以告且於凶吉皆先知終日惟飲冷水窮冬亦然公死道人白其事圖上請贈廕矢一日不死必辦此然於公無半面識也嗚呼世之平居稱相知而毛髮利害反面如不相識者聞道人之風亦少知愧哉

江都知縣周公傳

汪懋麟

江都縣志

卷之三十一

藝文上

七

公周氏諱志畏字抑畏又字雪松甯波鄞縣人曾祖炯封文林郎祖天覺故明萬厯己卯舉人鄧州知州父乃祚甯波府學生員贈江都知縣母李氏贈太孺人某府知府李公應辰女初孕公時夢神告以月望當生兒及生果及望因小字望公負至性少讀書見古人忠孝節義事卽感激奮發日夜磨礪思發舒其所欲爲事父母孝母早得疾臥牀十餘年公視藥臥側不敢離間潛誦書以慰其父夜不敢解衣寢中裙廁踰日取浣濯不假妻子手久無倦容母亡一年父尋歿朝夕哭毀瘠過哀及葬不輟哭遇風雨卽麻衣趨伏墓上慟哭霽始返自

傷爲諸生未得志養其親常書蓼莪篇自責且詠且哭
聞者哀之服除崇禎壬午舉於鄉明年癸未成進士又
明年甲申流賊李自成陷京師謁選南京得江都當是
時捍帥分部四鎮國家莫能制所至奴官吏蹂百姓稍
不當橫刀怒視揚州一鎮尤酷惡吏民苦之帥旋死兵
無所統益橫暴公適下車將弁氣凌公公強項抗不撓
取其兵害民者置以法兵大譟謀劫公廷論多公直恐
不免議調歛縣大學士史公可法督師駐揚州知公才
欲倚爲佐聞調慰留之曰敵且至城孤立無救度不能
守民旦夕死我與子俱死民所以不卽死者恃我與子

在耳子卽去如民何公素子畜民民依戀卒不忍去城
中餉匱公往高郵區畫糧數千斛入城爲堅守計未幾
大兵薄城下史公守西門公守小東門躬率士卒被介
胄嚴刁斗宿敵樓上夜不交睫攻益急有給公降者索
縣印公罵之曰城破吾抱印死印不可得西門破史公
死兵入執公不屈擁至南郭福緣庵劫公於水公平時
常以小鏡置懷中用以爲鑑至是死數日無知者一僕
行覓公見尸水上識其衣啟視鏡宛在乃哭殮焉公生
於萬曆丙辰四月十七日死於乙酉四月二十五日娶
袁氏一子斯言比聞公死泣不止歿於江都尼菴甫八

歲公兄子斯盛字岷公

皇清順治辛丑進士以文章名於時哀公死之久而未彰也屬余爲之傳

論曰乙酉之難史公死城守顯白昭著矣乃以葬不得尸人迄今疑之甚矣小人之不可語大義也嚮使周公之尸不出其疑又孰能辯哉周君岷公不死其叔以弟斯戢繼公後又表彰之嗚呼賢矣

汪比部傳

王士徵

君姓汪氏諱懋麟字季用後更號蛟門故蛟門之名獨著其先徽產越國公裔也繼徙浙徙揚遂著籍江都會江都縣志

卷之三十一

藝文上

九

祖某祖某父如江年逾大耋以齒德重鄉里有五男子君次第五幼穎異殊常見與兄耀麟同授經長安王巖築夫之門築夫宿儒工古文通經學君得其指授爲多順治庚子辛丑間予爲揚州李官識君儔人中補諸生康熙二年舉鄉試又四年成進士與同年生陳賡明玉璠沈康臣允范顏修來光敏齊名輦下公卿倒屣迎致之以推擇爲內閣中書舍人君固嗜書每入直襍被外攜書卷自隨公事畢輒鉛槧雜誦或行吟陞楯間丙夜不輟由是學日益博詩文日益有名居三年繼丁內外艱執喪盡禮戊午

天子思得鴻博之儒備

顧問於是兵部尚書宛平王公工部尚書海甯陳公交章論薦君以未終制力辭服闋需次部主事會左都御史徐公復以君名與李公清曹公溶黃君虞稷同薦於

朝先是己未鴻博之舉選入翰林者凡五十人至是李曹二公辭不至君僅以主事入史館充纂修官著史傳若干篇補崇禎實錄又若干卷時人稱之尋補刑部仍直史館君才通敏不敢託史事自佚聽斷矜慎雖強禦不顧也南城武某以一車一馬賑米於南花園宿董之貴家董利其貲殺之夜以車載尸鞭馬曳之他去武父得

江都縣志

卷之三十一

藝文上

九

尸於道得車馬於劉氏之門訟之官謂劉殺其子君曰殺人而置其車馬於門非理也乃微行南城外縱其馬馬至之貴門輒跳躍悲鳴衝戶以入君卽令收之訊得實寘之貴於法劉得釋都人作馬訟圖賦詩張之王某兄弟五人與海戶鬪自殺其病弟而訟海戶於官君微行察之其鄰曰鬪則有之殺人則未也至王某門其家籠鵝忽羣鳴延頸如有所訴君立逮弟妻訊之具以告某遂自伏旣具獄忽二人稱親王使者直前謂某隸籍府中君怒曰吾爲刑官爲

朝廷守法耳必索之當 奏聞二人者氣奪去其奉公守法

皆此類也君既負文望在西曹又能於其官爲尚書蔚
州魏公所器

當六亦知其名一日出禁中宣德紙百幅

命翰詹諸臣及羣僚書進擇其尤者二十四幅爲

御屏君書與焉人謂旦晚且進用亡何罷歸初君爲舍人
時楚人朱方旦挾其術游公卿間惑其說者至擬諸大
禹孔子君獨作辨道論詆之以爲妖妄學士孝感熊公
見其文造廬定交焉君詩才稟姚跌蕩其師法在退之
子瞻兩家而時出新意古文尤喜王介甫晚歲爲文章
隋刻近之君稱詩輦下與今刑部侍郎田公綸霞巡撫

江都縣志

卷之三十一

藝文上

七

都御史宋公牧仲前國子祭酒曹公頌嘉湖廣按察使
丁君澹汝故給事中王君幼華吏部郎中顏君修來工
部主事葉君井叔今禮部郎中曹君升六刑部郎中謝
君千仞相唱和時號十子歸田後鍵戶謝賓客晝治經
夜治史日有程課將銳志著述成一家之書而惜其遽
病以死也歐陽文忠公平山堂傳數百年毀爲浮屠之
居君言於太守金君力修復之前堂後閣上祀歐公其
下襍植花竹梧桐楊柳前賢遺蹟一朝而復其風流好
事如此越國之後多家於揚舊無專祠君鳩其族創越
國公祠而以開國公配歲時饗祀合族於此人謂君知

禮意焉君篤師友好獎引後進爲立名譽如今翰林編
修顧君圖河都給事中史君申義皆是也旣得病彌留
令洗硯磨墨嗅之復令烹佳茗以進自謂香沁心骨口
占二絕句大笑呼奇絕而逝康熙二十七年四月十一
也年止五十所著詩文集合二十四卷行於世一子曰
兼

碑銘

追崇揚王神道碑銘

明宋

濂

景濂
金華

皇帝恭膺大寶式展孝思旣追崇祖宗四代帝號建立
太廟復念皇太后之所自出追封外王父爲揚王外王

江都縣志

卷之三十一

藝文上

三

母爲揚王夫人建祠於太廟之東歲時遣重臣致祭近
有來自淮陰者言王墓在盱眙如故上聞之悲喜交集
卽詔內臣及圓邱署令往祭而修治之置灑掃之戶凡
三護視塋域且命詞臣撰文以樹諸神道臣濂伏讀御
製王之行若曰王姓陳氏世爲維揚人不知其諱當宋
之季名隸尺籍伍符中從大將張世傑扈從祥興帝駐
南海至元己卯春世傑與元兵戰師大潰士卒多溺死
王舟亦爲風所破幸脫死達岸與一二同行者累石支
破釜煮遺糧以療饑已而糧絕計無所出同行者曰我
等自分必死聞鬪髀山有死馬共烹食之縱死亦得爲

飽鬼不識可乎王未及行疲極輒晝睡夢一白衣人來謂王曰汝慎勿食馬肉今夜有舟來共載也王以爲偶然未之深信俄又夢如初至夜將半夢中髣髴聞櫓聲有衣紫衣者以杖觸王之勝曰舟至矣奈何不起王驚寤身忽在舟中見舊所事統領官時統領已降於元元將畏舟壓凡有來附者擲棄水中統領憐王亟藏之艫板下日取乾餼從板隙投之王掬以食度王之渴乃與王約以足撼板王卽張口向隙受漿居數日事將洩皆彷徨不自安忽颶風吹舟盤旋如轉輪久不能進元將大恐徧求於崇祈者不可得統領知王能巫術遂白而出之王仰天叩齒若指麾鬼神狀風濤頓息元將喜因飲食之至通州賚王數鉅魚送之登岸王歸維揚不樂爲軍伍避去盱眙津里鎮擇地而居以巫術行王無子生二女長適季氏次卽皇太后晚以季氏長子爲後年九十九歲而薨遂葬焉今墓是已臣濂聞之君子之制行能感於人固難而能通於神明爲尤難今王當患難危急之時神假夢寐挾之以升舟非其精誠上通於天何以致神人之祐而至於斯也王之羣行其詳雖若不可知舉此而推之則其積德之深厚斷可信矣是宜慶

鍾聖女誕育皇上以啟國朝億萬年無疆之基於戲盛

哉昔日史臣贊堯之德首以親九族爲言其效至於黎民於變時雍之盛然九族之中母族居其三皇上以念母之故思王不能忘封以王爵享以祠廟今又樹碑墓道以紀其異行是皆以孝治天下也將見四方嚮風咸知以孝自勉皞皞熙熙臻夫隆平之治不難矣臣濂旣序其事復再拜稽首而獻銘曰

皇帝建國克展孝思疏封母族自親而推錫爵維揚地邇帝畿立廟崇祀元冕袞衣痛念宅兆卜之何墟閭師來告今在盱眙皇情悅豫繼以涕洟卽詔禮官汝往葺治毋俾堯豎跳踉以嬉惟我揚王昔隸戎麾瘁風蕩海

糧絕阻饑天有顯相夢來紫衣挾以登舟神力所持易死爲生壽躋期頤積累深長未究厥施乃毓聖女茂衍皇支蘿圖肇開鴻祚峩巍日照月臨風行電馳自流徂源功亦有歸無德弗酬典禮可稽聿昭化原扶植政基以廣孝治以信民彝津里之鎮王靈所依於昭萬年視此銘詩

銘

揚州蓮花漏銘

宋 韓琦

慶曆六年五月日揚州新作漏刻成知軍州事資政殿學士右諫議大夫韓某乃爲銘曰

天運雖大信則不渝智者善作器乃冥符以漏考辰始
乎渴烏以箭定刻發乎金徒覆視晷景弗差毫銖節候
既正鼓鐘以孚晝訪爾治夜安爾居政則不怠監哉挈
壺

揚州府譙樓鐘銘

明羅玘景明南城

宏治五秋誰尸此州長清房侯侯耳城譙惟鼓其朝亦
鼓其宵宵朝匪鐘四紀春冬民罹歲凶凶占厥聲民胥
告鳴侯夫屬能能簿馬進是治其釁登簾斯震震聲四
遠實自侯發侯政桓撥撥災爲祥豐年穰穰地久天長

江都縣志卷之三十一

江都縣知縣五格黃湘重修

藝文下

詩 五言古

廣陵岸北送使

梁陰鏗子堅 武威

行人引去節送客艤歸艫卽是觀濤處仍爲郊贈衢汀
洲浪已息邗江路不紆亭斯背櫪馬檣轉向風烏海上
春雲雜天際晚帆孤離舟對零雨別渚望飛鳧定知能
下淚非但一楊朱

稍秋曉坐閣遇舟東下揚州卽事寄上族父江

江都縣志

卷之三十一 藝文下

一

陽令

唐盧僎

虎嘯山城晚猿鳴江樹秋紅林架落照青峽送歸流歸
流赴淮海征帆下揚州族父江陽令盛業繼前修文掩
崔亭伯德齊陳太邱時哉惜未與千載且爲儔憶昔山
陽會長懷東上游稱觴阮林下賦雪謝庭幽道濃禮自
略氣舒文轉道高情薄雲漢酣態坐芳洲接席復連軫
出入陪華輶獨善與兼濟語默奉良籌歲月歡無已風
雨暗颼颼掌憲時持節爲邦邈海頭子人惠雖樹蒼生
望且留微躬趨直道神甸黍清猷仙臺適西步蠻徼忽
南浮宇內皆安樂天涯獨遠投忠信徒堅仗神明豈默

訓觀生海漫漫稽命天悠悠雲昏巴子峽日遠吳王樓
懷昔明不寐悲令歲屬周喟無排雲翮暫得抒離憂空
灑霑紅淚萬里逐行舟

淮南秋夜呈周侑

李嶷

天淨河漢高夜閑砧杵發清秋忽如此離恨應難歇風
亂池上萍露光竹間月與君共遊處忽作他鄉別

之廣陵宿常二南郭幽居

李白

綠水接柴門有如桃花源忘憂或假草滿院羅叢萱暝
色湖上來微雨飛南軒故人宿茅宇夕鳥棲楊園還惜
詩酒別深爲江海言明朝廣陵道獨憶此傾樽

江都縣志

卷之三十一 藝文下

二

敘舊贈江陽宰陸調

秦伯讓天下仲雍揚波濤清風蕩萬古跡與星辰高開
吳食東溟陸氏世英髦多君秉古節嶽立冠人曹風流
少年時京洛事遊遨腰間延陵劍玉帶明珠袍我昔鬪
雞徒連延五陵豪邀遮相組織呵嚇來煎熬君開萬叢
人鞍馬皆辟易告急清憲臺脫余北門厄間宰江陽邑
剪棘樹蘭芳城門何肅穆五月飛秋霜好鳥集珍木高
才列華堂時從府中歸絲管儼成行但苦隔遠道無由
共銜觴江北荷花開江南楊梅熟正好飲酒時懷賢在
心目掛席拾海月乘風下長川多沽新豐醪滿載剡溪

船中途不遇人直到爾門前大笑同一醉取樂平生年
一本作泰伯讓天下仲雍揚波濤清風蕩萬古跡與星辰高開吳食東溟陸氏世英髦夫子特峻秀岳立冠人曹風流少年少京洛事遊遨驂驪紅陽燕玉劍明珠袍一諾許他人千金雙錯刀滿堂青雲上望美期丹霄我昔北門厄摧如一枝蒿有虎挾雞徒連延五陵豪邀遮來組織呵嚇相煎熬君披萬人叢脫我如龜牢此恥竟未刷且食綏山桃非天雨文章所祖託風騷蒼蓬老壯髮長策未逢遭別君幾何時君無相思否鳴琴坐高樓淥水淨窓牖政成聞雅頌人吏皆拱手投刃有餘地迴車攝江陽時從府中歸絲管儼成行但苦隔遠道無由共銜觴江北荷花開江南楊梅鮮掛席拾海月乘風下長川多沾新豐醪滿載剡溪船中途不遇人直到爾門前大笑同一醉

留別廣陵諸公

憶昔作少年結交趙與燕金羈絡駿馬錦帶橫龍泉寸

江都縣志

卷之三十一

藝文下

三

心無疑事所向非徒然晚節覺此疎獵精草太元空名束壯士薄俗棄高賢中回聖明顧揮翰凌雲烟騎虎不敢下攀龍忽墮天還家守清真孤潔厲秋蟬煉丹費火石採藥窮山川臥海不關人租稅遼東田乘興忽復起棹歌溪中船臨醉謝葛疆山公欲倒鞭狂歌自此別垂釣滄浪前

發廣陵留上家兄兼寄上長沙 韋應物

京兆

將違安可懷宿戀復一方家貧無舊業薄宦各飄颺執版身有屬淹時心恐惶拜言不得留聲結淚滿裳漾漾動行舫亭亭遠相望離晨苦須臾獨往道路長蕭條風

雨過得此海氣涼感秋意已違况自結中腸推道固當
遣及情豈所忘何時共還歸舉翼鳴春陽

廣陵行

雄藩鎮楚郊地勢鬱岌雙旌擁萬戟中有霍嫖姚海
雪助兵氣寶貨益軍饒嚴城動寒角晚騎踏雙橋翕習
英豪集振奮士卒驍列郡何足數趨拜等卑寮日晏方
云罷人逸馬蕭蕭忽如京洛間遊子風塵飄歸來視寶
劍功名豈一朝

初發楊子寄元大校書

悽悽去親愛泛泛入烟霧歸棹洛陽人殘鐘廣陵樹今
朝此爲別何處還相遇世事波上舟汭洄安得住

江都縣志

卷之三十一

藝文下

四

廣陵遇孟九雲卿

雄藩本帝都遊士多俊賢夾河樹鬱鬱華館千里連新
知雖滿堂中意頗未宣忽逢翰林友歡樂斗酒前高文
激頽波四海靡不傳西施且一笑衆女安得妍明月滿
淮海哀鴻逝長天所念京國遠我來君欲還

湖中送敬十使君適廣陵

杜

甫

子美襄陽

相見各頭白其如離別何幾年一會面今日復悲歌少
壯樂難得歲寒心匪他氣纏霜匣滿冰置玉壺多遭亂
實漂泊濟時曾琢磨形容吾校老膽力爾誰過秋晚岳

增翠風高湖湧波騫騰訪知已淮海莫蹉跎

廣陵

權德輿載之畧陽

廣陵實佳麗隋季此為京八方稱輻輳五達如砥平大
旆映空色笳簫發連營層臺出重霄金碧摩灝清交馳
流水轂廻接浮雲甍青樓旭日映綠野春風晴噴玉光
照地顰蛾價傾城燈前互巧笑陌上相逢迎飄飄翠羽
薄掩映紅襦明蘭麝遠不散管絃閑自清曲士守文墨
達人隨性情茫茫竟同盡冉冉行何營且申今日歎莫
務身後名肯學諸儒輩書窗誤一生

晚步楊子游南塘望沙尾

劉禹錫夢得彭城

江都縣志

卷之三十一 藝文下

五

淮海多夏雨曉來天始晴蕭條長風至千里孤雲生卑
濕久喧濁寒開偶虛清客遊廣陵郡晚出臨江城郊外
綠陰滿江中沙嶼明歸帆翳盡日去權聞遺聲鄉國殊
渺漫羈心自懸旌悠然京華意悵望懷遠程薄暮大山
上翩翩雙鳥征

廣陵曲

馬戴虞臣

蔥蘢桂樹枝高繫黃金羈葉隱青蛾翠花飄白玉墀上
鳴間關鳥下醉遊俠兒煬帝國已破此中都不知

揚州寒食贈屯田張員外成均吳博士同年殿

省柳丞

宋王禹偁元之鉅野

前年寒食節待詔直內庭休暇百官出獨掩深嚴局近
侍不敢醉賜酒空滿瓶閑就通中枕時聞索上鈴思入
無何鄉兀然欲忘形去年寒食日滌上忝專城山歌喧
里巷春物媚池亭永陽溪水綠琅邪山色青謫宦自消
遣不敢誇獨醒徃徃取官醞時時對花傾醉來念身世
翻使淚縱橫今年蒞淮海時節又清明堆案有留事聽
歌無懽聲胥徒費簿領使客煩送迎徃牢未空歇堰埭
勞修營衰病力不支懶慢性已成虛花滿雙目素髮添
幾莖酒肴畧無味妓樂固難聽誰言寒食下終日取茶
烹屯田布素交屈此關市征昔年同應舉典衣飛巨觥
江都縣志

卷之三十一 藝文下

六

博士東觀客求官得步兵況且丹陛前同爲出谷鶯殿
丞尹我邑桑枝復弟兄吏隱掌麤茗終朝看道經三賢
宴會少七夕休假并何不策我馬廢苑尋放螢何不蕩
我舟樓基訪摘星三春景欲盡九曲波始平居然逼吏
役頓此阻交情老態厭春華病身憂宿醒如水若不改
藉糟亦胡甯解印蓄素志吟詩露丹誠維揚非所愛有
便卽歸耕

揚州池亭卽事

冥心闕羣動亦各取所安胡爲名利人戚戚常鮮歡吾
生四十四結珮呼郎官掌言入綸閣待詔直金鑾匪謂

得祿少所嗟行道難前年謫滁州憂畏雙鬢殘賴有琅
琊溪時濯塵纓冠朝僉徙淮海任重力易殫君恩詎可
報感激涕汎瀾民瘼不能治惻隱情悲酸况復多病身
名宦心已闌歸田未果決懷祿尚盤桓公退何所適池
亭一凭欄旭日媚春草微風生鳴湍呵童勿挾彈留客
不持竿用冀魚鳥馴熙熙肆游觀神仙未可學吏隱聊
自寬孤吟刻幽石此義非考槃

依韻和劉原甫舍人赴揚州途次贈予翩翩河

中船

梅堯臣聖俞宣城

我船緩而西君船迅而東緩迅各所尚不意中途逢驥

江都縣志

卷之三十一

藝文下

七

馬方騰雲野鶴還就籠亦言出處異同是天地中我豈
不知命人空嗟其窮何當遂逸性川上作釣翁

渡楊子

王其姓者助扶柁安然已濟喜而有作

陳造

濤江吞天去委此舟一葉前之恃勇往微命幾顛踰淮人
纜維復解宿浪俄妥帖北風不滿帆晴空欲凌躡淮人
鄉情重相爲細扶楫浮玉瞥眼過笑禪得利涉窮塗有
快意十北收一捷龍公不常喜未用輕吾怯

適揚州

明袁

凱景文華亭

淮海表茲郡東南誠要津近代亦雄藩親王蒞斯民荆
吳自茲入燕趙亦來臻舟車無停運孳貨若邱墳冠蓋

充鄜里歌吹咽城闐美酒既如澠梁肉夾道陳休養近
百年富庶難具論大道無恒處榮悴每相因風烟一披
拂奄忽同埃塵空屋嘯蹲鴟崩垣走驚麀萑苻交四野
訛骼儼若新貴賤不復知賢愚安能分予有山陽遣經
過屬秋辰憑高肆遐覽落日無行人欲繼燕城作薄劣
愧叅軍

晚過揚州

楊士奇

泰和

朝辭儀徵壩暮過廣陵城前汀夾暝色遠渡聞鐘聲微
微初月輝湛湛天宇澄仰首望北辰衆星燦然明商飈
從西來忽忽涼思生掩篷坐終夕慨然念修程

江都縣志

卷之三十一

藝文下

八

揚州別宗子相

王世貞

元美
太倉

迴軫出君方修途意彌惻浮雲莽互馳奄然爭太息中
夜理夙炊惋戀不能食往邁豈乏歡念若遺行跡握手
諧奇慕安能顧掩抑舉世各自矜娟倩無終極脈脈竟
何言管此眉間色

廣陵晚春雨中作

國朝

王世祿

西樵
濟南

春心視庭梅新綠已復吐坐覺孤館靜鳴雨連薄暮回
首中春杪繁花正滿樹輕颺雨中迴幽堦亂紅素春杯
眷暝色已歎流光驚况乃芳華歇行見穠陰布卽事驗
推遷悵然感流寓

過江距廣陵三十里值雨寄王十一使君

汪琬

茗文長洲

天陰生暝寒楚客傷寂寞微雨江上來江村杏花落燕歸柳塘社漁返瓜洲郭何處遠鐘聲孤舟且須泊

新秋楊子橋舟中

王士禎

阮亭濟南

秋聲渡楊子一雨涼颺發秣陵暮潮歸瓜步殘鐘歇無事悲客心曠如久離別橫笛起宵闌孤篷見微月

江都池烈女詩

有序

吳嘉紀

野人泰州

烈女姓池吳廷望未婚妻也廷望從軍南征死望父素無賴欲以女昏其次子女之父兄

江都縣志

卷之三十一藝文下

九

憚之屬姨母語女且勸之嫁女不從自縊繩斷者三竟縊死邑人張琬爲作傳紀附以詩

旌旆搖野風戰馬顧羣嘶壯士志封侯不娶娉婷妻娉婷方盛年桃花三月時三月轉盼盡征戰返無期無端夢沙場血汚泣遊魂覺來信已至夢寐竟成真招魂親剪紙涕淚濡羅巾朝爲未嫁女暮稱未亡人蝴蝶飛過墻栩栩尋春芳安得久踟躕鬼伯隨姨孃姨孃是尊長出言何不莊令人亂匹配人生豈牛羊烏棲城郭黑三星檐前明壁上青一燈炤耀人嚴妝生小不知路死路行最能永從黃泉伴三結朱絲繩鄰舍聞此變日出走

來看從未識女面今日見容顏一枝紅桃花霜雪色尤
鮮問女首何飾夫家聘時簪聘時更何物玲瓏雙耳環
女意何所嚮面南身裴徊巾帶微颺揚如上望夫臺問
女住何處草屋女所居草屋有此女此女天下無鴛鴦
不擇水泥滓產明珠商人爭殯葬酌酒多士夫酒酌起
黃沙沙場鬼還家還家徒夜遊得妻不得侯始悲謾好
勇生死滋繁憂傳戒後世人慎勿把戈矛

北行過維揚答同學諸子

王典

備五
仁和

春風忽已起念我已壯年慨然奮投筆鼓櫂遊幽燕乘
時貴自力安敢輕時賢我友敦厚誼贈行紛滿篇慰勉
江都縣志

卷之三十一 藝文下

十

各有意至性何纏綿覽之心自感懷抱適遠天大哉君
子惠終古當流傳

里中懷古詩八首

史申義

蕉飲
江都

董仲舒

廣川有大儒出身事漢武天人三策對略已動英主不
肯媚曲學同列多懷怒妒旣起公孫讒復遭主父鬱鬱
膠西相落落江都輔獨欲尊孔氏百家斥不取卓哉漢
儒宗絕學邈千古感士賦不遇無人可告語擬對高廟
災危幾迫刀俎私家撰官書得禍可勝數班氏傳西京
奮筆特褒詡從來悲賈董才命益相忤

陳孔璋

廣陵陳孔璋建安推傑立事主得魏武不減魚水密始
佐袁本初詆操乃草檄頭風幸少愈闔醜已被斥曹公
捐宿憾遂使管記室翩翩致足樂一一逞文筆何進召
外兵孔璋諫尤力既與進意忤長揖乃逕出英風尚如
生豈任簡書役行人詞光國鄭僑庶其匹幕府既推高
詞賦殆百一七子逝最先斯人重可惜

謝安石

謝公擁節旄談笑鎮揚州一門佳子弟珠玉充道周翩
翩裙屐間賓客皆上儔絲竹與山水癖好聯清游雖有
江都縣志 卷之三十一 藝文下 七
期功戚亦不廢歌謳兒輩乃破賊棊局了不收縱然屐
齒折彌覺襟韻優想當擁鼻時豈爲富貴謀奈何遘流
言小草竟蒙羞起捋桓伊鬚聞笛涕橫流嗟哉東山志
華屋俄山邱蒼生如公何百身莫可留羊曇鞭西門馬
行亦悠悠乘醉發大慟茫茫叢百憂長吟嘯虎句千載
難爲酬

昭明太子

梁武生八男昭明王國器簡文亦多才是其同母弟文
學篤友于大與丕植異湘東眇愁予蘭陵嗟正士岳陽
竟召兵骨肉也多忌厥考旣好佛法門同不二由彼清

淨懷妙義詳二諦小字曰維摩佳名夫何愧文選精采
擇當時已炙膾淵明賦閑情譏摘戒淫麗獨不刪洛神
甯無愆禮義從古著述難人言良可畏至今曹憲巷高
樓猶特峙

鮑明遠

顏謝無優劣文章並冠冕延年不自信私問鮑明遠美
哉鮑生才不因門閥顯史官何無識乃以人微貶脫非
虞散騎生平無可纂相時善投主致身非所短恥同燕
雀羣才也思一展如何遭梁武身亦長偃蹇文章有何
罪蓋由時命舛惻然松柏篇憂生卒未免至今河清頌
江都縣志 卷之三十一 藝文下 三
讀者猶稱善不獨報妹書情文多繾綣一參臨海軍難
脫虎口險

何仲言

能詩何水部言尋東閣梅夙與陰子堅齊名在梁臺頗
怪吳叔庠相結成禍胎如何動詩興竟爲削奪魁不均
不遜者蕭衍生嫌猜文字不結主終身遂沈埋涉世無
善策詩張才不才比者江與鮑賦詩不求佳此公乃護
短隱侯知其懷隸事雖未盡卒使中情乖人無天子緣
賦命實不諧從來造化意尤忌多安排我今披遺集太
息猶低回差喜衡山侯婦書盈瓊瓊東陽日三復黃門

貶何哉

杜牧之

昔者牛僧孺淮南節度使幕府既多賢尤愛杜書記輕狂一書生醉臥平康肆公既重生才不忍違生意密使邏卒護夜報平安字某日又某日書記宿某氏杜生懵不知公前猶深諱公勅邏者帖一一出相示衆賓皆歎立杜生乃伏地慟哭至失聲爲下百斛淚古者賢豪人憐才乃如是士苟有胷腹得無感遺事低首奇章公我今仍雪涕

歐陽永叔

江都縣志

卷之三十一 藝文下

三

堂堂歐陽公宋代稱大賢清風標六一琴酒尤愛憐千卷金石錄至與共食眠平生密酬唱敬亭老都官歐梅晚齊名子美子野間尤愛石曼卿秘演同華筵如何感聚散掩袂啼痕潛嗚咽在文字悲傷盈百端回憶平山堂賓從相追攀放舟邵伯湖暮采荷花還適助文酒興一開醉翁顏迄今四十里莫覓水天寬猶幸戶牖啟望見江南山秀色列眉黛一一梳烟鬟風月起喚公長司山水權魂魄應戀此文章相流傳

議復保障湖舊蹟

唐繼祖

序皇江都

漢守鑿陂塘水及崑邱麓山農賤芋魁魚稻歲果腹決

防始何年謠啄阻興復茲湖僅見存淺淖餘一曲豈惟
灌漑艱形家頗頻蹙誰能抉搜爬千頃豁心目由來慮
始難勇斷在司牧作歌待采風因聲倩黃鵠

七言古

江都夏

隋虞茂

長洲茂苑朝夕池映日含風結細漪坐當伏檻紅蓮披
雕軒洞戶青蘋吹輕幌芳烟鬱金馥綺簷花簾桃李枝
蘭茗翡翠但相逐桂樹鴛鴦恒並宿

琴歌揚州送別

唐李頎
洛陽

主人有酒歡今夕請奏鳴琴廣陵客月照城頭烏半飛
江都縣志 卷之三十一 藝文下 古
霜淒高樹風入衣銅爐花燭獨增輝初彈淥水後楚妃
一聲似動物皆靜四座無言星欲稀清淮奉使千餘里
敢告雲山從此始

李周彈箏歌

淮南韋太尉席上贈

吳融
子華山陰

古云絲聲不如竹又云竹聲不如肉乃知此語未必然
李周彈箏聽不足聞君七歲八歲時五音六律皆生知
就中十三弦最妙應官出入年方少青驄慣走長楸間
幾度承恩蒙急召鴈字斜行近御筵鏘金戛羽凌霏烟
始似五更殘月裏淒淒切切清露蟬又如石罅堆葉下
泠泠瀝瀝蒼崖泉鴻門玉斗初向地織女金梭飛上天

有時上苑繁花發有時太液秋波濶當頭獨坐撻一聲
滿座好風生拂拂天顏開兮聖心悅紫金白珠霑賜物
出來無暇更還家且上青樓醉明月年將六十藝轉精
自寫黎園新曲聲近來一事還惆悵故里春荒烟草平
供奉供奉且聽語自昔興衰看樂府祇如伊州與梁州
盡是太平時歌舞旦夕君王繼此聲不要停弦淚如雨

還揚州許書記家集

許渾孫進家集得官

宋王禹偁

君不見近代詩家流胡爲蹇滯多窮愁孟郊顛顛死逆
旅浪仙斥逐長江頭張生漂泊冬瓜堰徒云輕薄萬戶

江都縣志

卷之三十一

藝文下

五

侯浩然無成鹿門去李洞慟哭昭陵休生無風教興王
化死無勲爵貽孫謀可憐詩道日已替風騷委地何人
收高陽許公精六義獨向聖朝生後嗣因將先集進九
重高步金臺曳珠履祖德光輝聖主知府尹賢明丞相
子時維揚權牧卽故中令薛相之子廣陵郡大古九州記室官清外三
事遂令天下學詩人健羨君家窮四始我來迎侍游江
都玳筵往往陪歡娛遂求家集恣吟諷海波乾處堆珊
瑚因思賈孟數家一何苦詩鬼瞿瞿餒無主子孫淪沒

忝爾祖

廣陵大雪

韓琦

淮南常歲冬猶燠今年陰沴何嚴酷黑雲漫天一月昏
大雪飛揚平壓屋風力軒號助其勢擺撼琳琅摧凍木
通宵徹晝不暫停堆積樓臺滿溪谷有時造出可憐態
柳樹梨花亂紛撲乘溫變化雨聲來度日堦庭恣淋漓
幾縈寒霰不成絲驟集疎簷還挂瀑螿蛙得意欲跳擲
幽鷺無情成挫辱鱗魚江叟冰透篔賣炭野翁泥沒輻
閭閻細民誠可哀三市不喧游手束牛衣破解突無烟
餓犬聲微饑子哭我聞上天主時澤亦有常數滋農穀
膏潤均於一歲中是謂年豐調玉燭此來盛冬過爾多
却慮麥秋欠霑足太守憂民仰天祝願解氛霾看晴旭

江都縣志

卷之三十一 藝文下

六

望晴不晴無奈何擁被醉眠頭更縮

東坡先生移守廣陵以詩往迎先生以淮南旱

書中教虎頭祈雨法始走諸祠卽得甘澤因

爲賀

晁補之

無咎
鉅野

去年使君道廣陵吾州空市看雙旌今年吾州歡一口
使君來爲廣陵守麥如櫛髮稻立錐使君憂民如已饑
似聞維舟禱靈塔如絲氣上淮西睢隨軒膏澤人所待
風伯何知亦前戒虎頭未用沈滄江龍尾先看掛清海
爲霖功業在傅巖如何白首擁彤幘世上讒夫亂紅紫
天教仁政滿東南青袍門人老州佐於世無成志消惰

封章去國人恨公醉笑從公神許我瓊花芍藥豈易逢
如淮之酒良不空一酌孤鴻烟雨曲平山堂上快哉風

楊子江阻風

王令 逢原廣陵

楊子江風十月初西駕巨浪東無隅常憂傾搖地為動
意欲起塞天無虛大舟不行就繫岸小舟分去爭得魚
舟中壯士起坐笑有酒更為斜陽酌

楊子江頭遇仙行

元吳萊 淵穎浦江

晴沙獵獵吹林莽日晚南犇命如縷延秋門上烏更啼
楊子江頭暗風雨就中五馬一馬龍獨據滄海超河宗
塵侵犀筋不復飫鬼瞰寶玦難為容蓬萊仙人按城堡

江都縣志

卷之三十一

藝文下

七

蕭國芎藭何足道氏族無憑指素波刀圭不用採靈草
萬里蒼茫豈所聞須臾變滅但荒雲東南王氣今溟漠
夢入三山見樓閣

分題蕪城烟雨送吳原哲教諭

明張以寧 志道古田

蕪城路年去年來自烟雨冉冉春濃濕燕絲濛濛曉暗
迷鶯樹鮑昭愁絕未歸來為畫當時斷腸賦登高悵望
正思君帆影微茫又東去

運夫謠送督運部使之揚州

邊貢 延實歷城

運船戶來何暮江上早風多春濤不可渡運船戶來何

暮裏河有牖外有灘斷篙折纜愁轉般夜妨蟲鼠日妨
漏糧冊分明算升斗官家但恨倉廩貧不知淮南人食
人官家但知征戍苦力盡誰憐運船戶運船戶爾勿哀
司農使者天邊來

廣陵行

王廷相

子衡儀封

野客回橈噴雪霜廣陵烟水春迷茫海門潮上如砭石
楊子逆捲飛濤長古來形勝眼前在人事紛靡物華改
二十四橋赤闌新祇今明月常相待荒亡之帝千餘秋
不忍言之赤子愁離宮別院七十二此生欲徧人間遊
翠華宮中夜啼烏天子詔幸維揚都九門車馬如風雨

江都縣志

卷之三十一

藝文下

六

宰相已進南廵圖諫官叩陛侍者麾玉姬被逐卜臣危
嵩靈河伯駭以走洪波不留風倒吹山鷄翡翠空如錦
誰能留住鳳凰兒彩旆初臨汴河漘飛心已入金山浦
龍舟不載羽林軍錦纜成行紫宮女宮女明粧皎白雪
却愛瑤花光艷絕不道蛾眉能悞人翻使君王棄宮闕
蕭牆禍變豈虛作斗外天狼夜蝕月千年寶井生琉璃
猶有精靈自嗚咽楚關吳口山水明紫霄終夜浮雲生
朝市變盡滄波綠不斷扁舟載客行客行繚繞隋皇堤
堤上春風楊柳齊傷心欲弔前朝事楊葉楊花路轉迷

廣陵贈楊戶曹

唐

龍蘭虞佐

戊子之秋江上行君乘短舫來將迎風檣如馬不可停
蒼烟白水空有情五月菖蒲匝江綠仍到江頭采民俗
雲津倏停使者車細雨長談照明燭周道透遲肅采齊
胸中煥爛羅珠璣昔日此城不相見今日却恨相見遲
相見何遲別何亟江籬河柳映秋色十里漕艘一呼吸

揚州春眺卽事

張元凱 左虞吳縣

紫萸村邊楊子灣黃公鑪頭使者關舟楫遠通淮北水
樓臺近見江南山高岡百尺臨官渡浮烟不盡斜陽暮
前朝楊柳幾株存寒鴉飛盡蕪城路

揚州謠二首

來復 陽伯三原

江都縣志

卷之三十一 藝文下

九

長淮千里水流過廣陵市水韻如有情蕭條咽閭里我
作使君恩未宣虛乘舸媿登仙却嫌金鼓嘈嘈響驚
起鳧鷗不近船

水融湖上郭雪擁浪花白漕流湖沒堤愁殺風帆客兩
岸禿楊倒着身年年稻熟半沉湮遠賈村農搔首去誰
知二十四橋春

揚州春

國朝 杜濬 于皇黃岡

揚州春迎春自東郭盡道今年官作春先期三日行催
索積雪泥深一尺餘倡婦挾瑟乘肩輿紅妝半露踈簾
裏不知顏色還何如春日諸官宴綵幄此曹勸酒須唱

曲請君但聽曲莫聽六街三市哭

隋堤柳行

鄒祗謨 程利武進

廣陵君子題詩客置酒邀我遊隋堤隋堤大有金城柳
十年五年新栽齊廣陵士女夙好事畫船簫鼓多佳麗
有客爲我述春游飄風飛絮滿邗溝踏青共躍丹鬃馬
載酒偏乘錦纜舟嫋嫋玉簫夜不歇熒熒絳蠟曉方流
是時隋隄映綺席千株萬株盛顏色春去烟籠白玉塘
秋來露拂黃金陌輕舟駿馬去復來魚龍曼衍生塵埃
南枝北枝折不盡青青徧種垂章臺誰知本是竹西路
一朝却被繁華誤但聞柳樹摧作薪不聞柳枝種作樹

江都縣志

卷之三十一

藝文下

三

秋風初起悲蕭條白草荒原野火燒靈和太液亦如此
棲鴉繫馬心飄搖何況樓船過楊子隔年歌吹聲寥寥
卞子自把叵羅呼我酌笑我眼前之人何不樂只今隄
畔一婆娑相對麤麤綠漸多曲苑栽花臨野岸孤帆載
酒出官河菱花荷葉紛相屬鄰舟縹緲聞絲竹雷塘長
阜總傷心禪智棲靈堪極日酒酣隨月入蕪城豈謂雅
游猶未足卞子飲我酒十斗宗子顧我意良厚何必山
水始臥遊得過園林亦不偶十步五步修竹間芙蓉叢
菊殊斑斕獨對隄柳大感激泣然舉手相追攀况復吾
徒來作客詩壇酒人共朝夕倡條冶葉看成圍墮珥遺

簪醉一石須臾酒罷歌歸休願今與子長無憂隄柳種
來千萬樹年年歌吹古揚州

庚戌早春雪中寄廣陵宗梅岑 王士禎

一冬不雪春融融江梅岸柳俱空濛黃綢衾暖睡初足
起看牕紙何矐矐蠻奴失喜縛雙帚走報王戲勞天工
開門三寸沒堦砌拂空六出縈簾櫳舟膠浦凍人跡絕
天色慘慘雲而風銅餅筑響蟹眼沸地爐火蒸獸炭紅
故人昔寄東原圖漁灣窈窕橋梁通快雪固佳晴亦好
草堂正與圖中同蕭晨晝雪復好手能以粉墨摹虛空
前年幽州大風雪馬毛如蝟鳴雕弓白檀山高鷹集疾
江都縣志

卷之三十一 藝文下

三

狐兔殺伐無留蹤故人再寄蕭郎畫寒江釣雪推烟篷
展看忽憶東原客醉吟禁體追穎翁適客江淮意不樂
悵望百里無由逢何時笳笳挂驢背踏雪直過東原東

停帆詩爲廣陵潘楚吟賦

陳維崧

其年
宜興

楚吟一生湘沔客我亦年年愛行役浙瀝迎潮慣權船
犇渾放溜時揚席此時帆影最繽紛半掠汀烟半浦雲
屑瑟細鋪鴉萬點冥濛低織鴈千羣南船北艦何時了
米估茶商競言好倏忽銀濤雪浪來旁人亟勸收帆早
黃牛白狗萬重灘怪雨盲風頃刻間周瑜莫逞乘風便
王濬方知下水難江邊老翁殊可慕茅齋似舫沿江住

嬾散多年不出門賣魚或到前村去碧鱸紅樹一番新
水驛秋容處處勻世間多少風波苦輸爾停帆淡蕩人

廣陵送王子備五之燕

紀映鍾

伯紫
江甯

東風吹花天不雨鶯銜落紅飛遶樹登高看天天欲低
千里萬里草生路江北暮春柳亦花壯士一日輕天涯
安能慷慨生咨嗟夕陽未下馬影斜五更櫂聲驚曉鴉
憶昔壯遊興足誇我歸江東君北往相逢欲別添惆悵
花前呼酒雨忽來狂飲風雷助悲壯長安蕩蕩多塵埃
其中豪傑安在哉衛公當日舞劍臺插天青岫烟雲開

柳花歌寓蕪城作

毛奇齡

大可
蕭山

江都縣志

卷之三十一

藝文下

三

春風濯濯江南路吹過邗關到瓜步邗關三月春草長
青樓大道怨春陽陽春初開日杲杲大道花飛一何早
清明漸近細雨來繞樹游絲墮縹緲游絲縹緲繞如霧
飛入隋堤柳條住隋隄柳色青瓏璵媿媿流鶯啼不去
流鶯啼處停玉鑣依依拂面盡長條揮鞭旣度紅欄曲
驅車還上綠楊橋紅欄綠柳心斷絕隋苑隋隄有離別
新聲三疊何處吟弱線千條倩誰折可憐青草及春暮
可憐綠柳低還仆青樓曳翠縈酒壚白馬連錢繫歸渡
低枝毵毵接長坂高枝蓬蓬白花滿茫茫飛雪繞去遲
冉冉輕綿骨來晚翩隨晚蝶骨朱花緩向春烟拂暮鴉

幾時飄飄落西苑幾時流蕩去南家南家西苑兩相棄
流蕩飄飄日顛顛春風吹去不上天春燕銜將復垂地
初翻積雨障輕塵更度粧樓裊素茵滿眼離披不知處
愁殺東西行路人

紅橋春遊戲爲隔離梅花歌

王式丹

方若寶應

梅花欲開未開時西行漫浪天之涯還尋烟花及三月
猶有春風千萬枝可憐揚州好風景紅橋橋畔斜陽影
連岡壓水園林多一川霞浸燕支冷畫舫爭裝歌吹歸
名花寂寞誰管領我亦來游盪小航柳絲迎客何飄揚
拉伴漫思載酒地眼前無處容清狂隔離遙見花幾樹
江都縣志 卷之三十一 藝文下 三
牽舟便向花旁住聽歌都是懊懣歌偷眼穠華奈汝何
似聞小鳥向花語籬邊有客潛窺汝低鬟障袖雲橫渚
芳氣幽通心暗許誰教咫尺空延伫相逢且喜得相憐
留春莫放東風顛更待花陰一醉眠

送郭于宮暫還廣陵

青林濕烟薄芳草薰晨風撫時乍言別爲君心忡忡十
年溫卷不稱意爛醉狂歌劍斫地如箕雙眼向誰青獨
抱赤文十萬字飛身訴天天爲開搔首舊鄉忽臨睨一
鞭踢月度關山江北江南緬遙企千金不惜賣明珠君
誰須兮雲之際日月如電流南中莫久留雄飛豈能甘

雖伏尺蠖要當化長虯飲君酒爲君歌篋中光燄排星
河西北高樓正嵯峨凌空衣袂風舉舉天上桂花應有
主鷄雞三唱公起舞

擬韓魏公芍藥園宴客歌

魏嘉琬 篋中
儀徵

司花刺史揚州春嬌紅媚綠嬌舞塵此時誰截太平管
吹貫好花風力新醉面朝霞褪深淺紫玉長綃金縷碾
芍藥此種非人間龍爲耕烟鳳鉏蘚闔苑香迎太乙仙
瓊枝瑤梗宜近天天意以爲相公瑞於戲應者非常賢
星占台景揚州路刺史張筵命歌舞四枝欵發如有神
此日得賓王與陳僚倅名高游馬貴邂逅豈卽非天人

江都縣志

卷之三十一

藝文下

十四

官伎花奴欵出幕文字紅裙飲並樂簪花勸酒席飛觥
簫鼓闐喧月驚落金魚玉珮天府同姓名躍隱紗籠中
請駕揚濤天上發迴看舉玦光瓏璵

瓜渚阻雨呈菜翁

郭元鈺

于宮
江都

豈有空江鬼神入啾啾夜雨閑愁濕飛夢江南紫翠重
冷雲正護鶯聲澗江如颺母弄囊鏡石郎玉女誇衫笠
瓦官閣外百尺浪未若丁三廟前急廟中亦有礮礮聲
欲鬪喧轟吟五粒烏狔劃水鏡面碎海鳥吹波總干立
戲驅無限白頭翁向我傾身俯尻揖數年閉置不依劉
四海馨聲今仰習澄江如練賦不成染指從公乞餘汁

五言律

廣陵送別宋員外佐越鄭舍人還京

唐 韋述 京兆

朱紱臨秦望皇華赴洛橋文章南渡越書奏北歸朝樹
入江雲盡城銜海月遙秋風將客思川上晚蕭蕭

客廣陵

王昌齡 少伯 江寧

樓頭廣陵近九月在南徐秋色明海縣寒烟生里閭夜
帆歸楚客昨日渡江書為問易名叟垂綸不見魚

更被奏留淮南送從弟罷使江東

劉長卿 文房 河間

江都縣志

卷之三十一

藝文下

三五

又作淮南客還悲木葉聲寒潮落瓜步秋色上蕪城王
事何時盡滄洲羨爾行青山將綠水惆悵不勝情

廣陵別薛八

一作送友東歸

孟浩然 襄陽

客有不得志棲棲吳楚間廣陵相遇罷彭蠡泛舟還檣
出江中樹波連海上山風帆明日遠何處更追攀

送奚三歸揚州

水國無邊際舟行與便風憐君從此去朝夕見鄉中余
亦離家久言歸恨不同音書若有問江上會相逢

廣陵贈別

李白

玉瓶沽美酒數里送君還繫馬垂楊下銜盃大道問天

邊看綠水海上見青山興罷各分袂何須醉別顏

寄淮南友人

紅顏悲舊國青歲歇芳洲不待金門詔空持寶劍游海
雲迷驛道江月隱鄉樓復作淮南客因逢桂樹留

揚州偶會前洛陽盧耿主簿

應物頃貳洛陽常有連騎之遊

韋應物

楚塞故人稀相逢本不期猶存袖裏字忽怪鬢中絲客
舍盈樽酒江行滿篋詩更能連騎出還似洛橋時

送元倉曹歸廣陵

官閑得去住告別戀音徽舊國應無業他鄉到是歸楚

江都縣志

卷之三十一

藝文下

三

山明月滿淮甸夜鐘微何處孤舟泊遙遙心曲違

送槐廣下第歸揚州

下第常稱屈少年心獨輕拜親歸海畔似舅得詩名晚
對青山別遙尋芳草行還期應不遠寒露濕蕪城

揚州雨中張十七宅觀妓

張

謂

正言河南

夜色帶寒烟燈花拂更然殘妝添石黛豔舞落金鈿掩
笑頻欹扇迎歌乍動弦不知巫峽雨何事海西邊

送揚州王司馬

岑

參

南陽

君家舊淮水水上到揚州海樹青官舍江雲黑郡樓東
南隨去鳥人吏待行舟為報吾兄道如今已白頭

廣陵送林宰

李嘉祐 從一趙州

清政過前哲香名達至尊明通漢家籍重識府公恩春

景生雲物風潮歛雪痕長吟策羸馬青楚入關門

和韓郎中楊子津翫雪寄嚴維

雪深楊子岸看柳盡成梅山色潛知近潮聲只聽來夜

禽驚曉散春物受寒催粉署生新興瑤華寄上才

廣陵別鄭處士

高適 達夫海蓀

落日知分手春風莫斷腸興來無不愜才在亦何傷溪

水堪垂釣江田耐插秧人生只爲此亦足傲羲皇

送萬兵曹赴廣陵

錢起 吳興

江都縣志

卷之三十一

藝文下

三

秋日思還客臨流語別離楚城將坐嘯郢曲有餘悲山

晚桂花老江寒蘋葉衰應須楊得意更誦長卿辭

送蔣員外端公歸淮南

韓翃 君平南陽

淮南芳草色日夕引歸船御史王元貺郎官顧彥先光

風千日暖寒食百花燃惆悵佳期近澄江與暮天

途次維揚望京口寄白下諸公

蔣渙 長興

北望情何限南行路轉深晚帆低荻葉寒日下楓林雲

白蘭陵渚烟青建業岑江天秋向盡無處不傷心

和裴端公樞燕城秋夕簡遠近親知

竇常 中行

歲積登朝戀秋加陋巷貧宿醒因夜歇佳句得愁新盡
日憑幽几何時上軟輪漢廷風憲在應念匪躬人

送萬戶曹之任揚州便歸舊隱 戴叔倫 幼公 金壇

擬歸雲壑去聊寄宦名中俸祿資生事文章實國風聽

潮回楚浪看月照隋宮儻有登樓望還應伴庾公

泊楊子江岸 盧綸 允言 河中

山映南徐暮千帆入古津魚驚出浦火月照渡江人清

鏡悲雙鬢滄浪寄一身空憐芳草色長接故園春

曉發瓜洲 李端 正已 趙郡

曉發悲行客停橈獨未前寒江半有月野戍漸無烟棹

江都縣志 卷之三十一 藝文下 三

唱臨高岸鴻嘶發遠田誰知避徒御對酒一潸然

揚州

游宦今空返浮淮一鴈秋白雲陰澤國青草遶揚州調

饒過花下張筵到水頭崑山仍有玉歲宴莫遲留

送喬廣下第歸淮南 司空曙 文明 廣平

遙想長淮盡荒堤楚路斜戍旌標白浪罟網入青葢啼

鳥仍臨水愁人更見花東堂一枝在為子惜年華

九日廣陵同陳十五先輩登高懷林十二先輩

歐陽詹 行周 晉江

客路重陽日登高寄上樓風烟今令節臺閣古雄州泛

菊聊斟酒持萸嬾插頭
情人共惆悵良久不同遊

送沈鶴歸廣陵

賈島

家楚壻於秦携妻去
養親客行千里外
風卷一帆新夜泊
疎山雨秋吟搗藥輪
蕪城登眺作才動
廣陵人

揚州春詞

後二首一作韓翃

姚合

硤石

廣陵寒食天無霧
復無烟暖日凝花柳
春風散管弦園林
多是宅車馬少於船
莫喚遊人住遊人困不眠

滿郭是春光街衢土亦香
竹風輕履舄花露膩衣裳
谷鳥鳴還艷山夫到亦狂
可憐遊賞地煬帝國傾亡

江北烟光裏淮南勝事多
市鄆持燭入鄰里
漾船過有江都縣志

卷之三十一

藝文下

堯

地惟栽竹無家不養鵝
春風蕩城郭滿耳是笙歌

揚州

杜牧

牧之京兆

煬帝雷塘土迷藏有舊樓
誰家唱水調明月滿揚州
駿馬宜間出千金好暗游
喧闐醉年少半脫紫茸裘

秋風放螢苑春草鬪雞臺
金絡擎雕去鑾環拾翠來
蜀船紅錦重越橐水沉堆
處處皆華表淮王奈却回

廣陵道中

許渾

用晦丹陽

城勢已坡陀城邊東逝波
綠桑非苑樹青草是宮莎
山暝牛羊少水寒鳧雁多
因高一回首還詠黍離歌

送皇甫協律淮南從事

馬戴

辟書丞相草招作廣陵行隋柳疎淮岸汀洲接海城楚
檣經雨泊烟月隔潮生誰與同樽俎雞鸞集虎營

廣陵驛餞送留別

李羣玉

別筵欲盡秋一醉海西樓夜雨寒潮水孤燈萬里舟酒
飛鸚鵡重歌送鷓鴣愁惆悵三年客難期此處游

揚州送人

劉綺莊

毘陵

桂檝木蘭舟楓江竹箭流故人從此去望遠不勝愁落
日低帆影歸風引櫂謳思君折楊柳淚盡武昌樓

廣陵寒食夜

李中

有中隴西

廣陵寒食夜豪貴足佳期紫陌人歸後紅樓月上時綺
羅香未歇絲竹韻猶遲明日踏青興輸他輕薄兒

寒食

宋王禹偁

寒食江都郡青旗賣楚醪樓臺藏綠柳籬落露紅桃妓
女穿輕屐笙歌泛小舸使君慵不出愁坐讀離騷

寄揚州侯都監仲倫

司馬光

君實涑水

木落淮南樹秋風日夜高月臨楊子渡雪卷廣陵濤不
得同蕭散何由破鬱陶空憑人書遠未解夢魂勞

次鮮于子駿瓜洲韻

蘇轍

子由眉山

天高山近海春盡水生池禾黍多新恨川原自昔時花
存故苑麗樵出舊城隳莫望瓜洲渡曾經駐佛狸

揚州

米芾 元章太原

東風何索寞帶雪入揚州尙想遺釵雀重觀上玉鈎真
同一夢覺空憶十年遊邂逅逢孫楚酣歌慰滯留

登揚州城北門予昔侍親寓居此城下驛舍十

八年矣愴然感動

劉敞 原父袁州

昔釣城下水今來十八年居人能幾在里巷獨依然手
種成喬木躬耕有廢田悲歌顧千騎不覺涕淪漣

次揚州何安撫節機韻

丁木

送別邗江路梅花作暮愁關情何水部回首古揚州鴈
影明寒水冰漸澀去舟想應今夜宿霜月滿瓜洲

江都縣志

卷之三十一 藝文下

三

廣陵

借韻戲用文潛體

呂本中

往來六十里各是一江郊柳色團渦岸春風楊子橋好
山當斷岸野鳥度空巢一任雷塘路暮天風雨號

維揚客舍

劉克莊 潛夫莆田

久作揚州客愁來未易禁頗知邊地事愈動故園心花
譜猶堪續橋名不可尋却疑張祐輩泉下有新吟

瓜洲

元陳孚

烟際繫孤舟蘆花滿棹秋江空雙雁迴天濶一星流急
鼓西津渡殘燈北固樓商人茅店下沽酒話揚州

揚州

明汪廣洋 朝宗高郵

憶昔曾遊地於今有幾家濕雲纏戍鼓高柳聚城鴉元
鶴去無迹綠蕪愁更賒盈盈江上月何處照瓊花

瓜洲夜泊

錢宰

子予會稽

旅夜瓜洲泊秋懷浩欲沈星河與海合江漢入吳深天
塹無南北川流自古今隔花漁唱起千里故園心

送句容劉少府回揚州

楊基

孟載吳縣

家具一車輕囊書與短檠吏多離別意人有去官情帆

影江沈寺簫聲月到城竹西尋舊業烟雨綠蕪生

過瓜洲

張羽

來儀海陽

落日瓜洲渡餘寒透薄衣客囊空蕙苒春色自薔薇江

江都縣志

卷之三十一

藝文下

三

遠水東去天晴鴈北飛故人千里外昨夜夢先歸

維揚懷古

周述

崇道吉水

廣陵河上路煬帝昔曾過不見瓊花發猶傳玉樹歌臺

荒衰柳在宮廢亂螢多欲問前朝事悲風起夕波

晚過揚州

劉溥

原博長洲

長河懸落照短棹尚孤征衰柳愁邊斷殘霞雨外明人

喧楊子渡鐘動廣陵城漸去鄉關遠凄然倍旅情

清明日泊楊子江

朱諫

君佐永嘉

楊柳夾江青東風潮正平雲間旋蜃市沙際聽鼙更萬
水俱東逝孤舟更北征不知時序改今日是清明

揚州感興

金

鑾

在衛隴西

迢遞古揚州重來異昔遊春風吹酒幔日暮上歌樓夢
覺翻疑雨愁多不待秋翩翩征鴈起依舊向沙頭

瓜洲風雨不克渡江

徐階

子升華亭

未遂歸來願空驚歲月奔布帆三日雨茅屋數家村山
氣遙連海江聲近在門無緣得飛渡東望欲消魂

廣陵晚發

張時徹

惟靜鄞縣

征夫逐草露夜夜月中眠霧擁清猿嘯風吹白鴈旋有
江能繪樹無路不生烟旭日秋光淡芙蓉亦可憐

泊維揚

皇甫汸

子循長洲

江都縣志

卷之三十一藝文下

三

地是南來域江分北望賒空餘前代宇不放昔年花物
色圖丹壁春風想翠華誰憐歌舞處日暮有啼鴉

出揚子橋喜見江南山色

郭第

長洲

小艇淮南道經過無限情可憐揚子渡不見海潮生水
斷瓜洲驛江連北固城漲沙三十里樹杪亂山橫

揚州曉泊

袁宏道

伯修公安

薄霧隨風盡寒霜對酒銷芋魁騰曉市蟹子落歸潮往
事瓊花觀新溝揚子橋雖然富羅綺未必似前朝

廣陵送王太古還白下

何璧

玉長福清

我有秦淮夢雖還不是家送君隋苑上惆悵柳絲斜歸

客趁新燕遊人歎落花傷春兼惜別况復在天涯

揚州郭外

費經虞仲若新繁

扶杖出門去春郊事盡非棘生馳馬路水沒古人磯巢
毀鶯雛散天寒鶴語稀故鄉耕種早飄泊不能歸

廣陵贈別袁籜庵

國朝曹溶秋嶽秀水

聯舫邗溝路雲濤興渺然柳無經歲別月似故山圓老
淚霑歌板歸裝儉秣田桓家寒具美一飽足高眠
曾見熊幡出章華弔故宮罷傾沙市酒閑挂廣陵篷六
代鳴弓外三山拄頰中盛傳金縷曲吹徧柳條風

揚州教場寓樓坐月

杜濬

江都縣志

卷之三十一 藝文下

三

鼓角竟無聲愁人愛晚晴寺樓雙眼闊烟海一燈行玉
笛悽應斷銀蟾缺更明坐深無歎息真想靜中生

早渡楊子

毛奇齡

孤嶼浮紅旭高雲蕩碧虛揚帆廻北固破浪出南徐曉
樹迷三楚春潮渡伍胥蘆碕何處是湛湛欲愁予

發維揚

嚴繩孫蓀友無錫

輕舫春流上烟光淨客衣岸知緣海澗山自渡江稀細
路花將盡空村燕不飛浮家吾自可白首共漁磯

汪舟次雨邀劉公敵唐耕塢泛舟紅橋各賦

施閨章

出城通野艇鼓柁過名園只爲論文友重開對雨尊亭
臺緣浦淑雲樹接江村悵望平山路風流二老存

九日揚州文星閣登高

鄧漢儀 孝威 泰州

徑僻人稀到林深菊未荒吾儕尊九日天地老斜陽渺
渺江淮路蕭蕭吳楚鄉但宜傾濁酒無力問滄桑

重遊邗上途中寄懷周櫟園先生

吳嘉紀

病裡又爲客登車聞曙雞海明殘月上野濶數星低憶
昔吟梅下同君在竹西來朝過舊館碧草正萋萋

廣陵懷古 錄二

許承家 師六 江都

江都縣志

卷之三十一

藝文下

姜

漢室藩封貴江都相廣川黃雲遮第宅朱邱老才賢但
有膠西怨誰憐博士蘊門前雙井在嗚咽動寒蟬
廣陵征戰地都督護諸軍甲仗連山閣旌旗蔽海雲淮
南消伏莽建武自奇勲白馬塘西後寥寥千載聞

康山 錄二

宗 觀 鶴問 江都

幽從喧境得極目望躋攀絕頂殊難狀過江無此山陰
晴圖障異歲月劫灰閑吾意耽寥廓孤遊欸欸還
檜老三間屋鄒枚昔並登舊遊催急景新築最高層霞
氣截山雨秋蟲亂樹燈六朝烟水外危檻幾回凭

瓜洲遇雪

曾 皖 楚田 甯夏

欲濟誠何事，羈愁昧死生。崩沙翻埽影，急雪亂江聲。市罷漁人宿，山昏野店明。可憐飄蕩子，昨夜醉蕪城。

别于一于皇先還瓜渚

蔣易前民江都

孤嶼望不遠，渺然烟霧青。漁舟牽世務，樵客向空冥。鳥挾風歸樹，江流月到亭。異時應獨上，處處想曾經。

邗上旗亭送春

何嘉延奕美山陰

對酒惜芳叢，蕪城春又終。塘添新水綠，林倦晚花紅。江店鶯聲外，溪橋柳絮中。陳隋多少恨，微醉問東風。

渡楊子江

王典

寒色侵衣帶，江收北固城。霜笳吹不斷，白髮自能生。海

江都縣志

卷之三十一

藝文下

三

戍黃雲沒三山，落日明將軍功。莫敵流水咽啼聲。

茱萸灣

程文正范村江都

擾擾邗溝畔，何年不繫舟。霜生淮水夜，葉落楚天秋。枳橘江南異，茱萸春徑幽。浮蕩增別思，憶與故人遊。

紅橋宴集送黃潤齋先生入都

惜別黃山下，三年復此遊。閑尋歌吹地，同上水雲樓。夕照宜烏榜，秋情在白鷗。一灣風淡蕩，何必問滄洲。

五言排律

淮南寄舍弟

唐王冷然

昔余從不調，經歲旅淮源。念爾長相失，何時返故園。寄

書迷處所分袂隔涼温遠道俱爲客他鄉共在原歸情
春伴鴈愁泣夜隨猿愧見高堂上朝朝獨倚門

送陸侍御歸淮南使府五韻 劉禹錫

江左重詩篇陸生名久傳鳳城來已熟羊酪不嫌羶歸

路芙蓉府離堂玳瑁筵泰山呈臘雪隋柳布新年曾忝

揚州薦因君達短牋 時段丞相鎮揚州嘗辱表薦

揚州卽事 元宋 无 子虛 晉陵

玉壘開方面金湯控上游連營驃騎宅重柝鴈行樓疆

弩虛空發飛橋日夜浮烟生烽燧地草死虎狼秋此處

兵威震當時國步憂六年襄郡守三策蓋臣謀大將深

江都縣志 卷之三十一 藝文下 三

圍陷長江萬里休兩淮先按堵孤注獨橫籌破竹纔乘

勢聞風已置郵乾坤機軸轉海嶽版圖收春變山堂柳

波通汴水鷗平坡南下馬遠渡北來舟無復瓊花夢猶

餘芍藥愁塵埃何豎子還擁黑貂裘

過維揚作 明 皇甫湜 子安 長洲

念昔恭明祀三秋滯楚鄉今來還上國五月渡維揚戀

土情何極瞻塗意轉長川原歷迢遞烟樹引微茫浴渚

飛鳧下驚沙白鷺翔江隅有芳草幽思獨難忘

登廣陵城臺 壬午寓揚州作 國朝 李 沂 艾山 興化

城闕凝春望人烟落照中山河仍禹甸草木自王風地

控江淮阻途兼南朔通菁華騰楚域國俗染隋宮野曠
羅紈合衢長錦繡充星繁開綺戶鱗次列珠蘂柳葉歌
催放池冰酒滴融促絃縈亂蝶悲管咽孤鴻雜沓隋高
蓋登臨集鉅公因依盟指日擺脫氣凌虹石座珊瑚大
秦樓翡翠濛王孫金鑿落娼女玉玲瓏選勝朝朝聚留
歡處處同晴漪浮桂楫煖榭長蘭叢烽警透傳北星氛
歛轉東庶司方悄悄諸務頗匆匆競插魚囊箭俱張虎
鬯弓教場喧閱武太守勉臨戎百雉修墉峻羣龍畫幟
雄軍需供賈客兵仗執兒童細草蕭條綠繁花寂寞紅
從來佳麗地回首意無窮

江都縣志

卷之三十一

藝文下

三

次揚州

毛奇齡

八月隋堤柳三秋楊子波南朝曾作鎮大業舊開河螢
苑銷花草瓊臺尚綺羅雷塘宮北舞水調竹西歌高旆
京漕粟長船蜀估蹉重闔如合璧交壤勝連珂京口雲
生晚淮南木落多蕪城吾有賦騁望意如何

陪牟東山方伯郊遊次韻

唐繼祖

白沙遊未渺隔歲喜攀延密篠南朝寺輕陰北郭烟一
篙鷗浪濶數畝馬蹄便堂迴凌江岫峰青界楚天稻畦
勻學罽松雨落添泉野乘詢枯衲苔碑覓古賢蘿郎詞
麗密

平山堂有
荆公小碣

螢苑跡流傳梵唄山農唱烟花客子憐

橋頭空廿四殿脚憶三千楊李紛經眼歐蘇待拍肩明
公饒逸興賤子侍賓筵齒慧林葩燦胷襟雪爆湔摠衣
寬禮數移席引栝棧半面徐粧試都盧舞態妍驚鴻催
鼓急從史壓場園的歷華燈映微茫錦纜牽輕雷殘暑
散皎月夜潭鮮鶴夢舟初掠猿吟葉已穿郢歌誰繼響
畢甕但欲眠更有探奇約西風蜀井邊

七言律

送大理張卿之廣陵

顧况 道翁 姑蘇

春色依依傷解攜月卿今夜宿隋堤白沙洲上江籬長
綠樹村邊謝豹啼遷客本來無倚仗故人相去隔雲霓
江都縣志 卷之三十一 藝文下 三

越禽唯有南枝分目送歸鴻飛向西

酬樂天揚州初逢席上見贈 劉禹錫

巴山楚水淒涼地二十三年棄置身懷舊空吟聞笛賦
到鄉翻似爛柯人沈舟側畔千帆過病樹前頭萬木春
今日聽君歌一曲暫憑杯酒長精神

宿揚州 李紳 公垂 無錫

江橫渡澗烟波晚潮過金陵落葉秋嘹唳塞鴻經楚澤
淺深紅樹見揚州夜橋燈火連星漢水郭帆檣近斗牛
今日市朝風俗變不須開口問迷樓

入揚州郭

潮水舊通揚州郭內大厯已後潮信不通李
頎詩鷓鴣山頭片雨晴揚州郭裏見潮生此
可以驗

菊芳沙渚殘花少柳過秋風墜葉疎堤繞門津喧井市
路交村陌混樵漁畏衝生客呼童僕欲指潮痕問里閭
非爲掩身羞白髮自緣多病喜肩輿

宿揚州水閣

臥移淺浦參差合橋映晴虹上下連輕櫂過時搖水月
遠燈繁處隔秋烟却思海嶠連淒嘆近涉江濤更凜然
閑倚闌干指星漢尚疑烟蓋在樓船

江都縣志

卷之三十一

藝文下

四

送崔約下第歸揚州

姚合

滿座詩人吟送酒離城此會亦應稀春風下第時稱屈
秋卷呈親自束歸日晚山花當馬落天陰水鳥傍船飛
江邊道路多苔蘚塵土無由得上衣

瓜洲留別李詡

許渾

泣玉三年一見君白衣顛顛更離羣楊堤惜別春潮晚
花榭留歡夜漏分孤館宿時風帶雨遠帆歸處水連雲
悲歌曲盡莫重奏心遶關河不忍聞

送沈卓少府任江都

一作趙
嘏詩

煬帝都城春水邊笙歌夜上木蘭船三千宮女自塗地

十萬人家如洞天豔豔花枝官舍晚重重雲影寺墻連
少年爲尉須矜慎莫向紅樓墜馬鞭

送盧緘歸揚州

趙嘏

曾向雷塘靜掩扉荀家燈火有餘輝關河日暮望空極
楊柳渡頭人獨歸隋苑荒臺風裊裊灞陵殘雨夢依依
今年春色還相悞爲我江邊謝釣磯

送韓絳歸淮南寄韓綽先輩

島上花枝繫釣船隋家宮畔水連天江帆自落鳥飛外
月觀靜依春色邊門巷草深車轍在朝廷恩及鴈行聯
相逢莫問揚州事曾鼓莊盆對逝川

江都縣志

卷之三十一

藝文下

望

揚州看辛夸花

皮日休襲美襄陽

臘前千朶亞芳叢細膩偏勝素奈功螭首不言披晚雪
麝臍無主任春風一枝拂地成瑤圃數樹參庭是藥宮
應爲當時天女服至今猶未放全紅

寄淮南鄭賓書記

陸龜蒙魯望姑蘇

記室千年翰墨孤惟君才學似應徐五丁驅得神功盡
二酉搜來秘檢疏煬帝帆檣歸澤國淮王箋奏入班書
清詞醉草無因見但釣寒江半尺鱸

隋堤柳

李山甫

曾向龍舟拂翠華至今凝恨倚天涯但經春色還秋色

不覺楊家是李家背日古陰從北朽逐波疎影向南斜
年年只有晴風便遙爲雷塘送雪花

江都

羅隱 昭諫餘杭

淮王高譙動江都會憶狂生亦坐隅九里樓臺牽翡翠
兩行鴛鴦踏珍珠歌聽麗句秦雲咽詩轉新題蜀錦鋪
惆悵晉陽星拆後世間兵革地荒蕪

重九日廣陵道中

秋山抱病何處登前時韋曲今廣陵廣陵大醉不解悶
韋曲舊遊堪拊膺佳節縱饒隨分過流年無奈得人憎
却驅羸馬向前去牢落路岐非我能

江都縣志

卷之三十一

藝文下

聖

廣陵秋日酬進士臧漬見寄

驛西斜日滿窻前獨凭秋闌思渺綿數尺斷蓬慚故國
一輪清鏡泣流年已知世事真徒爾縱有心期亦偶然
空媿荀家好兄弟鴈來魚去是因緣

送蜀客遊維揚

杜荀鶴 彥之池州

見說西川景物繁維揚景物勝西川青春花柳樹臨水
白日綺羅人上船夾岸畫樓難惜醉數橋明月不教眠
送君嬾問君回日才子風流正少年

過揚

韋莊 端已京兆

當年人未識兵戈處處青樓夜夜歌花發洞中春日永

月明衣上好風多淮王去後無鷄犬煬帝歸來葬綺羅
二十四橋空寂寂綠楊摧折舊官河

贈江都鄭明府

張蠙象文清河

他人豈是稱才術才術須觀力有餘兵亂幾年臨劇邑
公清終日似閑居牀頭怪石神仙畫篋裏華牋將相書
更欲棲蹤近彭澤香爐峰下結茅廬

贈維揚故人

宋徐鉉鼎臣會稽

東京少長認維桑書劍誰家入帝鄉一事無成空放逐
故人相見重淒涼樓臺寂寞官河晚人物稀疏驛路長
莫怪臨風惆悵久十年春色憶維揚

江都縣志

卷之三十一 藝文下

三

將去廣陵別史員外南齋

家聲曾與金張輩官署今居何宋間起得高齋臨靜曲
種成奇樹學他山鴛鸞終日同醒醉蘿薜常時共往還
賤子今朝獨南去不堪迴首望清閑

送張員外任江都令

經年相望隔重湖一旦相逢在上都塞詔官班聊慰否
埋輪意氣尚存無由來聖代憐才子始覺清風激懦夫
若向西岡尋勝賞舊題名處爲踟躕

芍藥詩 并序

王禹偁

芍藥之義見毛鄭詩百花之中其名最古謝

公直入中書省詩云紅藥當堦翻自後詞臣
引爲故事白少傅爲主客郎中知制誥有草
詞畢咏芍藥詩詞彩甚爲該備然自天后以
來牡丹始盛而芍藥之艷衰矣考其實牡丹
初號木芍藥蓋本同而末異也予以端拱已
丑歲由左司諫爲制誥舍人後坐事黜棄淳
化甲午年又以禮部員外郎牽復舊職尋以
本官充翰林學士則謝公白傅之任皆蹂躪
矣自出滁上移廣陵追念綸闈于今九載而
編集之內未嘗有芍藥詩言于詞臣不得無
因賦詩三章書于僧壁

江都縣志

卷之三十一

藝文下

四

過揚州僧舍植數千本牡丹落時繁艷可愛
牡丹落盡正淒涼紅藥開時醉一場羽客諳傳尸解術
仙家重蕪返魂香蜂尋檀口論前事露濕紅英試曉妝
曾忝掖垣真舊物多情應認紫薇郎

東君留著占殘春得得遲開亦有因曾與掖垣留故事
又來淮海伴詞臣日燒紅艷排千朵風遞清香滿四鄰
更愛綠頭弄金縷異時相對掌絲綸

滿院勻開似赤城帝鄉齊點上元燈感傷綸閣多情客
珍重維揚好事僧酌處酒杯深蘸甲折來花朵細含稜

老郎爲郡幸朝寄除却吟詩百不能

廣陵

蔡襄 君謨 閩中

廣陵歸客歎飛蓬懷古傷離向此中前世翻波那復問
十年彈指已成空樓頭畫角催殘日城上寒鴉噪晚風
井徑蕭條人不見又隨潮信度江東

送楊秘丞秉通判揚州

司馬光

苦聞小杜說揚都當日豪華今在無江勢橫來控南楚
地形前下瞰東吳萬商落日船交尾一市春風酒並壚
得意莫忘京國友踏塵衝雪奉朝趨

揚州感舊懷古

王巖叟 彥霖 大名

江都縣志

卷之三十一 藝文下

巽

隱隱蕪城枕碧流繁華曾是帝王州一聲水調滿明月
十里春風半畫樓白鳥不離圖上去江雲長在鑑中游
廢典屈指千年事何異行人寄傳郵

次韻王定國倅揚州

蘇軾

此身江海寄天遊一落紅塵不易收未許相如還蜀道
空教何遜在揚州又驚白酒催黃菊尚喜朱顏映黑頭
火急著書千古事虞卿應未厭窮愁

送杜介歸揚州

蘇轍

揚州繁麗非前世城郭蕭條有古風尚有花畦春雨後
不妨水調月明中東都甲第非嫌汝北牖羲皇自屬翁

清洛放船經月事急先鷓鴣遶芳叢

次韻寄藍六在廣陵

黃庭堅 魯直

聖學相期滄海頭當時各倚富春秋班揚文字初無意
滕薛功名自不優焦尾朱絃非眾聽南山白日使人愁
傳聲爲向揚州問相憶猶能把酒不

送俞秀老歸維揚

鄒浩 志完 晉陵

路雪驅驅原憲履御風獵獵老萊衣情投豈比鍾山出
興盡還同剡水歸煬帝池邊松蔭遠維摩室內燭光微
攜筇促席徜徉處應記當年接下機

揚州留一上人

呂本中

江都縣志

卷之三十一

藝文下

巽

日日東風吹客衣小園春在掩芳菲殘花過雨飄零盡
好鳥穿林自在飛往事虛成采薇瘦故人頗有食言肥
知公未厭西行晚且伴江船緩緩歸

送鄧根移戍揚州

周必大 子克 廬陵

聞道維揚地望雄風流人物似江東六龍前日臨淮海
五馬由來說醉翁璧月幾橋留夜色珠簾十里待春風
遙知九日平山會笑插茱萸滿鬢紅

奉送七兄赴揚州帥幕

陸游 務觀 山陰

初報邊烽照石頭旋聞戎馬集瓜洲諸公誰聽芻蕘策
吾輩空懷畎畝憂急雪打牕心共碎危樓望遠涕俱流

豈知今日淮南路亂絮飛花送客愁

送蔣朴之維揚

潘希白

隋家天子愛揚州四十離宮取次遊荆棘久迷秦隴路
柳絲空拂汴河流君才清似庾開府世事難於孫仲謀
莫為青衫怯騎馬却將風景付閑愁

見淮東制帥趙南仲侍郎相待厚甚特送買山

錢又欲刊石屏詩置於揚州郡齋話別叙謝

戴復古

式之黃巖

如公當向古人求識面何須萬戶侯浪說釣鰲游瀚海
真成騎鶴上揚州受恩多處難為別宿酒醒時始覺秋
江都縣志 卷之三十一 藝文下 七
回首平山堂下路不堪風雨送歸舟

瓜洲阻風

宋伯仁

器之茗川

狂風未許放歸船借得僧房半榻眠落鴈影收帆脚外
怒濤聲到枕頭邊黃蘆葉底秋將老白羽書中病未痊
傳語將軍多得力揚州不比舊家年

趙龍學寄陽羨茶為汲蜀井對瓊花烹之

方岳

三印誰分陽羨茶自煎蜀井瀹瓊花數間明月玉川屋
兩腋清風銀漢槎團鳳烹來奴僕等老龍畢竟當行家
相思幾夢山陰雪搜攬平生書五車

揚州

汪元量 大有錢塘

重到揚州十載餘
畫橋雨過月模糊
后皇廟裏花何在
煬帝隄邊柳亦枯
波麥青青嘶亂馬
城蕪冉冉落羣烏
人生聚散愁無盡
且小停鞭向酒壚

揚州叙遊

賀

鑄

方回開封

逃藏九曲屬樵耕
野草閑花故有情
廢苑春風故如許
隔江山色可憐生
新聲度曲復誰道
古井酌泉聊獨清
杜紫薇靈定相笑
青樓薄倖不知名

舟次廣陵懷寄京都交舊

朋遊冠蓋滿京華
病客東流迹自賒
音驛未聞來日下

江都縣志

卷之三十一

藝文下

吳

鄰墻不見亦天涯
尚慙斗粟煩官廩
已指扁舟是我家
莫謂因風無可寄
雪梅開遍臘前花

題揚州驛

元

薩都刺

天錫鴈門

銀燭高燒照不眠
呼兒飲馬汲清泉
寒砧萬戶月如水
塞鴈一聲霜滿天
金縷欸歌來枕上
銀瓶索酒到亭前

明朝走馬燕山道
贏得紅樓說少年

鴈門集過廣陵驛一首云秋風江上

芙蓉老階下數株黃菊鮮
落葉正飛揚子渡行人又上
廣陵船寒砧萬戶月如水
老鴈一聲霜滿天自笑
棲遲淮海客十年心事一燈前

揚州

陳孚

千載殘城生亂莎
夕陽吹角荻風多
吳公臺下已黃土

楊子橋頭空白波隔岸櫓聲桃葉渡滿樓燈影柳枝歌
當年杜牧亦何意空向珠簾醉綺羅

楊子江

陳旅衆仲
莆田

楊子江頭水拍天人家插柳住江邊舟人漾槳潮生浦
賈客吹簫月滿船錦纜昔曾遊此地瓊花開不似當年
竹西池館多紅藥日日題詩舞袖前

中秋廣陵對月

張翥仲舉
晉寧

散盡浮雲月在東白蕉衫冷小庭空星河夜影尊罍裏
城郭秋聲鼓角中落葉有光時墜露鳴蛩無響不含風
此生五十三回見只遣常娥笑秃翁

江都縣志

卷之三十一 藝文下

四

憶廣陵舊事

君王昔在鎮南年賓客風流日滿筵上國旌旗分一半
層臺歌舞宿三千豪華遽盡悲離黍形勝空存慘暮烟
多少楚魂歸未得江流無際海連天

揚州

成廷珪原常
寶應

老夫住近山陰曲萬竹中間一草堂開徑不曾妨俗客
讀書恰是得清涼好風時時動鬢珮明月翩翩來鳳凰
正與君家軒子似可能攜酒共徜徉

過揚州

王冕元章
諸暨

東南重鎮是揚州分野星辰近斗牛人物漸分南北異

江淮不改古今流瓊花香委神仙佩楊柳風閑帝子舟
十里珠簾晴不下銀罌翠管滿紅樓

廣陵懷舊

明汪廣洋

官柳陰陰鎖汴橋暖催晴綠上蘭橈花迎后土依然在
人去東風不可招紫陌漸稀春試馬青樓殊絕夜吹簫
回看烽火連雲起應使江淹歎寂寥

過揚州

李質 文彬 德慶

三十年前記此過皆春樓下駐行窩十千一斗金盤露
二八雙鬟玉樹歌自昔瓊花祠后土至今荆棘臥銅駝
江都門外王孫草怨入東風綠更多

江都縣志

卷之三十一 藝文下

李

抵瓜洲

唐肅 處敬 會稽

春雨春潮撼客懷舟中十日九陰霾江名天塹元通蜀
地入瓜洲始接淮我笑銀杯能羽化君看寶劍或塵薶
明朝又過揚州去無復瓊花舊觀碑

揚州道中

張羽

馬頭津口足風波歲晏遙乘一傳過南渡客來多漢語
下江船去半吳歌蕪城總入新編戶瓜步斜連古漕河
何處吹簫明月夜野田茅屋晚烟多

邗江懷古

張昱 光弼 廬陵

家國承平厭萬幾輕乘黃屋出京畿二年巡狩前王有

千里看花亘古稀
河畔柳條春自長
苑中螢火夜還飛
當時九廟躬辭日
肯信龍舟竟不歸

揚州別春次成廷珪韻

燕語鶯啼盡可哀
更無馬跡到青苔
自從玉樹成歌後
曾見銅仙下淚來
爲晉爲秦花幾度
行雲行雨日千迴
若教蝴蝶知春夢
儘把黃金付酒杯

贈寓客還瓜洲

把酒臨風聽棹聲
河邊官柳綠相迎
幾潮路到瓜洲渡
隔岸山連鐵甕城
月色夜留江叟笛
花枝春覆市樓箏
贈行不用歌楊柳
此日還家足太平

江都縣志

卷之三十一

藝文下

至

憶揚州舊遊

張以甯

志道古田

百年何處好懷開
曾在揚州幾醉來
落日放船穿柳過
微風欹帽看花迴
卽今盡減樽前興
憶舊寧堪笛裡哀
一笑廣文官飯窄
論文那得酒盈杯

過揚州

劉秩

伯序豐城

廣陵不見舊風烟
楚客登臨思惘然
水落魚蝦常滿市
湖多蓮芡不論錢
干戈滿地懷今日
歌舞連天記昔年
獨有長橋秋夜月
照人猶自弄嬋娟

廣陵雜興

袁華

子英崑山

十年不到廣陵城
依舊瓊芳弄晚晴
繡被土甌于闐寺

寶裝刀劍鎮南營樓飄簫鼓雲中響地接烟花日外明
小杜風流今寂寞誰攜紅袖按新聲

長江天險隔南徐千古英雄恨有餘玉樹歌殘龍虎地
錦帆船下斗牛墟柳迷竹浦寒鴉聚水漫雷塘野老漁
欲弔文章賢太守山堂零落昔年書

參差吹作鳳凰鳴廿四橋頭壁月明不把瓊花祠后土
還持彩筆賦蕪城小樓窈窕低金縷別館葡萄下玉罌
醉寫烏絲遺所愛風流彷彿記三生

過揚州

史 謹 公瑾 崑山

長空開霽晚霞明篷底淮山隔岸青鴉散黑雲為陣勢

江都縣志

卷之三十一 藝文下

五

楓飄紅雨作秋聲蕃釐玉樹應無種東閣官梅尚有名
惆悵牧之招不得與誰同醉竹西亭

維揚懷古

胡 儼 若思 南昌

維揚自昔盛繁華香靄彤樓映曉霞野店停舟詢往事
水亭吹笛是誰家行人尚說金盤露仙子空遺玉樹花
二十四橋明月在垂楊幾樹照棲鴉

維揚懷古和胡祭酒韻

曾 棨 子啟 永豐

廣陵城裏昔繁華煬帝行宮接紫霞玉樹歌殘猶有曲
錦帆歸去已無家樓臺處處惟荒草風雨年年自落花
古往今來多少恨只將哀怨付啼鴉

九日渡楊子江

李東陽

秋風江上聽鳴榔遠客歸心正渺茫萬古乾坤此江水
百年風日幾重陽烟中樹色浮瓜步城上山形繞建康
直過真州更東下夜深燈火宿維揚

瓜洲江上

程敏政

克勤歙縣

畫舫長牽日夜行好風天借一帆輕濤聲北擁迎鑿鎮
山勢東蟠建業城澤國魚龍爭起舞水村鷄犬誤相驚
清樽紅燭論心地記取江南第一程

過楊子江

王

鏊

濟之蘇州

燕南倦客江東去一見澄江眼為開紅日遠疑從地起
江都縣志 卷之三十一 藝文下 三
青山近欲傍人來中流擊楫空懷志南國持衡獨媿才
漸覺故鄉風物近十年一到思悠哉

寓揚州

朱士稚

伯虎山陰

淹留車騎引杯看獨上高樓愁未闌千里鄉關聞過鴈
萬家風雪醉憑欄天涯客子依人苦江上梅花倒地殘
莫道春來動南北故人尺素遠長安

送李司封謫廣陵

李攀龍

明光起草羨青春服藥求仙笑此身白首雲霄空薦士
黃金湖海未逢人廣陵鴻鴈來秋色寒雨江楓度逐臣
見說故園湘水上懶將詞賦弔靈均

過揚州

宗臣

子相興化

湖上行吟落日邊
高秋蕭索倍凄然
蕪城舊識參軍賦
玉樹空傳帝子篇
隋苑雲殘楊柳色
邗江夜斷荻蘆烟
可憐白舫青蓑者
尚有漁歌似昔年

揚州懷古

高濟

隋皇宮殿黍離離
漢相祠邊對夕暉
畫馬傳聲已遼絕
剪花隨俗尚依稀
無雙亭古春猶在
廿四橋空燕自飛
獨有蜀岡岡上望
夜深孤月照僧歸

清明揚州道中憶王端公

朱日藩

江花江草淨春烟
北望空懷乘輿船
水國人家種楊柳
江都縣志

卷之三十一 藝文下

齋

清明士女競鞦韆
客厨未乞龍蛇火
旅食頻催犬馬年
遙想風流王柱史
西臺銀燭柘枝顛

秋晚登廣陵城

歐大任

楨伯順德

西風淮水下邗溝
何處關山獨倚樓
賦後蕪城荒井逕
書來瓜渚斷江流
青天寒色干砧夕
滄海潮聲萬弩秋
滿目蒼蒼見平楚
不知歌吹在揚州

渡揚子江寄吳氏伯仲

王穉登

百穀長洲

烟中流水曉潺潺
揚子津頭雨一灣
沾袖成斑皆客淚
隔江如黛是家山
欲探子母羞錢篋
未卜雌雄泣劍環
寄語吳郎三玉樹
莫因裘敝笑人還

揚州

侯 法 研德 嘉定

五月江城江水深蕪城斜日獨波襟關河輸輓交南北
樓閣烟花自古今佳節未移鄉國興薄游還媿故人心
十年蔓草梅花嶺手把蒲葵淚不禁

廣陵別景升小修

袁宏道

搔頭幾日見新絲二月河橋上馬時長短官街驚夢鼓
高低楊柳罨長枝江烟一擔充行李流水三叉多路岐
北地南天千萬里青巾白袷幾人知

夜登瓜洲城看月懷舊寄所親

程嘉燧 孟陽 休甯

十年曾宿焦山寺浪急天寒少客行明日片帆仍遠道
江都縣志 卷之三十一 藝文下 七
一時雙眼復孤城暮山欲盡離尊歇黃葉全稀白髮生
別後故人無限意隔江同見月初盈

瓜洲東郭訪王隱士

安穩茅齋水郭東沙圍曲映綠楊中餘寒出浦三春酒
片雨橫江五月風遠意幾因高士發清游難得故人同
斜陽醉眼憐歸路野翠烟嵐半彩虹

揚州方季康館同張伯美諸人惜別

別路江南已數程清尊細雨復江城殘魂如夢聞鶯斷
舊恨隨潮立馬生皈佛一心憐伴在驅人十口悔身輕
臨岐共有沾衣淚却使衰羸暗撫纓

廣陵別友

葉向高 臺山福清

浮生底事最堪愁，畏路馳驅易白頭。
兩度相逢重九日，一經離別又三秋。
菊當有酒花偏媚，身到無官夢亦休。
後會登高何處是，年年回首憶邗溝。

題廣陵菽園

錢謙益 受之常熟

架構平臨邛水涯，隋堤迎却俯塵沙。
南塘路識將軍第，東閣梅知水部衙。
十里珠簾叢腐草，二分明月冷梅花。
輕軒奉母承平事，會有新詩補白華。

十月朔日抵廣陵

隋苑荒臺葉不飛，竹西歌吹正依稀。
流螢尚作蕪城夢，

江都縣志

卷之三十一

藝文下

五

跨鶴真同華表歸，舊事月明空在眼。
新愁水調欲沾衣，

笊籬灣畔孤墳在，萬點寒鴉送落暉。

故人顧所建墓在笊籬灣

同陳百善諸子竹西舟泛作

梁以樟

公狄清苑

寒城烟雨濕棠梨，舊事風流話竹西。
香草夢攜三楚句，黃墟人換六朝題。
耳邊碁墅過王謝，林下琴厨笑阮嵇。
斜日酒醒誰喚得，一聲江月落銅鞮。

揚州 四首錄二

國朝

吳偉業

梅村太倉

疊鼓鳴笳發棹謳，榜人高唱廣陵秋。
官河楊柳誰新種，御苑鶯花豈舊遊。
十載西風空白骨，廿橋明月自朱樓。
南州枉作迎鑾鎮，難博雷塘土一邱。

撥盡琵琶馬上絃玉鉤斜畔泣嬋娟紫駝人去瓊花院
青冢魂歸錦纜船荳蔻梢頭春十二茱萸灣口路三千
隋堤璧月珠簾夢小杜曾遊記昔年

題宗定九江都新柳堂

龔鼎孳

芝麓
合肥

種樹何堪歎十圍風前張緒早依依啼鶯三月過隋苑
碧草一亭延落暉築室幽棲消戰伐攀條遲日惜芳菲
永豐坊角青如昨玉笛情多不可揮
茅齋風日古隄荒曾記君家大道旁愁絕故人兼故國
可堪垂柳復垂楊青驄客至春酤熟丹粉窻臨落絮香
一曲烏棲花欲盡蕪城殘月白如霜

江都縣志

卷之三十一

藝文下

七

送王貽上司李揚州

石頭潮水連瓜步纔過盧循萬里船無數遺民愁鐵甲
頻年估客蕩金錢爰書亡害于廷尉經筭難逢邊孝先
伏處此邦饒俊傑仗君憑軾起高眠

送鄧孝威歸廣陵

舊雨魂銷入洛裝滹沱水合又褰裳身孤盜賊忘羈旅
俗薄公卿諱醒狂此去名山深歲月向來吾黨各風霜
難堪到日茱萸水北望秋城鴈一行

廣陵感懷

落日櫓搖蓬鬢客蕪城秋老菊花時鴈迴玉塞知鄉路

草接銅駝上遠陂南國旌旗潮外隱錦帆簫管月中悲
天高風急仍鉦鼓岐路徘徊安所之

蕪城中秋念舍弟靖公

周亮工

却聽長年停棹語今年佳節在蕪城江邊秋月無雙色
客裏歸鴻第一聲靜夜扣舷他日淚深卮俯首故園情
不知時序何由變忍使燈前念弟兄

留別揚州

林古度

茂之
福清

不到揚州五十年繁華逝水倍淒然來尋朱戶多移主
歸貫青山不費錢三伏薰風憐潦倒二分明月惜周旋
可能老我重相訪再酌樓靈第五泉

江都縣志

卷之三十一

藝文下

美

揚州九日同姜如農王西樵程穆倩登高

宋

琬

荔裳
萊陽

塞鴻猶未到蕪城載酒登樓雨乍晴山色淺深隨夕照
江流日夜變秋聲上方鐘磬疎林滿十里笙歌畫舫明
空負黃花羞短鬢寒衣三澣客心驚

曉渡揚子

沈 荃

繹堂
華亭

曙色初開揚子渡片帆遙挂海門西橫江曉霧千峰失
隔岸寒雲萬蝶齊短棹蒼茫漁浦外長天縹緲鴈行低
中流倚棹頻回首吳楚山川極望迷

暮春邗上送彤臣侍御遊武林并寄懷西湖

王士禎

暮春相遇楚城邊
微雨宵燈又別筵
榆莢青遮攜手路
柳花黃趁渡江船
風迴津鼓沈鄉夢
人醉樓簫憶往年
憑話錢塘蘇小小
舊遊零落思茫然

瓜洲道中

王士禎

垂楊垂柳拂關河
白舫朱樓映逝波
春雨蕪城寒浪靜
夕陽京口暮山多
雷塘事去空禾黍
螢苑人稀罷綺羅
欲向江頭頻望遠
不堪灑淚石城歌

賦得隋堤柳

邗溝南望是金城
更指隋堤百感生
撩亂飛花春日晚
江都縣志
卷之三十一
藝文下
五
淒迷江曲候潮平
弩臺雨過連莎影
水殿秋來起鴈聲
猶爲君王鎮憔悴
大隄如雪不勝情

自海陵歸邗上舟中小飲醉呈諸公

醉聽滄浪撥棹聲
茱萸灣上雨新晴
行藏略已同仙尉
得失何妨任老兵
一壑沈冥慙舊約
十年潦倒厭時名
眼前底事春風感
宮柳沿堤又發生

淮水東連甲仗樓
六朝南兗古名州
風烟已作千年恨
興廢空隨萬里流
往事梁隋餘蔓草
當時吳越自春秋
酒酣百過參軍賦
城上邊風迴暮愁

揚州九日和王西樵

吳嘉紀

佳辰易使旅愁增
隋氏荒邱強一登
疾病自宜無酒日
飄零誰是授衣朋
淮田稔歲齊收稻
漁艇斜陽各曬罾
楊柳蕭疎江霧歛
秋山遠見碧層層

送金長真守揚州

汪懋麟

郡亭形勝枕平山
六一先生政事閑
萬朶荷花湖上至
兩行官妓月中還
文章太守今重遇
賓從清遊好再攀
但恨林泉僧占取
蜀岡蔓草待君刪

春望

許承宣

隋家宮闕倚雲看
遙惜芳菲碧水湍
野綠新抽天乍暝
春紅半落雨初乾
一亭鐘冷空山夢
二月鶯啼故苑寒
江都縣志

卷之三十一

藝文下

卒

還憶昔時誇戰鬪
江城吹角夕陽殘

紅橋泛月

郭士璟

皓月澄空風景幽
大江千里一揚州
遙分樹色三山起
四望溪光萬頃流
畫舫不迷隋代路
高樓應照美人愁
謁來清影隨心賞
短笛橫簫夜未休

謁文信國祠用楊子江邊丞相祠爲起句

劉梁嵩

楊子江邊丞相祠
荒臺瞻拜客愁時
不平猶共春潮起
往事徒傷渡海遲
社稷無靈餘廟祀
山川當日見旌旗
悲風萬里波千尺
使我興懷望九疑

揚州早鴈

汪楫

不見當年歸鴈宮
蕪城依舊到飛鴻
遲回實怯渡江雨
矯健初衝入塞風
楊子津邊秋水碧
吳公臺上夕陽紅
驚心粳稻何時熟
嘹唳一聲烟靄中

揚州

嚴繩孫

地擁江淮接上游
東南風日半揚州
不知仁壽空餘業
自識昭明有舊樓
鏡檻平臨青雀舫
酒壚都脫紫茸裘
如今却對吹簫月
攜得樊川自校讐

倚棹蕪城正落花
月明溝水自天涯
緣堤步障春裁錦
夾岸華燈夜鬪茶
賸有江聲通客枕
更無山色到人家

江都縣志

卷之三十一

藝文下

李

試聽水調飄何處
薄醉垂鞭過狹斜

廣陵秋興次杜少陵韻

錄二

金

鎮

長真山陰

山河百戰付殘暉
無復離宮鎖翠微
過客謾悲楊柳曲
行人但指鷓鴣飛
文章蕭統樓還在
賓客劉安事竟違
彌望江頭增戍壘
秋高苜蓿馬初肥

焦勞保障敢言功
暇日題詩郡閣中
僧院大蘇尋斷碣
簫聲小杜想遺風
舊憐柳色拖烟綠
新愛橋名伴酒紅
滿眼蒿萊秋野外
拊循無乃愧文翁

維揚春日郊遊

李景麟

星河韓城

春城花滿燕初還
攜手尋芳物外閑
一水波光澄似玉

千株烟色翠疑山停車人愛青簾幕隔代香銷綠鬢髮
勝地風光看不盡十年烽火斷刊闕

廣陵雜感

六首
錄二

陳維崧

廣陵自昔繁華窟城闕岌巖巖勢未孤地坼東南占王氣
水分淮泗滙神都五更潮落江樓笛萬里船歸海客珠
聞道王公原設險金湯半壁一愁無

重憶南朝霸業空隋家煬帝築遺宮君臣殿脚千帆裏
家國江都一夢中夾道烟花籠夜月遶堤楊柳撲東風
行人錯上迷樓望辛苦開基楊越公

廣陵春城雜興

錄一

宗觀

江都縣志

卷之三十一

藝文下

奎

水國春寒渡口烟垂楊垂柳半陰天臥消永日花開盡
醉倚高樓月墮前廿四風流金谷序三千雲影木蘭船
因思杜牧揚州事不遇崔牛倍惘然

蕪城春日同茵次分韻

宗元鼎

定九
江都

水調愁人唱夕陽春風何處不褰裳咬咬鴨睡堤邊草
軋軋車鳴陌上桑野店酒旗臨水渡市橋烟柳映芳塘
關情最是揚州路十里珠樓捲幔香

二十四橋

莫向揚州看逝津繁華千古舊堤春當時月亦憐天子
此夕橋還憶美人螢苑只今荒草細雞臺空見野棠新

誰知破碣欹流水猶弔隋皇淚拭巾

客瓜洲不寐

王仲儒 景州興化

所思終古判天涯碧落難浮到漢槎
一夕壺觴增涕淚
五更心事損年華燈明古殿俄聞磬
漏罷荒江遠吹笳
輾轉寒衾意無賴愁憐兒女望還家

廣陵江樓曉望示戴無奇

層樓獨臥千端集虛檻衝寒四望賒
海氣漸開殘月正
江峰初出亂帆斜秋歸楚岸迷行色
霜入吳天改歲華
惆悵移時又前路空冥回首憶君家

廣陵春怨

李國宋 大村興化

江都縣志 卷之三十一 藝文下

奎

鼓鞀南國羽書遙寂寂啼鶯坐柳條
花外管絃拋綺席
水邊車馬斷紅橋春風入苑吹飛絮
落日沉江退晚潮
屈戍重樓鎖妝匣野田零落粉痕消

送閻分月之廣陵

王熹儒 欽州興化

華館棲遲聚會難故園佳節暫追歡
帆隳極浦憑誰繫
酒滿芳樽且自寬細雨黃梅深院暝
重陰朱夏小樓寒
蕪城景物知何限料得懷人眼倦看

揚州早鴈

劉梁楨 玉栗江都

暗驚秋思起徘徊歷歷遙憐自北來
千里陣連晴樹黯
一行聲過晚烟開感深涼雨吳公宅
愁絕垂楊帝子臺

從此衡陽漸迢遞幾人對月首重回

發揚州至京口

程文正

一櫂蕪城落日開金山忽見妙高臺鐘聲渡水海門去
山色招人北固來兩岸深林如薺遠一江明月帶潮廻
分明謝朓詩情在徙倚樓南愛酒杯

題蛟門比部十二硯齋

顧圖河

不用高居數仞堂此中靜坐意差強門前剝啄從嗔怒
竹裏逡巡只退藏疊石栽花春日晚埋盆汲水午風涼
六安枕上支頭臥直送西牕下夕陽

蠟紙燈籠伴夜吟寒螿秋蚓荅空林是非嬾挂論文口

江都縣志

卷之三十一 藝文下

齋

歌哭難平讀史心未見異書餘幾卷不辭高價買千金
墨牀筆格烏皮几此樂誰曾著意尋

瓜洲閘口停舟

王式丹

落日汀洲客棹停閘門喧耳作濤聲淮流陡束臨江下
水勢狂奔與石爭遠岸山昏薄霧合平林月上晚潮生
艱難厯盡乘風去此是天涯第幾程

廣陵濤競渡

王方岐

五月邗江競畫橈揚舠擊汰總連朝歌成楚些堪哀郢
人比吳兒解弄潮共看蛟龍爭狎浪可憐簫鼓自干霄
濤聲應共江聲永彷彿靈均似可招

九日康山登高

吳志祖

愛廬江都

欲訪烟蘿恰在城徘徊荒徑踏莎行雲開直引螺峰出
帆過遙連雉堞平時節合酬陶令酒登臨殊媿對山名
琵琶一曲傳人口不羨揚州歌吹聲

憶維揚里居

蔣繼軾

西圃江都

家在江南江上州蕭蕭宮苑可憐秋青山北向圍京口
白浪東馳下石頭一樹名花來錦纜滿城明月繫龍舟
畫簾歌舞春風寂千古傷心帝子樓

南國園林波浪中長湖千里接江東沈沈樓閣魚龍夜
泛泛舟檣蘆荻風漂毋宅邊棲燕子故侯陵上宿漁翁
江都縣志 卷之三十一 藝文下 奎

文人氣象關天地月夜明珠映水紅

泛舟城北觀荷

唐繼祖

半篙綠漲蕩輕舟野岸風清似早秋萬柄紅香酣落日
二分涼影照當頭歌隨笛弄飄前浦酒倩花扶續亂籌
如此風光爭肯負滿船燈火更勾留

商邱大中丞再臨廣陵賦呈三首

郭元鈺

開府旌幢如鴈信春南秋北在江東雲山自識帆檣綠
鷗鳥無猜棨戟紅醫國二年來水驛療閑九日有霜叢
公寓范公祠其東 備郡人菊圃也 范公祠宇松筠院如此居停稱寓公

莎廳衙散日平西
生綠屏風自品題
席上風帆吹日去
門前霜樹與雲齊
長河曉露迷車轍
小墪晴花費馬蹄
奪我琴聰去蕭寺
落霞無韻水楊隄
祠傍天竺庵琴僧公借往吳門
建牙有興擬觀濠
詩思頭銜欲鬪高
百里農桑春有脚
一城名宿紙無毛
夢中秀句還凌謝
帙裏新名待廣騷
聞舉項斯逢客說
牛衣無淚泣蓬蒿

附刊溝集唐

田震位東關中

樹夾河聲繞郡流姚揆白雲猶似漢時秋杜甫一溪寒

水涵清淺劉滄萬樹垂楊拂御溝張祐雲雨暗更歌舞

伴趙嘏烟波仍駐古今愁李郢吳王恨魄如今在皮日休

江都縣志卷之三十一藝文下奕

應對江山各自羞李山甫

隋隄集唐

廣陵花盛帝東遊許渾隄下連檣隄上樓劉禹錫碧樹青

岑雲外聳李嶠玉簫金管路人愁王建生民有恨將誰

訴李咸用黎庶無情豈自由羅隱夾岸垂楊三百里杜牧

蒼蒼苔蘚路空留劉滄

五言絕句

送子瑒崔真甫李穆往揚州唐劉長卿

渡口發梅花
山中動泉脈
蕪城春草生
君作揚州客
半邏鶯滿樹
新年人獨還
落花逐流水
共到茱萸灣

雁還空渚在人去落潮翻臨水獨揮手殘陽歸掩門
狎鳥携稚子釣魚終老身殷勤囑歸客莫話桃源人

瓜洲道中送李端公南渡後歸揚州道中寄

片帆何處去匹馬獨歸遲惆悵江南北青山欲暮時

揚子津望京口

孟浩然

北固臨京口葵山近海濱江風白浪起愁殺渡頭人

揚子途中

柳

淡

中庸京兆

楚塞望蒼然寒林古戍邊秋風人渡水落日鴈飛天

揚州懷古

李

益

君虞姑臧

故國歌鐘地長橋車馬塵彭城閣邊柳偏似不勝春

江都縣志

卷之三十一

藝文下

李

揚州早鴈

江上三千鴈年年過故宮可憐江上月偏照斷根蓬

揚州寄諸子

裴夷直

禮卿河東

十里隔烟波孤舟宿何處遙思耿不眠淮南夜風雨

揚州廣城店

明

張以寧

潮落邗江夜先將夢到家揚州無賴月獨自照瓊花

泊瓜洲

趙

漢

鴻逵平湖

山寺清鐘曉江帆細雨秋瓜洲三日泊不為阻風留

廣陵偶題

湯顯祖

義仍臨川

歲月隨人去風塵可自如偶然流淚處翻著舊時書

和冒辟疆揚州燈船曲

徐穎巢友

縷金籠蠟焰剪雪作花篝廿四橋邊酒非關明月留
荷風吹月香星河忽搖動水變隴頭聲曲愛江頭弄

夜行楊子橋道中

國朝 王士禛

來舟與去楫沿源共川塗篙師慣風水暗裏相招呼

廣陵庭梅

索笑憐牕曉流光照砌春那須江上見宛似弄珠人

茱萸灣懷家兄

王士禛

雨歇茱萸灣返照村墟夕淮水去悠悠何處還山客

揚州早鴈

汪耀麟叔定江都

江都縣志

卷之三十一

藝文下

奕

一樣南飛鴈驚心獨不同當年歸去日曾過舊隋宮

七言絕句

雜揚送友還蘇州

唐 崔顥

長安南下幾程途得到邗溝弔綠蕪渚畔鱸魚舟上釣

羨君歸老向東吳

瓜洲驛重送梁郎中赴吉州

劉長卿

渺渺雲山去幾重依依獨聽廣陵鐘明朝借問南來客

五馬雙旌何處逢

送李穆歸淮南

揚州春草新年綠未去先愁去不歸淮水問君來早晚

老人偏畏過芳菲

黃鶴樓送孟浩然之廣陵

李白

故人西辭黃鶴樓烟花三月下揚州孤帆遠影碧空盡
惟見長江天際流

酬柳郎中春日歸揚州南郭見別之作

韋應物

廣陵三月花正開花裏逢君醉一廻南北相過殊不遠
暮潮從去早潮來

春眺揚州西上岡寄徐員外

朱長文

江南

蕪城西眺極蒼流漠漠春烟間曙樓瓜步早潮吞建業

江都縣志

卷之三十一

藝文下

苑

蒜山晴雪照揚州

揚州尋張籍不見

王建

仲初

別後知君在楚城揚州寺裏覓君名西江水濶吳山遠
却打船頭向北行

夜看揚州市

夜市千燈照碧雲高樓紅袖客紛紛如今不似時平日
猶自笙歌徹曉聞

送薛六暫遊揚州

劉

商

子夏彭城

志在乘軒鳴玉珂心期未快隱青蘿廣陵行路風塵合
城裏新秋砧杵多

廣陵秋夜對月卽事

陳羽 江東

霜落寒空月上樓月中歌吹滿揚州相看醉舞倡樓月
不覺隋家陵樹秋

淮南丞相座贈歌者虞姁 杜牧

綺筵無處避梁塵虞姁清歌白日新來值渚亭花欲盡
一聲留得滿城春

憶揚州

落魄江南載酒行楚腰纖細掌中輕十年一覺揚州夢
贏得青樓薄倖名

九日廣陵登高懷邵二先輩 歐陽詹

江都縣志 卷之三十一 藝文下 七

簪萸泛菊俯平阡飲過三杯却惘然十歲此辰同醉友
登高各處已三年

廣陵楊柳枝詞 劉禹錫

楊子江頭烟景迷隋家宮樹拂金隄嵯峨猶有當時色
半蘸波中水鳥棲

蒼溪縣寄揚州兄弟 元稹 微之河南

蒼溪縣下嘉陵水入峽穿江到海流憑仗鯉魚將遠信
鴈回時節到揚州

維揚郡西亭贈友人 盧殷 范陽

萍颯風池香滿船楊花漠漠暮春天玉人此日心中事

何似乘羊入市年

憶揚州

徐凝
睦州

蕭娘臉下難勝淚
桃葉眉頭易得愁
天下三分明月夜
二分無賴是揚州

京口送朱畫之淮南

李涉
洛陽

兩行客淚愁中落
萬樹山光雨後殘
君到揚州見桃葉
爲傳風水渡江難

奉使淮

漢使徵兵詔未休
兩行旌旆接揚州
試上高樓望春色
一年風景盡堪愁

江都縣志

卷之三十一

藝文下

七

送裴秀才歸淮南

施肩吾
希聖
洪州

怪來頻起咏刀頭
楓葉枝邊一夕秋
又向江南別才子
却將風景過揚州

淮南李相公紳席上賦春雪

章孝標
桐廬

六出花飛處處飄
粘牕著砌上寒條
朱門到曉難盈尺
盡是三軍喜氣消

瓜洲送朱萬言

顧非熊

渡頭風晚葉飛頻
君去還吳我入秦
雙淚別家猶未斷
不堪仍送故鄉人

隋宮

李商隱

乘興南遊不戒嚴九重誰省諫書函春風舉國裁宮錦
半作障泥半作帆

廣陵宴次戲簡幕賓

高駢千里

一曲狂歌酒百分蛾眉畫出月爭新將軍醉罷無餘事
亂把花枝折贈人

隋柳

汪遵宣城

夾浪分堤萬樹餘為龍迎舸到江都君看靖節高眠處
只向衡門種五株

寄維揚故人

張喬池州

離別河邊縮柳條千山萬水玉人遙月明記得相尋處
江都縣志 卷之三十一 藝文下 圭
城鎖東風十五橋

瓜洲夜泊

高蟾河朔

偶為芳草無情客况是青山有事身一夕孤洲渡頭宿
天風吹盡廣陵塵

江亭酒醒却寄維揚餞客

韋莊

別筵人散酒初醒江步黃昏雨雪零滿座綺羅皆不見
覺來紅燭背銀屏

隋堤柳

江為宋州

錦纜龍舟萬里來醉鄉繁盛忽塵埃空餘兩岸千株柳
雨葉風花作恨媒

宿揚州

宋蔡襄

瓜洲堰埭阻行橈更等江頭後信潮獨背殘燈數歸路
風傳寒柝夜迢迢

荅揚州劉發運見寄

歐陽修

瓊花芍藥世無倫偶不題詩便怨人曾向無雙亭下醉
自知不負廣陵春

登揚州北門

梅堯臣

樓上山如澹墨畫城中水似輕藍接揚州今似刀州景
似聽中和樂職歌

入瓜步望揚州

王安石
介甫
臨川

江都縣志

卷之三十一

藝文下

三

落日平林一水邊蕪城掩映祇蒼然白頭追想當年事
幕府青衫最少年

往年宿瓜步夢中得小詩錄示民師

蘇軾

吳塞蒹葭空碧海隋宮楊柳只金堤春風自恨無情水
吹得東流日向西

廣陵後園題申公扇子

露葉風枝曉自勾綠陰青子淨無塵閒吟遶屋扶疎句
須信淵明是可人

廣陵早春

黃庭堅

春風十里珠簾捲
髣髴三生杜牧之
紅葉梢頭初蠶栗
揚州風動鬢成絲

往歲過廣陵
值早春嘗作詩
今春有自淮南來
者道揚州事
戲以前韻寄王定國

淮南二十四橋月
馬上時時夢見之
想得揚州醉年少
正圍紅袖寫烏絲

還自廣陵四首

秦觀

薄茶便當烏程酒
短艇聊充下澤車
墳墓去家無百里
往來仍不廢觀書

南北悠悠三十年
謝公遺塚故依然
欲論舊事無人共
江都縣志

卷之三十一

藝文下

七

臥聽鐘魚古寺邊

邗溝繚繞上雲空
坐阻層冰不得通
賴有東風可人意
爲開明鏡玉奩中

天寒水鳥自相依
十百爲羣戲落暉
過盡行人都不起
忽聞水響一齊飛

出城三首

晁補之

桃欲呈紅柳弄陰
麥田青已沒鞦韆
深春堤細雨籃輿濕
婆餅焦聲在竹林

故國龍舟休水調
高城雉堞尚雲間
蜀岡朝雨如輕霧
不見春江草外山

堆案文書無了畢並堤船舫且縈回非關董役年年事
自爲春郊得得來

揚州雜詠

船商不入古鹽溝疏鑿纔爭土一坏未說興圩灌田事
且還歌吹舊揚州

雷波新作麥田荒曾說風波沒兩郎誰似當年李刺史
春波還引句城塘

欲穿九曲通淮子只費春夫數日工但見荷花三十里
何須更有大雷宮

蜀岡茶味圖經說不貢春芽向十年未惜青青藏馬鬣

江都縣志

卷之三十一

藝文下

五

可能辜負大明泉

廣陵道中寒食日

呂本中

風雨屬連春事休碧鱗三尺薦行舟短牆不見桃花面
付與長江自在流

南來消息不真傳政恐相逢却未然何處青帘足沽酒
粥香餠白是今年

維揚卽事

張蘊

牛斗星邊禹貢州東南屏蔽大江流向來明月珠簾夢
不信秋風夜柝愁

皂角林前野地寬新塘路口草泥乾天平如此功名事

成敗觀人自昔難

月明城上韻邊笳一枕三更夢到家不耐楚氛真僻性
賦詩酌酒與瓊花

離維揚

宋伯仁

不為鱸魚憶故鄉只緣心事近重陽鬢絲添得三分白
空被黃花笑一場

揚州

羅公升 滄洲

瓊姬羽化歸天去花后香銷掃地空要覓揚州舊風物
夕陽禪智立秋風

至揚州

文天祥 文山吉安

江都縣志

卷之三十一

藝文下

庚

北廟何神三十郎問郎行客忒郎當荒堦枕藉無人問
風露滿堂清夜長

樵夫偏念客途長肯向城中為裏糧曉指高沙移處泊
司徒廟下賈家莊

楊子

元郝經 仲常燕山

楊子江邊不見江江聲隨雨入寒牕憑誰載酒尋蘇二
赤壁磯頭白鳥雙

離揚州

范梈 亨父清江

孤篷如磨繞汀沙葉滿平湖藕未花回首竹西亭漸遠
一江烟雨酒旗斜

維揚春暮

白雲上人英

實存錢塘

烟籠柳影老鶯啼雨濕芹香乳燕飛二十四橋春又盡

江南詞客正思歸

揚州客舍

余闕

廷心武威

船頭澆酒祀神龍手擲金錢撒水中百尺樓船雙夾櫓
唱歌齊上呂梁洪

揚州

吳師道

正傳蘭谿

畫鼓清簫估客舟朱竿翠幔酒家樓城西高屋如鱗起
依舊淮南第一州

揚州長橋

蘇大年

江都縣志

卷之三十一

藝文下

七

綠陰高樹映清潭一舸夷猶酒半酣最愛西城城下路
長橋烟雨似江南

揚州

明王

禕

子充義烏

春滿揚州廿四橋何人騎鶴聽吹簫瓊花芍藥猶閑事
且訪平山舊柳條

揚州僧舍見花有感

徐賁

幼文長洲

風遞穠香到水涯幾株桃李映門斜侯家園圃多荒廢
不是僧房不見花

泊瓜洲懷舊

劉炳

潮聲月色滿江船回首春風十六年憶得石橋楊柳巷

珠簾銀燭聽歌眠

過揚州

孫 蕡 仲衍 南海

江上垂楊覆白蘋斜陽啼鳥斷吟魂朱樓翠箔今何在
一帶寒城鎖暮雲

揚州二絕句

程本立 原道 崇德

遠水疎星影動搖西風落木景蕭條傷心一片船頭月
猶照揚州廿四橋

揚州城下是官河春雨春風自綠波欲問繁華舊時事
太平遺老已無多

揚州逢李十二行

袁 凱

江都縣志

卷之三十一 藝文下

共

與子相逢俱少年東吳城郭酒如川如今白髮知多少
風雨揚州共被眠

最憶東家水調聲花前檀板雜流鶯此時我醉君猶醒
舞到梧桐白露生

蕪城歌

王廷相

莫向隋宮問六朝瓊枝玉葉已烟消祇今惟有湖邊柳
猶對春風學舞腰

瓜洲渡江

吳與弼 子傳 崇仁

壩上停篙轉柁樓江邊解纜別瓜洲滿懷秋思無心寫
獨看岷峨萬古流

廣陵夜泊

顧亮 寅仲長洲

風風雨雨暗江津
愁裏青燈照一身
夜半忽聞江上櫓
往來還有未歸人

隋堤懷古

沈章 宗玉嘉興

邗溝新碧晚濤平
楊柳曾遮殿脚行
誰道雷塘歌吹歇
月明重按玉簫聲

宜陵別蔣前民

國朝 杜濬

東臯三月感相依
垂老飄蓬計盡非
今日臨岐方自笑
半樽殘酒送君歸

廣陵贈吳野人

李沂

江都縣志

卷之三十一 藝文下

堯

把君詩句忽驚呼
便欲追隨賣酒壚
裁得相逢又分手
北風吹雪滿江湖

廣陵春遊曲

王士禛

紅樓空復玉人簫
舊跡銷沈廿四橋
殘醉臨風獨怙悵
遠春無際水迢迢

寶城北是上雷塘
細草青青墓跡荒
莫笑錦帆隋煬帝
李花楊葉兩茫茫

治春絕句

同林茂之前輩杜于皇孫豹人張祖望程穆倩孫無言許力臣師六修禔

紅橋酒

王士禛

今年東風太狡獪
弄晴作雨遣春來
江梅一夜落紅雪

便有天桃無數開

野外桃花紅近人
穠華簇簇照青春
一株低亞隋皇墓
且可當盃酒入脣

紅橋飛跨水當中
一字闌干九曲紅
日午畫船橋下過
衣香人影太匆匆

三月韶光畫不成
尋春步履可憐生
青蕪不見隋宮殿
一種垂楊萬古情

髯公三過平山下
白髮門生感故知
欲覓醉翁呼不起
碧虛樓閣草離離

東風花事到江城
早有人家喚賣飴
他日相思忘不得
江都縣志

卷之三十一

藝文下

平

平山堂下五清明

座上同矜作達名
留犁風動酒鱗生
江南無限青山好
便與諸君和鋪行

和王阮亭揚州冶春絕句

陳維崧

一帶蕪城織野烟
三春沙渚亂寒田
傷心錯到平山路
不獨江南事可憐

文選樓空畫壁虛
行人弔古日躊躇
六朝流水千春夢
多事官家好著書

清明送朱錫鬯之揚州

曹貞吉

升六
安邱

風颺幾尺青帘子
雨濕一枝紅杏花
共向樂遊原上望

鈿車流水日初斜

廣陵秋詞

王仲儒

池塘楊柳半摧凋
酒舫及香轉自饒
薄暮人歸明月上
西風吹鴈過紅橋

廣陵竹枝詞

李國宋

吳溝遙接汴河開
江上春潮日日迴
夜半槳聲聽不住
南船纔過北船來

蕪城墩下唱歌來
舴艋輕舸暗櫂催
家在茱萸灣裏住
五更月落打魚回

髻子三山高又低
廣陵城下水東西
紅橋落日人爭渡

江都縣志

卷之三十一

藝文下

全

莎草茸茸襯馬蹄

廣陵秋詞

摘星樓外見殘陽
極日連天野草荒
最是無情江上鴈
年年八月過雷塘

錦帆南幸竟無歸
回首興亡淚濕衣
欲向城西訪遺跡
敗垣荒徑水螢飛

廣陵驛

蔣菁

勁草江都

皇華亭子古碑廳
經雨經風草色青
一自嵇康琴絕響
空流官渡水泠泠

追和瓜洲十景詩

并序

熊維熊

偉男江都

關中來公向備兵維揚間過渚上樂風土之
朋秀擷其名勝作十景詩余生長於斯不及
睹昔時之景物而往蹟所傳猶多未泯因卽
其所題各志數語以存梗槩并係以短章大
約皆當年繁盛之習固不敢撰空示異若東
野齊諧之郵怪庶幾後之君子得以娛樂而
咏歌之

石橋踏月 淮泗迢迢千里至瓜渚而止其入關也東西劃然中分鎮人作石梁以利渡形勢高廣當月華麗空纖雲淨洗憑闌一望則江南諸山燦然若几案上物水光泛泛城輪其外人家影其中不啻若琉璃世界居人把臂登眺每徘徊不能去

江都縣志

卷之三十一

藝文下

全

月照長河夜色幽石梁中跨景全收聯翩遊屐情難厭
城上還知幾換籌

天池夜雨

天池爲城中注水之區廣濶深渺兩岸樓閣參差文牕綺戶相映照或夏霖暴瀉秋雨迷離則滴瀝鏗鎔之聲若瓦缶若鼓鐘若羣馬奔騰一縱莫遏凡得之靜夜爲多幽人聞之悄然而悲復輾然而喜

細雨冥濛入夜多天池平起數層波綠窻猶自歌相續

紅豆聲聲記不訛

江樓閱武

凡驄馬出使者巡歷揚郡必檄取沿江水師較武於鎮之大觀樓前於時礮火雷驚朱旗電繞諸營各角勝爭先分合迴旋儼同勁敵軍中特置倭舫終用火攻獻捷直指以次頒賞是日城頭江岸扶老挈幼觀者常若堵然

艨艟上下鬪長風簇簇旌旗曉日籠鐵甲兩邊光照水
大觀樓上獻軍功

漕艦乘風東南運艘必自京口北渡每風恬波靜兩岸戍卒則升旗促發恐中
流危險務賃小船前導多者至十餘一綫相引輕重間雜行無越次入口始解維而去當魚貫而前十里之間帆影銜接迅若駛馳江干凝睇每竟日忘倦

繞郭依山影不重中流一串浪波封天家輪輓聲靈濯
水底蛟龍解護從

東城柳岸舊柳堤在張祠旁祠祀郡丞張公張有德於瓜人者也遭兵燹後久已廢為瓦礫邇來東偏有柳營恰近故址春時依依江上萬綠拖烟遠勝靈和殿前所植瞻眺所及近則甘露北固遠則象嶺獅峰羣然豁目又何必向蔓草荒瀆徒增歎嘸

江都縣志

卷之三十一

藝文下

全

柳岸新來作柳營絲絲照水綠烟輕張公祠宇傾頽盡
此地空留萬古情

桃塢早鶯桃塢處瓜之西江方廣十餘里陸通輿馬水容舟楫人家多種桃李方春時盛開為霞為雪目不給賞復有黃鳥載好其音若相招致遊屐雜還相與藉草飛觴者無虛日至若佳晨令節則聲鱗鱗影交交或朝不得前暮不得退最為渚之勝地

桃李芳菲錦不如鳥聲嬌怯囀初舒半開油幕春風暖
一陣椒蘭出筍輿

蘆汀新鴈江自焦巖而上在在多蘆汀值白露初零咏伊人一方之詩凄其欲絕北來新鴈多停息其間終夜磬磬濤聲鴻響酬答一片居人習以為常然塵俗曉氛耳目為之俱廢得此一望青蒼始覺天宇寥廓別是一景象

秋水方盈未著霜蒹葭汀上氣蒼茫登樓忽覩初來鴈
嘹唳一聲天氣涼

雪江釣艇

釣不必定在江江未必常得雪境與時會幽渺淡寂唯小艇垂綸隱

隱其或上或下載沉載浮者光相盪也柳州所云千山飛鳥萬徑人踪此詩中之景而凝寒積素之間忽若鷗眠鷺蹠三三兩兩聚散不常又景中詩矣升高遠眺固是奇觀

花飛絮舞白紛紛瀰望空濛氣不分萬頃波中飄一葉

何人垂釣與偏慙

金山塔燈

北而南望潤州諸峰如屏張几列其相對注者則上浮玉雖根底于

南而神情意態若特為北闕一生面中流突起浮圖半入雲表鐘鼓鈴鐸之聲悠然靜夜歲時燠塔燃燈必自下始周折盤旋漸高漸繁在山中不具見也自瓜遥矚如火樹銀花

江都縣志

卷之三十一

藝文下

舍

炯炯達旦

孤峰突兀古來奇一塔凌虛四望迷入夜層層光漸滿
却疑天半列星垂

銀嶺晴嵐

南徐佳地厭人遊賞者莫如三山而瓜渚清切又於銀嶺乎先之烟

雲變幻青綠萬狀蓋天地之氣涵毓發露不必處處為然也居渚上者詩壇酒社之餘相與緩步城闈適積雪初升峰腰嵐斷不覺鼓掌稱奇歸而吮筆摘詞以紀一時所見尤為

快絕

洪濤拍拍隔江南無數青山水際涵銀嶺遙看何處是
朝來多半化烟嵐

廣陵秋詞

王燾儒

劫火摧殘事已遙至今明月憶吹簫秋來夜夜霜如霰
白草寒烟廿四橋

驚沙獵獵起秋風蜀道蒼茫萬里通射落雲中兩飛鴈
桃花馬上整雕弓

薄籬野館百花中花落還餘山葉紅最是留連歸不得
紅橋橋畔酒旗風

揚州郊遊大醉次日得二絕句 王式丹

沿岡面郭幾園亭舫子移來歷遠汀怨殺東風無意緒
當春不放柳條青

如此江山惱客魂壺觴狼藉醉黃昏朝來點檢春衫袖
江都縣志 卷之三十一 藝文下 全

猶帶平樓舊酒痕

紅橋夜泛 魏嘉琬

料理漁竿短袖擎西風湖上不勝情荷花十里香無路
月下扁舟月上行

廣陵悼孫豹人 王廷燦似齋錢塘

昔年白首來江上獨對青山哭夕陽甲午孫至杭州投張坦公方伯二律
有白首相逢大江上青山欲哭夕陽邊之句張閱詩大慟今日廣陵城下客不須聞

笛已神傷

曹棟亭銀臺招遊近郊 楊 潛掌亭江都

草脚青回柳眼長暄妍燕寢倦焚香圓沙唼喋羣鳧喜

一片春聲畫槩旁

郭外雲山面面佳
畦塍幾隊踏青鞵
胡牀老子雄心在
領客風前試箭鞞

和宋山言廣陵雜興

郭元鈞

葑塞湖頭笋竹扉
因君還下釣魚磯
中丞門戶何閑劇
戟影紅邊水鳥飛

秋江寒色滿菰蒲
浮玉東頭綠帆孤
獨上海風天際埕
一江紅樹雨模糊

詩餘

河傳

唐 韋 莊

江都縣志

卷之三十一

藝文下

矣

何處烟雨隋堤春
暮柳色葱蘢畫橈
金縷翠旗高颺香
風水光融 青蛾殿
脚春妝媚輕雲裏
綽約司花妓江
都宮闕清淮月映
迷樓古今愁

柳含烟

五代 毛文錫

隋堤柳汴河春夾
岸綠陰千里龍舟
鳳舸木蘭香錦帆
張 因夢江南春景
好一路流蘇羽葆
笙歌未盡起橫
流鎖春愁

浣溪沙

揚州賞芍
藥櫻桃

宋 蘇 軾

芍藥櫻桃兩鬪新
名園高會送芳辰
洛陽初夏廣陵春
紅玉半開菩薩面
丹砂穠點柳枝唇
尊前還有箇中

人

虞美人

與秦少游
維揚飲別

波聲拍枕長淮曉隙月窺人小無情汴水自東流只載
一船離恨向西州 竹溪花浦曾同醉酒味多於淚誰
教風鑑在塵埃醞造一場煩惱送人來

臨江仙

夜到揚州
席上作

尊酒何人懷李白草堂遙指江東珠簾十里捲香風花
開花又謝離恨幾千重 輕舸渡江連夜到一時驚笑
衰容語音猶自帶吳儂夜闌相對處依舊夢魂中

夢揚州

本意

秦觀

江都縣志

卷之三十一

藝文下

七

晚雲收正柳塘烟雨初休燕子未歸惻惻輕寒如秋小
闌外東風軟透繡幃花密香稠江南遠人何處鷓鴣啼
破春愁 長記曾陪燕遊酬妙舞清歌麗錦纏頭殢酒
困花十載因誰淹留醉鞭拂面歸來晚望翠樓簾捲金
鈎佳會阻離情正亂頻夢揚州

望海潮

廣陵
懷古

星分牛斗疆連淮海揚州萬井提封花發路香鶯啼人
起珠簾十里春風豪俊氣如虹曳照春金紫飛蓋相從
巷入垂楊畫橋南北翠烟中 追思故國繁雄有迷樓
挂斗月觀橫空紋錦製帆明珠濺雨寧論雀馬魚龍往

事逐孤鴻但亂雲流水縈帶離宮最好揮毫萬字一飲
拚千鐘

水調歌頭

舟次揚州和楊濟翁周顯先韻

辛棄疾

幼安 歷城

落日塞塵起邊馬獵清秋漢家組練十萬列艦聳層樓
誰道技鞭飛渡憶昔鳴鏑血汚風雨佛狸愁季子正年
少匹馬黑貂裘 今老矣搔白首過揚州倦遊欲去江

上手種橘千頭二客東南名勝萬卷詩書事業嘗試與
君謀莫射南山虎直覓富民侯

揚州慢

清熙丙申至日余過維揚夜雪初霽薺麥彌望入其城則四顧蕭條寒水自碧暮色漸起戍角悲吟余懷愴然感慨今昔因自度此曲千巖老人以為有黍離之感也

江都縣志

卷之三十一 藝文下

姜夔

姜夔

堯章 鄱陽

淮左名都竹西佳處解鞍少駐初程過春風十里盡薺
麥青青自塞馬窺江去後廢池喬木猶厭言兵漸黃昏
清角吹寒都在空城 杜郎俊賞算如今重到須驚縱
豈翫詞工青樓夢好難賦深情二十四橋仍在波心蕩
冷月無聲念橋邊紅藥年年知為誰生

念奴嬌

南歸渡揚子作 雜用淵明語

葉夢得

少蘊 貴溪

故山漸近念淵明歸意翛然誰論歸去來兮秋已老松
菊三徑猶存稚子歡迎飄飄風袂依約舊衡門琴書蕭
散更吹有酒盈尊 惆悵萍梗無根天涯行已徧空負

田園去矣何之窓戶小容膝聊倚南軒倦鳥知還晚雲
遙映山氣欲黃昏此中真意故應欲辨忘言

沁園春

維揚作

劉克莊

遼鶴重來不見繁華只見凋殘甚都無人誦何郎詩句
也無人報書記平安閭里俱非江山略是縱有高樓莫
倚闌沈吟處但螢飛草際鴈起蘆間不辭露宿風餐
怕萬里歸來雙鬢斑算這邊贏得黑貂裘弊那邊輸了
翡翠裘寒檄草流傳吟牋倚閣開到瓊花亦嬾看君記
取向中州差樂塞地無歡

太平時

賀鑄

江都縣志

卷之三十一

藝文下

全

秋盡江南葉未凋晚雲高青山隱隱水迢迢接亭臯
二十四橋明月夜弭蘭橈王人何處教吹簫可憐宵

朝中措

維揚感懷

曾

覲

純夫

雕車南陌碾香塵一夢尙如新回首舊遊何在柳烟花
霧迷春如今霜鬢愁停短棹懶傍清樽二十四橋風
月尋思只有銷魂

菩薩蠻

廣陵盛事

蔡

伸

仲道甫田

水光山影浮空碧柳絲搖曳春無力柳岸繫行舟吹簫
憶舊遊舊遊堪更憶望斷迷南北千古恨悠悠長江
空自流

踏莎行

與莫兩山談
邗城舊事

周

密

草廳
弁陽

遠草情鍾孤花韻勝一樓聳翠生秋暝十年二十四橋
春轉頭明月簫聲冷 賦藥才高題瓊語俊蒸香壓酒
芙蓉頂景留人去怕思量桂牕風露秋眠醒

風入松

廣陵元夜
病中有感

元張

翥

東風巷陌暮寒驕燈火鬧河橋勝遊憶徧錢塘夜青鸞
遠信斷難招蕙草情隨雪盡梨花夢與雲銷 客懷先
自病無聊綠酒負金焦下帷獨擁香篝睡春城外玉漏
聲遙可惜滿街明月更無人為吹簫

水龍吟

揚子江
上作

國朝

王士禎

江都縣志

卷之三十一

藝文下

卒

岷峨萬里滔滔荆吳九派來南紀潯陽東下秣陵西望
吳頭楚尾鐵甕風高海門鴈斷角聲初起歎從來多少
英雄割據都付與東流矣 盡道長江天塹暗消磨幾
番戰壘獅兒年少寄奴老手正堪相匹北府風流子有
孫權甥如無忌到而今洗馬臨江愁絕一天烟水

山亭柳

咏隋堤
新柳

鄒祗謨

紋澱微流正萬縷初柔垂綺苑映妝樓此日藏烏多少
他時繫馬遲留漸漸綠深黃淺一帶烟浮 花花絮絮
雷塘路風風雨雨到邗溝初學舞慣含愁遠恨能傳玉
笛輕寒乍到紅篝最是長條牽惹人在蘭舟

菩薩蠻

除夕阮亭廣陵署中守歲

彭孫通

羨門海鹽

時序關心殘臘盡同雲劈雨寒猶緊小暖逼爐烟江春入舊年
芳柑傳綺席好事過除夕香雪動園梅春回人未回

畫屏秋色

蕪城秋感

野照蕪城夕送遠目雲水蒼茫不極瓊蕊音遙青樓夢
杳玉鈎人寂何處認隋宮見衰草寒烟堆積攢一片傷
心碧聽柳外哀蟬風高響滯如訴興亡舊恨聲聲無力
今昔可勝悽惻莫重問錦帆消息竹西歌吹淮南笙
鶴盡成陳迹轉眼又西風辭巢越燕還如客落葉千重
蕭城萬事總銷沈惟有清江皓月會照昔人顏色

江都縣志

卷之三十一

藝文下

全

踏莎行

隋堤

吳綺

一帶平沙千年流水龍舟鳳舸曾銜尾錦帆去後少人
行柳條空學長蛾翠殿脚難回槎頭漫繫漁郎笑倚
春風醉垂楊莫道是無情楊花自是無根蒂

念奴嬌

懷揚州王阮亭司理

宗元鼎

鎮淮門外小秦淮十里亭臺花竹官閣寒梅猶映著流
水人烟板屋蒼鬱清幽翳然林樹城郭揚州綠紅橋碑
記家家愛榻千幅猶記飲澗垂虹靚妝明鏡凝照人
如玉西望雷塘何處是十五丫鬟唱熟永叔平山子瞻

禪智此後遊難續惟公雅趣酒闌援筆岡麓

望江南 廣陵早秋客懷

彭桂 溧陽

江都恨舊事說隋朝錦纜紅穿花殿脚羅裙綠剪柳宮
腰齊上月明橋 今荒冢塵土鈿香消螢苑風凉山火
細龍舟潮落弩臺高不見杏娘簫

家鄉迴極目暮雲高葵扇桃笙秋好院銀雲玉雨客清
宵離緒柳千條 拚痛飲十斛醉葡萄少女風從前浦
度美人虹向隔江消殘月夢紅橋